

WANTOK

NIUSPEPA BILONG YUMI OL PAPUA NIUGINI STRET! - 27 YIA NAU

28 pes

Namba 1,231

Wik i stat long Fonde Januari 29, 1998

50 toea

INSAIT


• Ol papagraun bai lusim bikpela mani long timba loyolti. p2

• Sandline kot harim olsem Singirok kisim K70,000. p3


• Ol Bogenvil ripot. p4

• Gavana Jeneral i amamas long Bogenvil toktok. p5


Ol nupela het bilong gavman dipatmen




• Michael Gene.



• Utula Samana.



• Joe Gabut.



• Henry Veratau.

Lukim moa stori long pes 3

Noken rausim ol sumatin, Skate i tok

YAKAM KELO i raitim

NESENEL Gavman i tromoi strongpela toktok pinis long olgeta skul bod na skul atoriti long i no ken rausim ol pikinini long skul sapos ol i no baim ful skul fi long neks wik i go. Dispela em bikos Nesenel Gavman i brukim pinis K19 milien long olgeta skul insait long kantri. Na ol skul bai kisim dispela mani long neks wik.

Ol papamama i ken traim long pinisim skul fi bilong ol pikinini bilong ol long pinis bilong namba wan tem bilong skul.

Praim Minista Bill Skate i tromoi tok long ol sampela skul bod na menesmen husat i ting dispela polisi i hat long Provinsel Atoriti bilong ol. Mista Skate i tok dispela i no lo. Tasol em i bilong helpim skul long ron gut na i no bilong bosim tru ol skul ol papamama long ol hevi bilong skul fi.

Long dispela yia, Nesenel Gavman i laik brukim K76 milien olgeta i go long helpim olgeta liklik skul i go antap long bikpela skul na ol vokesenel skul bilong gavman na sios tu wantaim. Olsem na em i brukim pinis K19 milien.

Insait long dispela K76 milien skul subsidi o helpim bilong gavman i go long ol skul, Nesenel Gavman bai baim

tupela taim na wanpela Provinsel Gavman bai baim tupela taim. Dispela skul fi subsidi K76 milien bai i go long helpim olgeta skul long ol wok bilong ol olsem skul mentenens, ol skul buk na samting bilong rit na rait, na arapela wok projek bilong helpim skul. Ol papamama bai baim fi bilong ol pikinini we i karim nem bilong skul fi stret.

Praim Minista Bill Skate insait long ripot bilong em dispela wik i tok ol bikpela koles na yunivesiti bai gavman i no inap apim Yusa Pe skul fi bilong ol. Olgeta Netskol sumatin bai baim tasol K300 fi bilong ol long dispela yia.

Mista Skate i tok gavman i kamapim dispela disisen long i no ken apim Yusa Pe skul fi bikos long bikpela hevi bilong bikpela drai taim na ais insait long Papua Niugini we i mekim planti man-meri i sot long kaikai na mani tu.

Dispela gavman tu i laik helpim ol sios vokesenel skul insait long kantri. Em i laik givim helpim mani long ol sios vokesenel skul olsem Don Bosco bilong ol man na Caritas Trening skul bilong ol meri we Katolik sios i save ronim long Mosbi. Em i askim pinis Dipatmen bilong Edukesen long skelim na painimaut ol sios vokesenel skul long kantri na mekim ripot bilong ol i go long kabinet kibung bai ol i ken toktok long en na pasim disisen.

I no planti pikinini i save go long ol hai skul insait long kantri. Bikos planti tru i save feil long gret 6 na save traim arapela rot olsem ol vokesenel skul na arapela trening skul insait long kantri.

Skul fi long olgeta provins na taun o siti bai i no inap wankain. Bikos dispela i bihainim disisen bilong wanwan skul bod na Provinsel Gavman bilong ol yet. Skul fi bilong ol komyuniti skul na ol hai skul long ol provins we Provinsel Gavman i gat planti mani bai i daun liklik. Na arapela we Provinsel Gavman i nogat planti mani bai i antap liklik.

Namba wan pemen bilong skul subsidi nau em Nesenel Gavman i baim na em bai baim gen long Julai 3. Long mun Epril na Oktoba 15 bai ol wanwan Provinsel Gavman i baim.

Olpela Minista bilong Edukesen na mema bilong Makam, Andrew Baing i bin tokaut pinis olsem dispela skul fi subsidi gavman i toktok long en i no wanpela nupela o ekstra mani. Dispela em mani i stap pinis insait long baset bilong ol Provinsel Gavman. Olsem na em i ting bai ol Provinsel Gavman i painim hat tu long skelim mani bilong ol long dispela skul fi subsidi we inap kamapim hevi long arapela developmen na projek eria bilong ol Provinsel Gavman, Mista Baing i tok.

MUTRUS KANAGE
BILONG DISPELA WIK
KATIM NA SALIM I KAM

KANAGE



"Em nau, narapela wik bilong mi ken"

Meri bilong Kanage i dai na olgeta lain famili na wanlain i kam bung long haus na mekimsave long krai i stap. Long namel bilong olgeta krai, yu ken harim krai bilong Kanage i antap tru na winim olgeta lain. Yu save, lewa bilong Kanage i bruk ya. Olgeta lain i krai i go na stop long kisim win. Tasol Kanage i hatim skin yet long krai. Kanage i krai olsem wanpela ful de na brukim nait i kam tulait. Olgeta lain tambu bilong Kanage i sori nogut tru long em bikos nek bilong em pas, ai bilong em i solap na strong bilong em i pinis. Tasol em i no stop. Em kilim skin yet. Em nau papa bilong meri i kam na tok, "tambu, mipela i sori long yu bikos yu nogat strong nau long krai tupela de olgeta. Yu gutpela tambu tru bilong mipela olsem na noken wari, bai yu kisim namba tu bilong Susana". Taim Kanage harim olsem, wantu krai bilong em i stop na em bikmaus na tok, "ol tambu, hariap na kisim bodi bilong Susana i go planim long matma".

WINA BILONG DISPELA WIK EM

JOE PETER MOSBI


Sapos yu ting yu gat wanpela gutpela pani stori, orait katim hap pepa antap i makim "Mutrus Kanage bilong dispela wik" na salim wantaim stori bilong yu i kam long WANTOK NIUSPELA,

P. O. BOX 1982, BOROKO PNG.

Putim nem na adres bilong yu long pas na bai yu gat sans long kamap wina bilong "MUTRUS KANAGE BILONG DISPELA WIK" na winim wanpela praiz, SANS, YAH!

Stori na nem bilong yu bai kamaut long wanwan wik so noken lus tingting long baim Wantok niuspepa na painimaut!

SEKIM NEM BILONG TUPELA ARAPELA WINA LONG PES 13 NA 15.



MUTRUS

MAJOR SPONSA BILONG RAGBY LEAGUE INSAIT LONG PAPUA NIUGINI

GOVERNMENT WARNING: SMOKING IS DANGEROUS TO HEALTH

PLIS RIPOT

Madang: Ol plis long Madang i holim pinis wanpela man bihain em i sutim dai wanpela sekyuriti gad long taun las Sarere nait. Sekyuriti gad ya i bilong Bogia insait long Madang provins. Ol bin sutim em 9-pela taim na em i dai. Birua ya i bin kamap long Simkor didiman stoa we i stap long Modilon rot. Daiman ya i traim long stapim foapela stilman tasol ol i bin sutim em, taitim em na em i dai. Ol bin kisim em i go long haus sik tasol em i dai long autpesens hap. Plis i bilip olsem man we ol i holim pasim i stap i wanpela sempion spots pilala.

Rabaul, Is Nu Briten: Plis long Is Nu Briten i mekim wok painimaut nau long wanpela motobot we sampela lain i stilim taim man husat i was long en i slip. Stilpasin ya i bin kamap long las wiken.

Provinsal plis komanda Michael Sirenis i tok 55-hos pawa bot i kostim K6,000na i bin pas long nambis bilong Lungalunga long not kos. Pap bilong motobot, Man Kan, i bin lusim long hap las Trinde. Em i wok wantaim Serazy timba kampani long Baining eria insait long Is Nu Briten provins yet. Plis i mekim ol wok painimaut long dispela samting nau.

Ol arapela plis ripot i kam long Is Nu Britenna Manus provins:

- Sampela stil lain i bin brukim wanpela haus Rangilil klostu long Vudal Yunivesiti kolis na stilim wanpela senso we kos bilong em i moa long K2,0000, Mista Sirenis i tok. Em i tok ol i save husat i wokim dispela stilpasin na plis bai i holim pasin.

- Ol plis long Manus i mekim wok painimaut long dai bilong wanpela meri, ekting plis komanda Lawrence Tiyonei i tok.

Mista Tiyonei i tok nem bilong meri em Hilda Naum. Ol bin painim bodi bilong em long haus bilong em long ples Siva long Momote haiwe las Fraide. Plis i tok long apinun bipo em i dai em i kros wantaim man bilong em.

Bodi bilong em i stap nau long Lorengau haus sik wetim dokta long sekim em na painaut wanem samting i kamap long en na em i dai.

- Sampela stil man i brukim Stimsips hatwe stoa long Lorengau las Sarere na stilim ol samting we ol i save yusim long pawa long en. Ol dispela samting i kostim moa long K10,000.

Mista Tiyonei i tok dispela stilpasin i bin kamap long nait taim i nogat sekyuriti i stap.

Westen Hailens: Plis i holim pasim na sasim wanpela man long rong em i wokim bilong holimap wanpela liklik balus na stilim tu K371,800 insait long Westen Hailans bihain tasol long Krismas.

Dispela samting i bin kamap long Disemba 29.

Plis i autim nem bilong haijeka olsem David Waria Wasa husat i gat 23 krismas na em i kam long ples Wungai insait long Nebilyer eria bilong Westen Hailans provins. Plis i bin holim pasim em taim em i laik kalap long PMV na go long Goroka. Plis i bilip strong olsem Wasa i papa bilong ka we ol i bin yusim long karimaut haije na holap pasin.

Ol i sasim wama long stilim K371,800 kesmani long ko pailat na pailat bilong balus.Mani ya i bilong PNGBC Hagen brens.

Papagraun bai lusim planti mani long timba bisnis

YAKAM KELO i raitim

MANI ol papagraun bilong ol timba projek i save kisim bai pundaun nau long K18 milien. Gavman bilong Papua Niugini tu bai i no inap kisim K45 milien takis mani bilong ol diwai. Na mani i kam long kantri long salim diwai anit long foren eksens we i mak olsem US\$90 milien tu bai nogat.

Ripot i kam long opis bilong PNG Fores Industri Asosiesen (FIA) i tok planti ovasis kantri i no laikim tumas ol diwai na timba bilong PNG moa, maski prais i pundaun long wol maket.

Long depo nau i gat 332,600 kubik mita diwai i hip na i stap. Tasol 174,200 kubik mita o 52 pesen (%) em orait long salim yet. Na 46,600 kubik mita em bagarap pinis bikos ol i sting na drai. Na dispela i kamapim hevi long indastri we em inap

lusim olsem US\$4 milien na tu stok level i pundaun go daun na nau yet i no gat maket bilong ol.

Insait long bikpela wok painimaut bilong ol memba bilong Fores Industri Asosiesen (FIA) long mun Januari dispela yia, ol i luksave olsem 3,530 woka long Papua Niugini yet na 436 ovasis wokman i lusim wok pinis. Bikos 13 timba kampani na projek i pasim wok bilong ol pinis. Dispela em insait long 21 timba kampani we i wok long timba projek insait long kantri. Arapela kampani nau i wok i stap yet i wok long daunim wok bilong ol i go daun liklik tru. Ol i wok long mekim wok tasol long stretim rot, wok mentenens na stretim ol hap hap diwai i stap long banis.

Insait long dispela painimaut ripot bilong FIA, ol i tok, hevi we i bin kamap long las yia taim ol Esia kantri i bin bungim hevi long wok bisnis o mani bilong ol, gavman bilong

Papua Niugini i no bin tingim long sapatim timba indastri bilong PNG. Bikos dispela hevi bilong ol Esia kantri i kamapim hevi long maket bilong ol timba bisnis, ripot i tok.

Ripot i tok long dipela hevi bilong ovasis maket, ol bisnis long PNG i traim long salim timba na diwai insait long PNG yet. Planti em long Mosbi siti we ol i save salim planti diwai long diskaun prais. Tasol dispela i mekim na planti ekstra diwai i stap nating long stok i stap.


Long strongim toktok antap long dispela wok painimaut, Robert Tate, Rises Opisa bilong FIA i tok gavman i mas helpim Fores Industri yet long daunim ol takis bilong em. Bikos indastri i wok long baim bikpela takis tasol em i wokim mani na tu em i wok long lusim planti wokman bilong em. Em i askim gavman long daunim dispela 20 pesen (%) takis bilong em na tu glasim na dau-

nim tu ol eksport takis bilong em.

Mista Tate i tok planti taim ol toktok i save kamap olsem timba indastri i no save baim takis. Tasol long ripot bilong Intenel Revenu Komisn (IRC) long wok bilong em long kisim takis, em i kisim K151.8 milien long eksport takis bilong timba indastri na givim long gavman. Dispela i wankain long K151.1 milien olgeta kampani insait long Papua Niugini i save kamapim long takis bilong ol na givim i go long gavman.

Maining na oil kampani i no stap long dispela.

Ripot bilong FIA i tok dispela hevi ol i bungim bai kamapim planti hevi tu long wok bilong ol long traim stretim ol rot, bris na arapela sevis ol i mas mekim insait long ol asples eria bilong ol papagraun em ol i save katim diwai long ol. Na mani ol papagraun i save kisim long kampani olsem loyalti pemen tu bai nogat nau.



• Singa bilong Nokondi Nama, Charles Esshyhafo (namel) i kolim nek arere long studio. Long lephan em Kori Bare na raithan em Elly Meakoro. Foto: james Kila.

Nokondi-Nama nambawan grup long rekot long nupela CHM kompiyuta studio

JAMES KILA i raitim

STAIL musik grup bilong Isten Hailans provins "Nokondi Nama", husat i bin stap aut long rekoting moa long 6-pela yia olgeta nau i kambek gen. Nau yet ol i stap long Mosbi na rekot yusim nupela kompiyuta studio bilong CHM. Ol i namba wan grup tru insait long PNG long yusim dispela nupela ol kompiyuta dijital masin long studio wantaim enjinia Wamsi Ilau. Dispela masin em i nupela tru long PNG na Saut Pasifik Alitan na ol lain long Music-Lab long Brisben, Australia i bin putim kamap long CHM studio namba-3 long Mosbi.

Planti manmeri long PNG i save pinis long gutpela stail bilong Nokondi Nama. Ol i save kukim stret bipo long redio na TV wantaim ol gutpela stail song bilong ol olsem *Wara Kefamo*, *Kolples Goroka*, *Arungo na Dimulkra* nai bin winim lewa bilong planti planti manmeri na ol pikinini. Ol i gat stail bilong ol yet we i narakain moa long ol narapela ben na dispela em wei ol i raitim song na pilai musik. Nokondi Nama i bin mekim las rekoting bilong ol long 1992. Man i go pas na singa Charles Esshyhafo wantaim grup bilong em i stat pinis long rekotim nupela kaset album bilong ol wantaim Chin H Meen studio long Mosbi.

Charles i tok olsem wok bilong em olsem wanpela haikul tisa i bin kisim bikpela taim bilong em na bagaros i nogat

inap taim long go long Mosbi long rekot. Nau yet em i tisa long Kainantu Haikul.

Charles i tok olsem dispela nupela album bilong ol bai gutpela moa bikos ol i bin stap aut longpela taim na ol i putim olgeta gutpela bilas long mekim dispela nupela i kamap stail na rait-olgeta na tu winim lewa bilong planti manmeri. Taitol bilong dispela nupela album em "Welcome to Goroka-Freedom Land". Ol i gt planti ol gutpela song ol i singim long tokples Isten Hailans na Tok Pisin. Charles i tok ol i tingting tu long wokim sampela video klip long promotim dispela nupela album. Em i tok ol video ol bai mekim long Goroka stret, ino long narapela hap. Dispela em bikos ol i laik promotim ples tru bilong ol.

Nokondi Nama nau i gat tupela nupela memba husat i kam wantaim Charles long rekot. Wanpela bilong ol em Elly Meakoro, wanpela gret-12 sumatin long Aiyura Nesenel Haikul, husat i gat gutpela save tru long pilai kibot. Narapela man husat i save pilai gita Nokondi i kisim em Korri Bare, wanpela bagaros bilong Kainantu yet. Nokondi Nama i bin stat rekot long CHM long 1988 taim tupela man i go pas em Charles Esshyhafo na Henri Larias i bin statim. Tupela i bin memba bipo bilong wanpela ben bilong National Arts School em "Tumbuna 84" Dispela grup i bin bikpela tru long dispela taim wantaim song bilong ol Megusa. Yes, dispela song em Charles Esshyhafo yet i raitim na i wanpela stail song tru.

Ol PMV bas straik long Wewak

Ol papa bilong ol PMV bas i bin wokim wanpela bikpela straik long Sarere 24 de bilong dispela mun Januari 1998. Dispela straik em long soim ol pipol bilong Wewak taun husat i save yusim ol sevis bilong bas long wanpela bikpela birua i bin kamap long PMV bas namba 13 long Niugo bas stop taim ol bikhet mangi i bin sutim na bagarapim tru bas ya wantaim ol ston long Fraide apinun.

Wanpela papa bilong PMV bas long Wewak Mista Feruwik Mainge i tokim Wantok olsem planti ol PMV bas long bipo na tu wanpela bas bilong en i bin bungim wankain hevi long dispela Niugo bas stop. Planti ol arapela papa bilong ol PMV bas husat i save ron long dispela rut i putim aut bikpela komplek bilong ol i go long Wewak polis na bikman bilong polis long Wewak long wokim sampela samting long ol dispela i bin kamap long nau na long bipo tu long dispela wanpela hap, ol i tok.

Planti ol manmeri husat i save yusim sevis bilong ol PMV bas ya i bin kisim taim stret long Sarere long moning i go inap long apinun 4 kilok taim ol bas i bin go on straik long hevi ya i bin kamap.

Olgeta bas i bin bung wantaim antap long Wewak polis stesin long Sarere na i bin autim planti ol wari bilong ol long hevi ya.

Bihain long dispela bung polis i bin go pas na ol PMV bas i pulim lain bihainim polis na raun long olgeta kona bilong Wewak taun long soim publik long hevi bilong bagarapim sevis bilong ol.

Polis i bin tokaut long ol publik long ol tingting bilong ol papa bilong ol PMV bas olsem ol bai stop olgeta long yusim dispela rut go olsem long Niugo bas stop na Wirui Catholic Misin.

Long wanem dispela wanpela rut tasol i bin kamapim planti birua pinis long ol PMV bas bilong Wewak taun. Wanpela papa bilong bas i tokim Wantok Niuspepa. Polis i bin tokaut tu olsem long bipo wanpela bikpela hevi tru i bin kamap long pasin bilong brukim nating bas taim ol Kubalio husat i save stap olsem long Yanaroro i go olsem long Yarapos i belhat long wanpela PMV bas bilong ol i kisim bagarap long han bilong ol mangi Niugo na ol i bin bringim pait i kam long Niugo tasol polis na ol bikman bilong provins i hariap long go long namel na stopim pait long kamap.

Polis long Wewak i tokaut strong tru long ol pipol bilong Wewak taun olsem ol bai givim bikpela mekim save i go long husat bikhet man i wokim kain pasin olsem long bihain taim.

Yumi mas rispektem na yusim ol kain sevis olem long gutpela pasin bilong wanbel, Polis i tok.

Long wanem ol dispela sevis i stap long wokim sampela hatwok long laip bilong mipela isi.

Polis i tokaut tu olsem ol i save pinis long nem bilong man i go pas long kamapim birua ya long bas 13 long kamap hariap long Wewak polis stesin long gutpela bilong bas sevis i go bek long ol pipol bilong Niugo setelmen.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief:
Anna Solomon.
Advertising Manager:
Mike Kanin.

Papers distributed by air throughout PNG. Available by air mail subscription within Papua New Guinea and overseas
Email adres:
word@global.net.pg

Editor of Wantok:
Leo Wafiwa.

Advertising deadlines: Display bookings: Wednesday midday. Classified Advertising: Thursday midday. Classified Advertising: Thursday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

WANTOK

NIUSPEPA BILONG OL PAPUA NIUGINI

Noken stapim edukesen bilong ol pikinini

Planti provins i kisim pinis samting olsem K1 milion skul subsidi bihainim tok promis bilong Praim Minista Bill Skate long 1997. Ol pipel bilong Papua Niugini i mas givim bikpela tok tenkyu i go long PM Skate.

I luk olsem dispela em i namba wan taim tru bilong ol papamama i kisim bikpela helpim tru i kam long wanpela gavman bilong PNG. PM Skate i sanap strong long givim fri edukesen. Long dispela as em i bihainim tok promis bilong em na long dispela yia gavman bilong em i putim samting olsem K30 milion bilong skul subsidi. Long dispela mani gavman i salim pinis samting olsem K19 milion i go long olgeta provins.

PM Skate i givim tu strongpela tok lukaut long ol het masta bilong olgeta skul bilong gavman na sios olsem sapos ol het tisa i no larim ol pikinini i go long skul, em bai rausim ol. PM Skate i laik olgeta pikinini long PNG i mas go long skul inap wanpela tem.

Long sampela provins i luk olsem sampela het masta i no laik kisim ol skul pikinini taim ol papamama i no baim skul fi. Planti skul i sanap strong long lo bilong skul bilong ol yet na i askim ol papamama long baim projek fi na skul fi antap long ol arapela samting. Na sapos ol papamama i no inap bihainim dispela lo skul i pasim, sori tumas ol het tisa i no inap kisim ol pikinini long skul.

Bilong wanem bai ol het tisa bilong ol dispea skul i mekim kain pasin olsem, taim gavman i putim pinis skul subsidi i go long olgeta skul na vokesenel skul bilong gavman na sios long kantri?

Sapos gavman bilong PM Skate inap marimari long ol pikinini na katim mani long baim skul fi subsidi, ating em i no gutpela long ol skul i stapim ol pikinini long go long skul na kisim save. Moa yet, taim dispela pasin i kamap, ol papamama tu i paul. Hevi nau i stap long ol het masta i mas mekim gutpela disisen bilong helpim ol pikinini long kisim save.

Olgeta skul long PNG i mas wok bung wantaim gutpela tingting bilong PM Skate na larim ol pikinini i go long skul long wanpela tem. Insait long dispela wanpela tem, ol papamama i ken painim sampela mani na pinisim wanem hap pe skul i laikim. Tasol, noken stapim ol pikinini long go long skul bilong kisim save. Dispela em i rait bilong ol.

WANTOK
NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

**PE BILONG WANPELA
YIA 52 NIUSPEPA**

| PLES | AIR |
|-----------------------|---------|
| Mosbi | K 40.00 |
| Arapela PNG eria | K 75.00 |
| Ostrelia na Nu Silan | K115.00 |
| Esia Pasifik na Japan | K150.00 |
| Amerika na Yurop | K215.00 |

Sandlain kot i harim olsem Singirok i ken yusim K70,000 Franklin i givim em

WENCESLAUS MAGUN i raitim

Namba tu Komisen bilong Sandlain enkwairi i harim long Trinde Januari 29, olsem olpela bos bilong Papua Niugini ami, Jerry Singirok i ken yusim mani Sydney Franklin i givim em. Mista Franklin i putim samting olsem K70,000 (UK31,000 paun) i go long wanpela praivet visa akaun bilong Mista Singirok long 1997.

Mista Singirok i tok olsem long Epril 1996, Praim Minista Julius Chan i tokim em long go long London wantaim Difens Minista, Mathias Ijape. Long sem taim ol i bin kamapim Operesen Hai Spid 2.

"Mi bin stap long London long Epril 1996 taim mi opim wanpela visa akaun long Lloyds. Na astingting bilong wanem mi opim dispela akaun em i bikos mi bin karim sampela Ameriken Dola na Papua Niugini Kina long kes. Na mi laik lukautim mi yet nogut mi bungim hevi na tu long mekim wokaubaut bilong mi i isi," Mista Singirok i tok.

Mista Singirok i tok Mista Franklin i givim em dispela mani bilong helpim em na ol arapela wokman long go long kibung bilong ol ami long lukim ol samting bilong pait bai i helpim ol long luksave long wanem kain ol samting bilong pait i gutpela bilong ol ami bilong PNG long baim na

yusim.

Mista Singirok i tokim Los Komisen olsem taim Mista Franklin i givim dispela mani long laik bilong em, em i no bin tambuim Mista Singirok long yusim.

"Long tingting bilong mi, mi ken yusim ol mani i stap long dispela akaun long laik bilong mi," Mista Singirok i tok.

Mista Singirok i tok olsem, taim em i bekim sampela askim i kam long kaunsel i helpim Mista Molloy, Loaia Henao. Mista Henao i askim Mista Singirok sapos mani Mista Franklin i putim i go insait long visa akaun bilong em i ken helpim em long go raun long ol arapela kantri

wantaim ol arapela ami opisa na sekim ol samting bilong pait nogat?

Long Tunde Januari 27, kaunsel i helpim Los Komisen, Mista Molloy i askim Mista Singirok ol wankain askim. Long wanpela askim, Mista Molloy i askim Singirok watpo Mista Franklin i putim dispela K70,000 i go insait long akaun bilong em. I luk olsem dispela em i no stret.

Tasol Mista Singirok i tok ating i moa beta Mista Molloy i mas askim Mista Franklin long tokaut long astingting bilong em watpo em i mekim olsem. Mista Singirok i tok em i nogat toktok bilong toktok moa long dispela mani.

Skate makim ol nupela dipatment het

.... tasol ol i gat tripela mun long soim wok

JOE KANEKANE i raitim

PRAIM Minister, Bill Skate i tok aut pinis long nem bilong ol nupela het bilong dipatment, na em i tok dispela lain i gat save long mekim ol dispela wok long redim kantri long bungim yia 2000 na i go.

Nem bilong dispela ol lain em embasada bilong PNG i go long Yunaitet Nesens, Utula Samana, olpela edminstreta bilong Westen Hailans, Henry Veratau, namba tu Odita Jenerol Mark Wani na wanpela sinia opisa bilong dipatmen ov Agrikalsa, Ted Sitapai.

Mista Skate i tokaut long dispela bihain tasol long em i kam bek long toktok bilong bel isi namel long ol Bogenvil paitman na gavman bilong Papua Niugini long kantri Nu Silan.

Ol lain em i makim ol em, nupela seketeri, Peter Tsiamaili Foren Afeas, Utula Samana Pablik Sevis, Michael Mawe Tred na Industri, Ted Sitapai Agrikalsa na Laipstok, Henry Veratau Trensport, Joseph Gabut Petroleum

na Eneji, Michael Gene Atoni Jenerol, Ken Serupi CIS, Mark Wani Odita Jenerol.

Long sem taim tu Praim Minista i katim foapela dipatment na mekim ol i kamap olsem ol opis we ol dairekta bai i go pas long ol.

Em i makim tu, foapela man husat bai lukautim dispela ol opis. Ol lain ya em long, Dr Wari Iamo, Envaromen na Consevesen, Bill Dihm Bogenvil Afeas, Larry Hulo NEC na Thomas Nen Nesenel Fores Atoriti.

Mista Skate i tok olsem dispela ol senis i kamap long rait taim long wanem, wantaim dispela ol nupela lain husat i gat eksperiens long wok, PNG i ken redi long bungim ol samting bai kamap long yia 2000.

"Olsem Praim Minista bilong ol pipel mi no inap lukluk long pablik sevis bilong bipo. Mipela i mas muv, ol pipel bilong dispela kantri i les pinis long westim mani long wanpela pablik sevis we i no save senis," em i tok.

EM i tok tu gavman i bin makim dispela ol lain long wanem ol i gat save na tu

ol i gat bikpela interes olsem kantri i mas go het.

Tasol. Mista Skate i tok olsem, dispela ol nupela lain bai i nogat wanpela isipela holid long wanem, ol i gat tripela mun long soim olsem ol ken mekim dispela ol wok, nogat bai ol i raus.

Planti bilong dispela ol lain i gat save long wok pablik sevis bikos ol i bin wok planti yia long gavman na tu long praivet sekta.

Mista Skate i tokaut tu olsem planti bilong ol lain i makim PNG long ol ovasis kantri tu bai kam bek long kantri.

Ol nupela dipatmen het:

Peter Tsiamaili Foren Afeas, Michael Mawe Tred na Industri, Sao Labi Atoni Jenerol, Utula Samana Pesenel Menesmen, Ted Sitapai Agrikalsa, Ken Serupi CIS, Joseph Gabut Petroleum na Eneji, Henry Veratau Trensport, Odita Jenerol Mark Wani, Envaromen Dr Wari Iamo, Bogenvil Afeas Bill Dihm, NEC Larry Hulo na Nesenel Fores Atori Thomas Nen.

Skate gavman laik helpim tu ol sios vokesenel skul

PRAIM Minista Bill Skate i laikim bai olgeta vokesenel skul bilong misin tu i mas kisim helpim bilong gavman, wankain olsem ol gavman vokesenel skul.

Mista Skate i tok em i abrus tru long luksave long bikpela wok ol sios i mekim long kamapim ol vokesenel skul olsem we i helpim na sapotim planti papamama na ol pikinini bilong ol moa long ol gavman skul. Em i kolim ol skul olsem Don Bosco Vokesenel Sk.I bilong ol boi na Caritas Trening skul bilong ol meri long Mosbi na arapela moa insait long kantri.

Praim Minista i askim Minista bilong Edukesen, Mukl Taranupl long mekim ol lain bilong em long Edukesen Dipatmen i mas lukluk long olgeta sios Vokesenel trening senta na givim ol wankain skul fi subsidi olsem ol Nesenel Gavman Vokesenel skul i kisim.

Mista Skate i tok em i laikim bai dipatmen bilong Edukesen i mas glasim na stretim dispela disisen na Minista i mas tokaut long kabinet we ol i ken skelim na stretim.

Edukesen em bikpela plen bilong gavman na Vokesenel Trening em bikpela samting wankain olsem Hai Skul trening. Tasol namba bilong ol pikinini husat i save go moa long ol hai skul i no save bikpela tumas.

Mi amamas long planti skul na provins long oraitim tingting bilong gavman bilong mi long dispela yia na oraitim ol papamama long baim hap hap skul fi, wankain olsem ol papamama long planti hap bilong wol we ol i save baim skul fi, Mista Skate i tok.

Ol skul na Bod ov Menesmen i mas wok gut olsem mipela. Na ol i no ken tok strong long ol papamama long baim skul fi ful bikos dispela i no gutpela tru long ol papamama.



TORO
TORO GO LUKIM OL MASOLMAN SO-OFF LONG GODENS MAKET...

OL MERI LUKIM OL MASOLMAN LONG OL NA INDAI TRU LONG OL... TORO JELES NA EM BELHAT...

AHH! OL I TING OL I GAT MASOL MI TU I GAT!!

EM RAUSIM T-SIOT BILONG EM NA KALAP IGO ANTAP NA SOIM BUN MASOL BILONG EM LONG OL MERI...

NAU WANPELA MASOLMAN I KROS LONG TORO LONG BAGARAPIM SO BILONG OL NA APIM TORO OLSEM HAP PALANG...

...NA WIL-WILIM EM IGO DACU...

OLGETA BUN BILONG TORO PAIA...

...NA WIL-WILIM EM IGO DACU...

...NA WIL-WILIM EM IGO DACU...

...NA WIL-WILIM EM IGO DACU...

Bogenvil Kopa Faundesen sponsarim tupela Bogenvil sumatin bilong skul long Australia

TUPELA meri sumatin bilong Bogenvil i winim skolasip bilong skul long Darwin insait long Noten Teritori, Australia.

Geraldine Bana Koiri husat i gat 13 krismas na i kam long Buin insait long saut Bogenvil na Fiona Harepa wantaim 19 krismas bai i go skul long Kommilda Kolis long go hetimsekonderi skul.

Geraldine bai i wokim Gret 8 na Fiona Gret 9.

Bogenvil Kopa Faundesen (BCF) bai i peim olgeta skul fi bilong ol, ol buk na ol samting bilong yusim long rait, rit long en long skul, kaikai, ples bilong slip long en na balus tiket bilong tupela. Faudesen bai tromoi K20,000 long peim skul bilong tupela meri.

Manesa bilong Riotinto Minerals long Mosbi, Paul Coleman i tok dispela em nambawan taim bilong BCF long sponsarim sumatin bilong Bogenvil i go skul long Australia insait long taim bilong hevi.

Tasol em i tok Faundesen na CRA, bikpela maining kampani bilong Australia na papa bilong Panguna kopa main i no stop long sponsarim ol sumatin i go long ol bikpela skul insait long kantri yet. Dispela em long tripela yunivesiti long kantri we i karamapim Yunivesiti ov Teknoloji long Lae, Goroka na UPNG long Mosbi na tu long ol hai skul na nesanel hai.

Em i tok long las yia ol i bin sponsarim 20 sumatin i go long ol bikpela skul long PNG yet.

Mista Coleman i tok antap long baim skul bilong ol sumatin, BCF na CRA i wok long givim ol arapela

helpim i go long Bogenvil.

Ol i sponsarim wanpela NGO grup ol i kolim long Faundesen for Peace na Oda Melanesia long ranim ol Konflik resoluten kos long Bogenvil, givim ol tu wanpela ka long yusim long Buka, givim wanpela ambalens bilong RTed Kros long yusim long Arawa, peim rot bilong Siamese twins bilong Buka i go i kam long Australia na givim saplai bilong ol marasin na klos long ol pipel bilong Bogenvil.

Mista Coleman i tok ol i skelim gutpela akademik wok bilong tupela sumatin na sponsarim ol.

Em i gat bikpela bilip olsem tupela bai i wokim gut long dispela skul we i tok ol manki bilong planti hap long wol i save skul long en na em i gat gutpela rekot long sait bilong akademik asivmen, spots na ol arapela samting moa.

Peter Leahy, Koporet manesa bilong Riotinto i tok antap long tupela i skruim edukesen bilong ol, kampani i bilip stron olsem stap na skul bilong ol long Australia bai i skruim tu ol arapela skills bilong ol long sait bilong humen developmen na tu long kalsa.

Mista Coleman i tok kampani i laikim tupela sumatin i kisim gutpela save na taim ol i kam bek long PNG ol bai i yusim long helpim ol yet na kantri.

Kampani i givim sponsa long wanpela yia na sapos tupela i wokim gut, ol bai i rinuwim sponsasip long neks yia.

Fiona na Geraldine i tok ol i amamas, sori na pret wantaim long lusim ol papamama na ol poroman na go long nupela tasol dispela em kain pilings we i save

long olgeta manmeri na pikinini taim ol i lusim ples long nambawan taim.

Long wankain taim tu, Fiona i tok em i amamas long BCF i peim skul bilong em bikos em i rausim sampela hevi long mama bilong em long sait bilong mani. Fiona em i namba tu pikinini na em i gat wanpela susa na tupela brata. Papa bilong em i dai pinis. Em i bin wokim gut long Gret 8 long Arawa Hai skul na kisim daks prais long las yia. Nau em bai i wokim Gret 9 long Darwin.

Geraldine i bin wokim Gret 7 long Bavaro ko praimer skul insait long Nesanel Kapitel Distrik.

Josephine, mama bilong Fiona i amamas long pikinini bilong em i winim skolasip na em i tok Fiona i laki tru long kisim dispela sans long go hetim skul bikos planti pikinini long Bogenvil i no stap long skul yet taim sindaun i no orait gut yet.

Stat long 1990 inap long 1995, Fiona i no bin skul bikos long hevi long Bogenvil. Em na famili bilong em i bin stap hait long bus long Sentrel Bogenvil na tu olgeta sevis olsem helt na edukesen i stap pas. Tasol lolong Mosbi na wokim Gret 6. Taim sindaun i go nogut long Bogenvil long 1990, Fiona i bin stap long Gret 6 long Arawa. Olsem planti ol pikinini long Bogenvil em i bin lusim planti krismas wantaim nogat skul tasol em i laki nau long kisim sans long go hetim skul bilong em.

Geraldine i bin lusim Mosbi bilong go long Australia long aste tasol Fiona bai i stretim ol visa na medikol sek bipo em i go long neks wik, Mista Coleman i tok.

Bogenvil Ripot wantaim VERONICA HATUTASI



• L-R: Fiona Harepa na Geraldine Bana-Koiri long fran bilong CRA opis long Mosbi.

Ol trus i helpim long strongim gutpela sindaun long Bogenvil

STAP na wok bilong ol truslain long Bogenvil i wok long helpim strong kamapim gutpela sindaun long Bogenvil.

Ol truslain em ol soldia wantaim ol man nating bilong Nu Silan, Australia, Fiji na Vanuatu husat i stap nau long Bogenvil bilong helpim ol pipel i kisim gutpela sindaun. Na long lukim olsem ol agrimen ol Bogenvil lida i wokim long Burnham Nu Silan na Kens Australia insait long ol bung bilong ol i karim kaikai na i no mauswara nating.

Stat yet long mun Disemba taim grup bilong trus i kamap long Bogenvil, sindaun long olgeta hap bilong ailan i go gut tasol. I nogat meknais i kamap namel long ol lain we i save birua na pait pastaim. Dispela em long ol lain BRA, resistens na sekyuriti fos. Nau ol pipel i amamas raun long rot, ol mama, papa na pikinini i ken go wokim gaden na ol lain tu long ol kea senta i wok long go long ol liklik ples long klinim hap long sanapim gen ol haus na tu long wokim gaden.

I gat samting olsem 260 man na meri wantaim insait long trus monitering grup (TMG). Hetkota bilong ol i stap long Arawa. Ol i brukim namba bilong oil manmeri na insait long foapela eria long ailan, ol i putim 20 TMG memba long en. Dispela em long Buka, Arawa, Buin na Siwai.

Pasin bilong ol TMG lain we ol i no helpim wanpela sait, ol i poromanim na toktok long olgeta lain maski ol i BRA, resisten, sekyuriti fos, ol sief na ol man nating i mekim na ol pipel long Bogenvil i amamas long wok ol i mekim. Bikos long stap na wok bilong ol, nau i nogat gan i pairap na nogat man i raun wantaim gan long ples o taim ol i raun.

Long olgeta hap, ol man i laikim tru gutpela sindaun i kamap nau bikos ol i les pinis long stap insait long sindaun nogut long 10-pela krismas pinis.

Long nau, ol BRA, resistens na sekyuriti fos i wok bung na strong long kamapim gutpela sindaun.

Bikos long planti pasin nogut long kilim dai narapela i bin kamap insait long taim bilong hevi, em bai i hat long lus tingting, maski ol bel isi seremoni i wok long kamap. Tasol ol dispela seremoni tu i wok long daunim ol bel kros na planti famili, grup, ol BRA na resistens husat i bin stap insait long disepla kain hevi i wok long sekan long traim painim belgut.

Long wok bilong ol olsem ol lain i was long trus o piriet we nogat pait na trabel i kamap, ol TMG i kamap ol gutpela poroman wantaim ol BRA, resistens, ol pipel insait long ol ples na komyuniti.

Ol i wok long go insait long ol ples na stap lukluk na kisim ripot long ol seremoni bilong kamapim pis, sekan na bel

isi pasin. Long lukluk bilong ol, ol i glasim olsem ol man i stap insait long ol seremoni i wokim ol samting long lewa bilong ol na ol i minim tru olsem gutpela sindaun i mas kamap.

Komanda bilong TMG long Siwai, Leftenen Kenel James Thomson i bilip strong olsem ol pipel i laikim tru gutpela sindaun.

"Ol pipel i singaut kra i long gutpela sindaun. Long olgeta hap mipela i go long en, ol i autim dispela toktok. Mipela i sambai tasol long givim helpim sapos mipela inap.

"Mipela i bilip strong olsem ol pipel yet inap kamapim gutpela sindaun long laik, save, pasin, rot na taim bilong ol.

"Gutpela sindaun i ken kamap hariap tasol bai i kisim longpela taim long lus tingting olgeta long ol hevi na samting nogut we ol man i wokim long wanpela arapela," Kenel Thomson i tok.

Taim Kenel Thomson i lukim bikpela laik bilong ol pipel na bikpela laik bilong ol long gat gutpela sindaun, em lukim tu olsem i gat bikpela nid long singaut, laik na kra i bilong ol pipel i go long ol lida husat i go pas long ol toktok bilong bringim gutpela sindaun long Bogenvil.

"Mipela i les pinis long pait na mipela i laikim pai long pinis na gutpela sindaun i kamap.

"Ol pipel i laikim ol lida i harim na kisim toktok bilong ol na kamap wantaim ol gutpela samting we bai i pinisim pait.

Kenel Thomson i tok taim gutpela sindaun i eok long kamap, i gat bikpela nid long painim sampela kain wok long ol yangpela mna we bai i helpim skruim gutpela tingting bilong ol na kamap ol gutpela man long komyuniti na kantri. Tu kirapim ol liklik projek we bai ol i pulim mani long em. Dispela em ol projek olsem lukautim kakaruk, wokim ol kumu na pinat gaden na salim, wokim ol henkraf, basket samting na ol arapela samting moa olsem.

Olsem tingting na toktok long planti pipel long Siwai em i tok ol atoriti i mas givim wok long ol yangpela nogut ol i stap nating na go bek gen long pasin bilong pait na wokim trabel.

TMG grup we i wok long Buka na Atols distrik i lukim olsem singaut na kra i long gutpela sindaun em i samting we ol pipel long tupela distrik i laikim tru tu.

"Inap long pait. Ol pipel i laikim gutpela sindaun. Ol i laikim strong helt, edukesen na ol arapela sevis," Kepten Ben Green long Buka TMG opis i tok.

Em i tok ol lain TMG long Buka i wokim gutpela pren wantaim ol sekyuriti fos, BTG lain. ol BRA na resistens komanda, ol sief na ol man bilong ples.

Rot bilong i go i kam long bikailan Bogenvil i hat tru

TRENSPOT na komyunikesen em tupela bikpela hevi long Bogenvil long dispela taim.

Nau em i hat tru long lusim Buka na painim rot i go long bikailan Bogenvil na tu long kam bek long Buka gen long bikailan.

Moa yet long ol pipel bilong Sentrel, Saut na ol arapela hap insait long bikailan Bogenvil.

Bipo hevi i kamap long ailan, provins i bin gat gutpela rot i go i kam long provins na i bin gat balus we i bin mekim wokabaut i go i kam long ailan isi.

Tasol nau, provins i stap olsem 30 krismas bhain long ol narapela hap bilong kantri long hevi bilong tupela samting ya.

Ol liklik balus i no save raun long bikailan. Air Niugini na ol liklik balus i save pondaun tasol long Buka na go bek long Rabaul, Kimbe o wanem hap moa. Olsem ol pipel long bikailan i kisim taim tru long wetim tupela tripela wik long painim rot i go i kam long Buka na saut, sentrel na weskos Bogenvil.

Bikos long dispela hevi, ol pipel bilong Buin, Siwai, Kieta, Nagovis na Torokina i wok long yusim ol motobot (dingi) long i go i kam long Buka.

Long Buka i go long Siwai i save kisim namel long

8 na 10-pela awa olgeta. Long gutpela taim, nogat samting tasol taim solwara i nogut ol motobot i no save ron. Sampela we i strong na go em ol i putim laip bilong ol long denja. Tu long motobot i nogat hap long hait long san na ren long en na planti mama na pikinini i wari long dispela bikos long longpela rot na nogat ples bilong hait.

Ol sip i save go wanwan taim long bikailan taim ol bisnis man i satarim long karim ol kago bilong ol.

Nau yet, ol lain bilong trus monitering grup (TMG) i sekim rot long Buin i kam olsem long Siwai, Nagovis na Arawa. Na long Arawa i go long Wakunai, Tinputz na Buka.

Enjiniering yunit bilong TMG i wokim dispela wok long asesim rot. Ol i ron long ol lendrova bilong ol bihainim rot long Arawa i kam olsem long Buin, raunim long Siwai na i go bek long Arawa.

Bikos em i hat long sait bilong trenspot, sampra ka bilong ol Siwai, Nagovis na Kieta pipel i wok long bihainim haiwe rot i go long Buka, maski rot i bagarap long sampela hap, tait i karim sampela ol bris na sampela bris klostu i pindaun. Long sampela ha ol man i save putim tasol ol hap timba long ka i ron antap long en taim ol pasindia i kam daun.



Is Sepik pipel laikim wanpela konsumas afeas kaunsel opis

ADDY LAVAKZ i raitim

BIKPELA toktok nau i wok long kamap long maus bilong planti ol pipel long Wewak taun insait long Is Sepik long prais bilong ol kaikai long ol stua na maket insait long provins.

Ol pipel i tok olsem long liklik taim long taim bilong san i hat prais long stua na long maket bilong ol kaikai i wok long surik i go antap.

Ol bikpela ol supamaketa stoa na ol honsel olsem Tang Mow, Garamut, George Seeto na tu ol arapela bikpela stoa long provins i wok long surikim ol prais i go antap long ol samting bilong ol long stua.

Maket tu i wankain. Ol mama i wok long sasim ol gaden kaikai bilong ol olsem kaukau banana na taro long 30t na 40t long wanpela na tripela ol foapela long K1.00. Ol rop banana em prais i stap long K3.00 na i go antap.

Jim husat i save wok wantaim Kuimbu Tama auto pats olsem wanpela penol bita i tok olsem Wewak taun i mas i gat wanpela konsumas afeas kaunsel opis long Wewak taun long lukluk long hevi na wari bilong ol.

Opis ya mas stap long lukluk long ol wari bilong ol pipel long ol prais bilong ol kaikai long stua na maket long skelim na stretim ol prais long gutpela na wanbel pasin namel long mipela ol pipel yet na ol bisnis lain na tu ol mama long maket, em i tok.

Olgeta arapela provins

long PNG i gat ol Konsumas Afeas Kaunsel opis na mipela ol pipel long Wewak i wok long harim ol edvetaisem bilong dispela kaunsel na wok bilong en, na mipela i laikim tru long provins bilong mipela i mas i gat wanpela kain opis olsem bai, orait olgeta em i tok.

Mista Boltoku i tokim wantok olsem ol liklik wokmanmeri olsem em i no save kisim bikpela moni tumas long wok bilong ol, na sapos long fotnait ol go insait long stua na i laik kam ausait man nogat wanpela toea bai stap bek.

Hatwok bilong yu long tupela wik ya yu long spendim tasol long Fraide apinun long kaikai bilong stua, em i tok.

Sarere moning yu go painim kumu long taun maket em olgeta toea bai pinis long hap. Sande yu bai stap drai na Mande go bek gen long tuhat long tupela wik gen, em i tok.

Gavana Mista Michael Somare i mas bringim dispela wari bilong mipela ol grasruts pipol bilong Is Sepik provins na Wewak taun i go long gavman long lukluk na putim kamap wanpela Konsumas Afeas Kaunsel opis long Wewak taun long lukluk long ol wari bilong mipela ol liklik manmeri bilong provins em i tok.

Long dispela as bai ol bikpela bisnis haus bilong salim kaikai bai i no inap long giamanim mipela ol liklik manmeri na stiaim nating moni bilong mipela Mista Boltoku i tokim Wantok Niuspepa.

Gavana Jenerel amamas long gutpela toktok bilong Bogenvil

GAVANA Jenerel Silas Atopare long wanpela toktok em i mekim i go long nesen long dispela wik i tok amamas long ol nesenel gavman lida, ol lida bilong Bogenvil, mausman i makim Yunaitet Nesens, ol arapela lida long Saut Pasifik na Nu Silan long gutpela toktok i bin kamap bilong bringim bek gutpela sindaun long Bogenvil.

Em long Praim Minista Bill Skate, lida bilong oposisen Bernard Narokobi, na ol lida bilong BRA/BIG, BTG na ol arapela bikman husat i bin stap long dispela bung long Lincoln Yunivesiti. Kraissios, Nu Silan.

Mista Atopare i bilip olsem ol toktok we ol i wanbel long ol na pasim bai i go daun long histri bilong kantri olsem rot long pinisim hevi we planti brata na susa i bin karim pen na dai long en insait long 10-pela yia long Bogenvil.

Em i strongim kantri long pre strong long ol gutpela toktok we ol lida i bin kamap wantaim i ken karim kaikai na tu long Bikman i stiaim gut tingting bilong ol lida long mekim ol stretpela disisen.

Mista Atopare i tok nau yumi i mas wok olsem wanpela pipel praut long kantri bilong yumi tasol long wanlain taim tu, harim na lainim ol gutpela toktok, bihainim gutpela kristen pasin na putim intres bilong kantri pastaim long ol arapela.

"Yumi i noken giamanim yumi yet. Yumi gat ol planti kain pasin kastam na yumi i kam long maunten na ailan. Planti taim dispela i kamapim hevi na

sampela taim yumi no pilim olsem yumi wanpela pipel. Tasol taim ol wok go het i kamapim gutpela rot bilong kisim na salim ol toktok (komyunikesen) na ol gutpela rot i kama long mekim isi wok-abaut (trensport) long wanpela ples i go long narapela, ol pikinini na bubu bilong yumi husat i kam long bihain taim bai i skelim ol samting na klia watpo long dispela taim ol samting i bin kamap olsem," Mista Atopare i tok.

Em i tok long tude, yumi gat bikpela wok long mekim bilong stretim hevi long dispela pasin we yumi i tok yumi wanwan i bilong Hailans, Papua, Buka, Tolai na wanem liklik ples na rijon yumi i kam long en.

Yumi i mas stretim dspela rijinalisim we long bipo yet i kamapim hevi.

"Sapos yumi ken stretim dispela hevi long Bogenvil, em bai i soim olsem yumi inap long stretim ol arapela liklik hevi olsem pasin rijinalisim we yumi gat," Gavana Jenerel i tok.

Em i tok pasin we tupela sait long Bogenvil i mekim long wanbel long na wok bung long kamapim em long go hetim strong wok. bilong painim gutpela sindaun long ailan. Tupela sait i luksave long ol hevi na ol i wanbel long stapim pasin bilong kilim narapela man na ol hevi we ol meri, pikinini na ol man i bungim long longpela taim.

"Tasol yumi gat planti wok yet long mekim long rausim

as bilong dispela trabel we i kamapim hevi long Bogenvil," Mista Atopare i tok.

Em i tok bipo long hevi, Panguna Kopa main i pulim bikpela mani na divelopmen long kantri. Planti pipel i bin kisim trening na wok wantaim kopa main ya. Na nem bilong PNG j kamap long wol. Inap long hevi i kamap na kopa main i pas, em i save kamapim planti milien kina long kantri, gavman i save kisim bikpela mani long kampani koporet takis na ol arapela takis moana tu ol sea holda i save kisim dividen pe long sea bilong ol. Nau kopa main i pas. Na planti pipel i dai long hevi long Bogenvil we ol pait kros long dispela main i statim. Kantri i lusim bikpela mani taim main i stap pas. Long wankain tu planti laip na propeti i lus. Ailan i bagarap.

"Nau em i taim yumi i lainim samting long asua bilong yumi. Moabeta yumi luksave long ol mistek na traim stretim ol. Praut histri bilong yumi wantaim ol bikpela maining projek olsem Panguna na ol arapela we i stap op nau olsem Kutubu, Ok Tedi, Porgera, na Lihir i soim olsem wantaim gutpela stia tingting na plening yumi ken kamap olsem biknem lida long wol," Gavana Jenerel i tok.

Komyunikesen sistem long Angoram daun long tupela mun nau

ADDY LAVAKZ i raitim

OL pipel bilong Angoram distrik long Is Sepik provins i autim nau bikpela wari bilong ol i go aut long gavman bilong provins na Telikom Netwok long stretim kwik komyunikesen sistem bilong ol we no bin wok inap long tupela mun olgeta.

Memba bilong Angoram Mista Ludwig Shultz tu i kirap nogut long painimaut olsem komyunikesen sistem long llektoret bilong em i bin aut long tupela mun olgeta.

Dispela i no gutpela tumas long kamapim gut ol sevis long Angoram long wanem telepon na ol arapela sistem bilong kisim ol sevis hariap long sait bilong emejensi i daun, em i tok.

Ol bisnis manmeri na ol pipel husat i save yusim ol telepon na fax masin long wokim kwik na isi ol wok bilong ol na tu yusim long taim bilong emejensi i painim hat taim stret.

Toktok bilong ol pipel bilong Angoram long las yia long mun Desemba long Telikom opis long Wewak long wokim wanpela samting long dispela hevi i go wara nating.

Telikom i mas salim kwik wanpela tim bilong ol wokman i mas go long Angoram na sekim dispela hevi na stretim kwik.

Planti ol bisnis lain husat i save yusim ol dispela sevis i wok long kam daun long Wewak long yusim ol dispela sevis long wokim ol wok bilong ol, dispela i mekim ol i spendim mani long kam daun na go antap bek long Angoram.

Dispela ol sevis gavman i givim. Na sapos sevis i no kamap gut o i bagarap gavman i mas harim krai bilong ol pipel bilong Angoram. Tasol nogat samting i kamap long en, em i tok.

Lokal kampani bai putim kolta namel long Mendi na lalibu rot

WANPELA lokal kampani, Global Konstraksin Pty Ltd i bin winim wanpela kontrak long putim kolta long hap rot insait long Hailans Haiwe.

Dispela kampani bai putim kolta insait long 10-kilomita rot stat long Mendi i go long lalibu long Sauten Hailans provins. Kos bilong dispela bikpela wok em klostu samting olsem K3.7 milien.

Dispela kontrak em AusAID i givim moni long helpim em nambawan wok bilong dispela lokal kampani, bihain long em i bin winim planti ol narapela kontrak long mekim wok insait long Westen Hailans provins long las yia.

AusAID i givim moni long halivim na putim kolta long 50-kilomita rot long haiwe bilong Mendi i go long lalibu rot-bung we kos bilong em inap long K50 milien olgeta.

Global Konstraksin nau em wanpela bikpela kampani bilong wokim rot na putim kolta insait long hailans na em bai gohet long mekim ol bikpela wok insait long dispela rijon. Em i laik mekim tu bai moni i ken stap long rijon na karimaut wok long ol narapela ekonomik divelopment.



• Menesing dairekta bilong Global Konstraksin, Francis Awesa i sainim pepa bilong wok wantaim menesa bilong Works long Mendi, Major Steve Noble.

Olkain save i hait insait long yu yet

TISA i askim wanpela boi bilong klas wan: "Husat i wokim yu?"

Boi ya i bekim tok olsem: "God i bin wokim wanpela hap bilong mi."

"Wanpela hap bilong yu tasol?" tisa i askim. "Yu min wanem?"

Boi i bekim tok olsem: "God i bin wokim mi long taim mi kamap liklik bebi. Tasol bihain na inap nau, mi yet mi bin groim mi."

Yumi olgeta wan wan i olsem tasol. Long taim yumi kamap olsem liklik bebi, God i bin putim insait long yumi planti kain save, tasol em i wok bilong yumi wan wan long yusim dispela save na mekim em i gro. Nogut em i slip nating i stap.

Nabaut insait long PNG yumi inap lukim olsem wanem ol wan kantri bilong yumi i yusim gut save bilong ol, na i mekim gupela wok long ol samting i gro nabaut long yumi. Yumi save yusim skin bilong limbum bilong wokim plua bilong haus, na wokim baket long lim bilong em. Yumi save wokim morota long ol lip saksak, na banis bilong haus long pangal bilong saksak. Yumi save dringim wara bilong drai, na kaikai kopra bilong en, na kukim ol sel kokonas long paia. Long planti ples yumi save wokim rup bilong haus long kunai.


Yumi inap lukim save i stap insait long het bilong ol liklik boi, sapos yumi lukim olsem wanem na ol save wokim liklik ka i gat tupela wil na ol inap stiaim long longpela stik. Ol i save wokim ol wil bilong dispela ka long olkain samting... long tuptup bilong ol botol, long tin bilong Koka Kola, long olkain gia na liklik wil ol i painim long woksap. Long Bogenvil mi lukim ol mangi i wokim wil bilong ka bilong ol long tupela muli tasol. Ol dispela i soim kain kain save i stap insait long het bilong ol manki, na wan wan i yusim long laik na tingting bilong em yet.

Yumi olgeta i gat planti kain save i hait insait long kru bilong yumi. Na God i laik yumi mas yusim em. Yumi no mas wet bai gavman i mekim olkain wok bilong helpim yumi. Nogut. Yumi yet i mas helpim yumi.

Na tu, ating yumi inap yusim gupela save bilong yumi long taim yumi laik paulim ol raskol. Ol i save brukim haus bilong yumi na stilim olkain samting.

Sapos yumi laik stapim ol, ol inap

TU MINIT TINGTING



FRANK MIHALIC i raitim

sutim yumi. Yumi no inap pait wantaim ol. Ol raskol i klewa; tasol yu mas moa klewa long ol. Ol i no ken kros long dispela.

Mi givim wanpela eksampel nau. Sapos yu stap long ples, yu inap yusim pasin bilong ol Indonesia bilong paulim ol raskol. Ol i gat wanpela klewa we bilong lukautim gut haus bilong ol. Long sampela ples wan wan haus i gat moran insait long haus. Yu inap lukim em i hangamap long ol sut na pos bilong haus. Em i save kaikai ol rat na i no save mekim nogut long man. Ating sapos wanpela raskol i lukim wanpela moran i stap long aus bilong yu, yu no mas lokim dua. Em bai ranawe na brukim bus i go. Em nau: em i wanpela we bilong larim gupela save bilong yu i winim save nogut bilong raskol.

Em hia wanpela eksampel moa. Yumi krai long gavman i mas givim wok long yumi. Watpo yumi yet i no statim sampela wok? M lukim long Wes Nu Briten na Is Sepik na Manus we planti tausen drai i slip nating long graun na i wok long sting. Watpo yumi no ken wokim kopra long ol? Watpo ol Filipino na ol Vietnam tasol i save wokim olkain bilas long sel kokonas? Na ol i kisim gupela pe long en. Yumi tu inap mekim wankain sapos yumi laik, sapos yumi kirap long beksait na yusim gut dispela save God i bin putim insait long kru bilong yumi wan wan.

Yes, God i bin wokim yumi. Tasol yumi yet i mas developim yumi.

Ol Bogenvil holim strong bilip long 10-pela yia

VERONICA HATUTASI i raitim

Insait long 10-pela yia hevi bilong Bogenvil, ol pipel i holim strong bilip bilong ol. Ol i go long lotu na God i helpim ol na bringim bel isi long taim sindaun i go nogut.

Nau taim sindaun i wok long kamap orait, long sait bilong lotu tu ol pipel i kamap strong moa yet.

Long Krismas, ol kwaia grup insait long Siwai i save go long ol wan wan ples na singim ol krismas karol, o ol krisas singsing lotu. Samting olsem foa o faiv singsing grup i save raun i go long wan wan ples na singsing.

1997 Krismas em i namba wan taim tu insait long 10-pela yia hevi we i bin gat bikpela misa long biknait. Bikpela haus lotu i bin pulap tru na ol Kristen manmeri i bin selebretim gut 1997 Krismas nait na long de tu.

Planti ol sios ektiviti i kamap nau na peris kaunsel i wok strong long go het gut long mekim wok bilong sios long Siwai distrik.



• Tupela mama i redi long go long Krismas de misa lotu long Monoitu Katolik misin stesen, Siwai long Saut Wes Bogenvil. (L-R): Helen Ra'ari na Theresa Hitama. Foto: VERONICA HATUTASI

Castro tok bilas long Pop John Paul II

Predisen bilong Kuba, Fidel Castro i lap long ol lain i ting wokabout bilong papa santu Pop John Paul II bai stapim komunis gavman bilong em. Mista Castro i mekim dispela fani toktok bilong daunim ol lain i gat dispela tingting bihain long Pop John Paul II i pinisim faivpela de lukluk raun long Kuba.

"I gat sampela ol i driman long wanem samting bai kamap long las de olsem God."

Mista Castro i tok taim em i tok gudbai long Pop John Paul II. "Tasol dispela bai i no tru. Kuba

i no save long pret na les tru long giaman pasin. Em i save putim ia wantaim rispek pasin tasol em i gat bilip long ol aidia bilong em yet. Em i save lukautim gut tru ol bilip bilong en, na i nogat wanpela samting long haitim long wol."

Pop John Paul II i pinisim lukluk raun bilong em long Kuba na i mekim strongpela tok bilong daunim pasin bilong stapim wok bisnis wantaim ol arapela kantri, ron bilong ol sip i go insait na i go ausait long Kuba, na ol arapela wok bisnis long Kuba wantaim ol arapela kantri. Em i tok kain

pasin olsem i save bagarapim sindaun bilong ol liklik grasrut pipel.

Dispela kain pasin i stap long Kuba inap long 35 yia olgeta. Na Pop John Paul II i tok dispela pasin i mekim laip bilong ol lain i painim hat long stap laip i go moa hat tru long painim kaikai, marasin na skul. Long las Misa bilong Pop, em i daunim tru komunis gavman na sistem bilong ol bisnis manmeri mekim moa mani na lus tingting long ol grasrut manmeri. Long tok Inglis em ol i save kolim kain pasin ol communism na capitalism.

ELC-Hagen amamas long nupela Het Bisop

WENCESLAUS MAGUN i raitim

Presiden bilong Evanjelikal Lutheran Sios bilong Hagen Distrik (ELCH), Rev Zau Rapa i salim bikpela tok amamas na tenkyu i go long nupela Het Bisop bilong ELCPNG, Rev. Dokta Wesley Kigasung.

"Driman bilong Hagen Distrik long senisim Het Bisop nau i kamap tru. Mipel abai i stap amamas wantaim bel isi na redi long wok wantaim nupela Het Bisop long stretim na strongim gupela wok sios long dispela provins na kantri i mekim," Rev Rapa i tok.

Em i tok ol i bilip long nupela Het Bisop. "Em i fit man long

luksave long wanem hevi i bin daunim wok bilong sios i stap. Na tu wanem progrem bilong sios i stap tude bilong strongim wok gutnius insait long ELCPNG i sut long mak bilong bilip na stretpela pasin insait long Lutheran Sios."

Rev Rapa i askim tu ol 14-pela Distrik presiden/bisop long wok poroman wantaim nupela Het Bisop wantaim wanbel na pasim tok bilong bringim ELCPNG i go long gupela rot.

"Mi bilip long ELCPNG i kirap gen wantaim nupela tingting na senis wantaim progrem bilong sios. Long wanem, planti nupela lida olsem Presiden/Bisop i kamap na i poroman wantaim nupela Het Bisop long stretim ol hevi i stap

pinis. Na tu long bung wantaim na lukluk long bringim ELCPNG i go long yia 2000 long bungim Namba 22 Nesene Sinot. Dispela sinot bai kamap long Jiwaka Distrik, Westen Hailens Provins," Rev Rapa i tok.

Em i askim olgeta Kristen lain long beten long God Papa i givim gupela stia wantaim blesing bilong Em long nupela Bisop wantaim namba tu bisop Rev Kiage Motoro long nupela wok tupeal i kisim.

"Na yumi ol lida bilong Distrik i mas givim sapat long wok wantaim tupela long helpim ol manmeri bilong dispela kantri long spirit na laip na sindaun bilong ol," Rev Rapa i tok.

Mosbi Katolik yut statim evanjelism progrem

...Ol Popondeta Katolik laikim helpim

EDDIE SAUNDERS i raitim

Ol Katolik yut long Mosbi Asdaiosis statim evanjelaisesen progrem bilong dispela yia. Dispela wik ol i holim bikpela bung bilong ol Katolik yut na peris. Planti ol yut na ol lida i bung.

Na long Popondeta, ol Katolik yut na ol peris lida insait long taun i holim namba wan jenerel miting bilong dispela yia 1998. Sem taim ol i holim skul bilong redi long holi spirit i go insait long yia 2000. Dispela miting na skul i stat long Trinde Januari 28, 1998 na pinis long Fraide.

Insait long dispela kibung ol yut i plenim progrem bilong dispela yia. Na tu ol i lukluk i go het long progrem bai karim i go insait long nupela sensari. Ol Katolik long Popondeta i bihainim

tingting bilong mama Katolik sios i wok long mekim long olgeta hap bilong wol.

Ol i redim ol bilip manmeri long mekim Jubili yia bilong tok bilong God, em Jisas Kraus. Sista Ehme Naniabi, Kodineta bilong Katolik Yut insait long Mosbi Asdaiosis i karim aut dispela miting. Em i tok ol peris kaunsel, na ol Katolik long Popondeta i laikim planti ol kain skul i go long ol. Bikos ol i nogat pater na ol le manmeri yet i save holim pasin bilip bilong ol.

Wanpela peris kaunsela i tokim Wantok long Popondeta we i nogat pater i gat bikpela salens long bilip bilong ol Katolik manmeri. Long dispela as ol lain long Popondeta i askim ol Katolik autris lain long go long Popondeta na strongim bilip bilong ol.

Madang Gavman kamapim plen bilong mekim gut wok long provins

BEN TAUMAI i raitim

Madang Gavman aninit long lukaut bilong Gavana Jim Kas i kamapim ol plen bilong skelim gut ol wokman bilong gavman long wok insait long ol ples insait long provins. Dispela plen i kamap bilong karim aut gut wok bilong gavman polisi na helpim ol lain long ples.

Siaman bilong Fainens na Plening na memba bilong Midel Ramu, Assik Tommy Tomscoll i tok olsem long Mande Januari 26, taim em i opim provinsel plena rifesta woksop long Madang Loj.

"Mi bin tok kain toktok olsem bipo insait long wanpela toktok bilong mi long saplai bil olsem ol polisi na dairektiv na baset bilong Gavana Kas i sanap long wanpela tingting i gat stretpela misin bilong lukim ol wok bilong em i karim kaikai insait long gutpela netwok plen na wok karim aut," Mista Tomscoll i tok.

Em i tok dispela i min olsem ol masin i mas i gat rifom wantaim

ogenik lo. Sapos dispela i no stap rifom bai i no inap wok gut long provins. Long dispela as Madang Provinsel Gavman i laik sanap strong olsem wanpela provins i go pas insait long wok-sop olsem ol bai developim ol yet pastaim insait long skelim wan wan bilong ol yet long kamap gutpela wokman na bihain ol i ken mekim gutpela wok bilong Madang Provinsel Administresen.

"Sapos mipela i no senisim pasin bilong mipela yet, nogat wanpela arapela senis bai kamap," Mista Tomscoll i tok.

"Yumi mas mekim gutpela wok na wok bilong yumi i mas karim gutpela kaikai. Yumi mas go pas na painim ol hevi na wanem samting yumi no inap long mekim. Yumi mas sekim ol progrem, plen, projek na ol ektiviti long kamapim gutpela wok bai yumi ken kamapim gutpela sevis long provins bilong yumi."

Mista Tomscoll i tok tu olsem provinsel plening na monitering sistem bai senis taim ol i putim insait provinsel plening komiti.

Gavana Kas bai i go pas long dispela komiti olsem siaman na bai i gat tupeal sinia kabinet memba bilong Provinsel Eksekutiv Kaunsel (PEC) Gavana yet bai makim.

Narapela senis i kamap em provinsel risos menesmen na polisi kodinesen komiti. Dispela komiti bai ripot i go long provinsel plening komiti na i no moa long PEC.

Mista Tomscoll i tok dispela ol senis i bihainim ogenik lo na i kamap bikos long sampela ol hevi olsem:

. i mas i gat wanpela sistem na rot bilong karim aut ol wok bilong rifom;

. long was gut bai i gat gutpela plen na ol wok i kamap we inap stap oltaim;

. no bin gat gutpela plen na baset sistem bilong provins;

. nogat gutpela wok bung namel long ol ejensi bilong gavman.

Mista Tomscoll i tok gavman i bilip long bringim ol sevis i go long ol pipel insait long ol progrem na plen na maski long les na paul pasin.



• **Tupela pis kiping fos meri ami long Bogenvil wantaim wan wok bilong ol long baksait i was long allan Bogenvil bai nogat pait i kamap.**

Nogat senis bilong Het Masta bilong Luteran Gut Seped Hai Skul, Madang

Edukesen Edvaisa long Madang, Salbung Sei i tokim ol papamama long Luteran Gut Seped Hai Skul (LGSHS) olsem Tisa Sevis Komisen i tokim em long makim bek olpela Het Masta bilong LGSHS long dispela yia.

Em i tok dispela disisen i kamap bikos Tisa Sevis Komisen i painim aut olsem dispela Het Masta husat i bin kisim saspensen long las yia, taim em i no kisim wanpela sas wantaim wanpela hevi sampela lain i ting em i mekim.

Mista Sei i tok olsem taim em i tokim samting olsem 30 papamama na ol yut long skul graun husat i kamap long Fonde Januari 22, na askim long ekt-ing het masta, Mista Karim long kisim dispela wok olsem het masta inap ol i pinisim dispela wok painim aut.

Ol papamama i no wanbel long dis-

pela toktok ol i harim long Mista Sei na ol i mekim sampela pret toktok bilong bagarapim ol samting bilong skul na pasim skul.

Ol i pasin opis bilong skul na putim wanpela toksave olsem: "Opis bilong hai skul bai pas inap toktok bilong senis bilong hetmasta i kamap stret. Mipela ol asples i no wanbel long dispela senis."

Tasol Mista Sei i tok, edukesen i save bihainim sampela rot bilong mekim wok bilong en. Long dispela as em bai go het na makim bek olpela het masta. Namel long dispela taim wok bilong glasim dispela hevi ol asples i komplem long en bai go het. Na bihain long tripela wik samting sapos ol i painim sampela asua em bai tokaut long ol papamama long disisen bilong edukesen dipatmen.

Madang Gavman senisim ol dipatmen

Memba bilong Midel Ramu, na Siaman bilong Fainens na Plening long Madang Provinsel Gavman, Assik Tommy Tomscoll i tokim ol wokman bilong gavman insait long provinsel plena rifesta woksap long Madang long Mande Januari 26, olsem Madang Gavman bai senisim sampela ol brens.

As tingting bilong mekim dispela senis em bilong karim aut ol toktok i stap insait long rifom bilong bringim sevis i go long ol pipel insait long ol gutpela progrem.

Mista Tomscoll i tok, sampela bilong ol dispela senis em olsem, Fainens na Revenu Brens bai wok bung wantaim Plening na Ridisain Polisi, Planing na baset. Na ol bai kolim dispela nupela brens, Treseri, na ol i no inap kolim Fainens.

"Woks Kodinesen brens nau i stap aninit long edvaisori sevis we i save mekim wok bilong administresen, sosel, na non-teknikel eria bai senis i go long Koporet Sevises. Na dispela brens bai lukautim infrastraksa plening.

"Na Infomesen brens bai senis i go insait wantaim opis bilong administreta na ol wok bilong en bai senis," Mista Tomscoll i tok.

Em i tok Forestri brens we i gat

wanpela man i lukautim dispela opis long edvaisori level bai senis na i go wok bung wantaim lends. Na lends, Forestri, Fisikel Plening, Komes, Agrikalsa na Fiseris bai wok bung wantaim na kamap olsem Ekonomik Afes. Na tu posisen bilong tupela deputi administreta bai senis, Edvaisori na Koporet bai kamap Administresen na Koporet Afes.

Mista Tomscoll i tok, dispela potfolio bai karamapim polisi, plening na baset, humen risoses developmen, wok kodinesen na ekonomik afes.

"Na narapela deputi administreta bai senis i go long Fil na Sapot sevises. Dispela bai karamapim lend, fores, na fisikel plening, helt, edukesen, lokal level gavman, sosel developmen, distrik administresen na distrik administreta," Mista Tomscoll i tok.

Em i tok dispela em i plen bilong developmen polisi bilong Gavman bilong Madang long tripela yia 1998-2002. Dispela i bihainim polisi dairektiv na polisi bilong 1998 baset bilong Gavana Jim Kas. Dispela polisi dairektiv i lukluk long koporet streteji bilong Madang Provinsel Gavman na administresen, koporet plen, provinsel developmen plen, distrik developmen plen na eria plen bilong wan wan lokal level gavman.

Kot namel long Madang Gavman na ol setelmen surik i go long tupela wik moa

Siv Jastis Arnod Amet i surikim spesel nesanel kot namel long Madang Gavman na ol setelmen lain long Madang i go long tupela wik moa. Dispela Kot i sapos long kamap long Fraide Januari 23, long Madang.

Jastis Amet i mekim olsem bikos em i kisim wanpela toksave i kam long ol loya i makim ol lain bilong setelmen

long Madang olsem ol i no redi gut yet long kamap long dispela kot.

Moa long 300 setelmen lain husat i go long nesanel kot opis long Madang long bikomoning yet i kisim toksave i kam long ol wokman bilong nesanel kot opis na ol plisman na ol i go bek.

Dispela spesel nesanel kot i kamap

bikos Siv Jastis Arnod Amet i putim stap long Madang Gavman bai i noken rausim ol setelmen lain long de ol i makim pinis na we inap Kot i harim komplem i kam long ol loya i makim ol lain bilong setelmen long Madang insait long dispela spesel nesanel kot.

Disisen bilong kot long putim stap bilong rausim ol setelmen lain

i go bek long ples bilong ol na tu surikim dispela kot i go long tupela wik moa i givim hat taim long Madang Provinsel Gavman. Nau long dispela taim, Madang Gavman iyusim pinis samting olsem K40,000 long baim alauens, kaikai na ples bilong slip bilong mobail squad long Lae inap long faipela wik olgeta.

Barter sevim pikinini poisin snek i kaikai

WENCESLAUS MAGUN i raitim

I nogat planti bisnis man long Papua Niugini inap yusim helikopta bilong ol yet long go long ples longwe tru long taun na kisim sikman klostu i dai bikos poisin snek i kaikai em. Ol pipel bilong Madang i laki long i gat wanpela gutpela kain man olsem.

Olpela Rijinol Memba bilong Madang, Peter Barter i no kros long Jim Kas i winim em long 1997 jenerel ileksen. Na em i no kros tu long ol pipel bilong Madang, moa yet ol pipel bilong Ramu husat i no givim em bikipela vot bilong winim 1997 ileksen. Nogat. Bel isi na marimari i pulap tru long Mista Barter.

Olsem na long Sande Januari

20, 1998, Mista Barter i lusim Madang samting olsem foa kilok long helikopta bilong em yet na em yet i flai i go long Josephstaal bilong kisim wanpela pikinini Ludwig Argam, wanpela poisin snek i kaikai em.

Mista Barter i go kamap long taim, na bringim pikinini Argam i go stret long Madang Jenerel haus sik bihain long em i toksave long bos bilong haus sik olsem em i kisim wanpela mangi klostu bai i dai i kam.

Marimari pasin Mista Barter i mekim i kamap bihain long Sista i lukautim ol wok bilong haus sik long dispela taim i toksave long em long telepon samting olsem 3:45pm olsem i nogat marasin long Josepstaal bilong sevim pikinini Argam na sapos nogat man i go kisim em, em bai dai.

Mista Barter i tok dispela em i namba tu taim, em i flaim helikopta bilong em i go long ol

bus ples longwe long Madang taun bilong kisim ol lain poisin snek i kaikai ol i kam long Madang Jenerel haus sik. Na em i bringim ol marasin samting tu i go long ol dispela ples.

Em i go het na tok tu olsem i nogat inap marasin bilong poisin snek long Madang provins long helpim na sevim laip bilong ol lain poisin snek i kaikai ol.

Dispela pikinini Mista Barter i bringim em i go long haus sik nau i orait na i no dai.

Wantok i askim pinis Sekreteri bilong Helt Dipatmen, Dokta Puka Temu long mekim sampela klia toktok long dispela hevi. Tasol long taim mi raitim dispela nius, Dokta Puka i no bekim askim bilong Wantok yet. Long taim Wantok i kisim bekim bilong Dokta Puka, em bai raitim arapela toksave i kam long Helt Dipatmen long hevi bilong poisin snek long Papua Niugini.

Gavana Wenge askim long gupela sindaun insait long Morobe provins

MOROBE Gavana Luther Wenge bai kolim wanpela bikpela kibung bilong bungim olgeta lain insait long Lae na Morobe provins. Dispela kibung em bilong kisim tingting na ol toktok long wanem as na i save gat pait namel long ol grup wanwan na tu ol raskel pasin i wok long go antap nau. Dispela kibung bai kamap long neks mun samting.

Gavana i askim olgeta lain insait long ol komyniti long Lae Siti na ol klostu ples arere long siti long kamap long dispela bung. Bikos ol i ken gat sans long autim ol tingting na ol toktok long wanem as ol hevi i save kamap long pasin bilong dring spak na hevi bilong en insait long sosaiti.

Mista Wenge i tok em i askim ol pipel long komyniti stret long toktok wantaim bai em i ken harim na save long hevi bilong dring spak na bagarap bilong en long laip bilong ol pipel. Na wanem kain rot o eksen ol i laikim gavman i mas mekim, Gavana i tok.

Em i tok dispela kibung i ken kamap olsem rot o luksave long gavman bilong em long mekim wanem plen bilong kamapim.

Long dispela taim tu, Gavana i singaut i go long ol gupela manmeri bilong Morobe provins long sindaun gut na i no ken kamapim ol birua na bikhet pasin nabaut long ol yet. Ol i mas sindaun gut na rispektim ol kastom na gupela pasin tumbuna bilong ol Morobe pipel.

Wewak Stom Wota projek i mas kamapim wok tru, ol lida i tok

ADDY LAVAKZ i raitim

OL pipel bilong Wewak taun long Is Sepik provins i wok long lukluk fowet nau long dispela bikpela wok projek we Gavana bilong provins, Sir Michael Somare, Nesenel Gavman na Korea kampani i tok long kamapim insait long provins.

Dispela ol toktok wanpela lidaman bilong ples Mapau long wewak, Jim Boltoku i tokim Wantok olsem em wantaim ol manmeri bilong Mapau na tu ol arapela ples na setelmen insait long Wewak i bin harim dispela toktok bilong projek ya foapela krismas i go pinis. Olsem na ol i laik lukim dispela projek i mas kamap gut na maski long gavman i sutim bel bilong ol long toktok tasol, Mista Boltoku i tok.

Mista Boltoku bilong Yangoru i tok em i stap longpela taim pinis long Wewak taun na em i no lukim wanpela senis yet.

Olgeta taim ol lida bilong mipela yet olsem Gavana Sir Michael Somare, Bernard Narokobi, Sir Pita Lus, John Jaminan na arapela lida moa i save tok

long bringim sevis na developmen tasol i nogat tru, em i tok. Ol toktok bilong bringim sevis na developmen i no save kamap bikos ol lida yet i as tru bilong bagarapim ol dispela senis, em i tok moa.

Em i tok ol pipel i wet long lukim ol dispela toktok i kamap tru tasol nogat na ol i save tanim na putim belhat bilong ol i go antap long bagarapim ol samting bilong taun we inap stap na mekim ples i luk nais na gupela.

Lidaman ya i tok sapos ol nesenel lida i ken mekim toktok na kamapim kaikai bilong toktok bilong ol, ating bai ol pipel i amamas na sapot long mekim samting i kamap.

Mista Boltoku i tok gupela nau long opis bilong Gavana i mas kisim gut toktok na tingting wantaim ol lain i go pas long wokim kamap dispela Stom Wota Drenes Projek long skelim wantaim sindaun na laip bilong pipel long provins.

Narapela bikman bilong setelmen long Sepik Timba Robert Gambi i tok tu olsem, gavman i ken wokim bikpela baret na rausim ol wara long tais na kisim bek graun. Tasol gavman i mas tingim olsem Wewak taun i sindaun antap long graun

malumalum. Na olgeta naispela toktok bilong wok bisnis na ol bikpela projek ya inap go daun long graun malumalum sapos graun i nogat ston long aninit.

Mista Gambi i ting gupela long gavman i mas brukim ol bikpela maunten arere long Wewak taun na kapsaitim olgeta i go long karamapim ol tais na mangrov long Wewak taun.

Narapela bikman tu em Derek Sambu i tok long Wewak, kain kain wok projek i save kamap. Tasol ol dispela projek i no save stap laip bikos i nogat arapela wok projek o bisnis i stap long sapotim long mekim wok bilong en i gat bisnis bilong mekim na go het. Long dispela as, planti projek long pastaim i save dai bikos nogat arapela bisnis o sapot projek i stap we narapela i ken helpim long givim bisnis long narapela na narapela i helpim long givim bisnis long narapela.

Tasol Mista Sambu i tok nau dispela projek i laik kamap, gavman i mas kisim o pulim moa investa o kampani i kam tru tru long mekim wok tru antap long Wewak long mekim antap long dispela nupela hap graun gavman i laik kamapim.

Taim bilong planim kaikai gen!



• Ol manmeri i stat long planim kaikai gen bihain long san i bin stap longpela taim long kantri. Ol lain long Isten Hailens i stat long planim poteto gen.

Poto: Sape Metta.

Madang plisman holim saspek i kilim sekyuriti gad

BEN TAUMAI i raitim

Ol plisman long Madang i holim wanpela man ol i bilip i kilim wanpela sekyuriti gad long Sarere Januari 24 long nait long Madang.

Dispela sekyuriti gad em i bilong Mikarep ples insait long Bogia. Ol i bin sutim em nainpela taim na em i dai, long Simkor didiman stoa we em i save wok. Dispela trabel i kamap samting olsem nain kilok long nait taim ol dispela man nogut i tingting long brukim stoa i go insait na stilim ol samting.

Plis i stap long duti long dispela nait i tok tripela man i bin stap wantaim dispela man ol i ting i kilim sekyuriti gad. Ol dispela lain i lain brukim stoa i go insait na stil taim dispela sekyuriti gad i go na stapim ol.

Long taim sekyuriti gad i go stapim ol, dispela lain i kros wantaim em na dispela man ol plis i ting ol dispela man i kilim sekyuriti gad i kamautim naip na sutim em nainpela taim. Bihain ol i pasim em wantaim rop na ranawe.

Bihain liklik sampela lain i painim dispela sekyuriti gad na bringim em i go kwik long Madang Jenerel haus sik tasol em i dai pinis.

Taim ol plisman i kisim dispela tok-save ol i go mekim wok painim aut na-holim pas dispela man ol i bilip i kilim dai sekyuriti gad.

Sampela plisman long Madang i tokim Wantok olsem ol i bilip dispeal man ol i holim pas em wanpela olpela wokman bilong Simkor didiman stoa na wanpela junia kumul plea. Ol plisman i bilip Simkor i rausim em pinis long wok bipo long dispela trabel i kamap. Tasol ol i tok ol i no save long wanem as tru Simkor i rausim em long wok. Long dispela as ol plisman i bilip em i go kisim ol wantok bilong em i kam na ol i traime long brukim stoa i go insait na stil olsem pe bek bilong Simkor i rausim em long wok.

Ol plisman i tok dispela em i namba wan taim bilong wanpela kain pasin nogut bilong kilim man i kamap long Madang bihain long narapela kain pasin olsem i kamap taim ol i kilim Elizabeth Poyap long Mina nambis long 1996. Ol plisman i tok olsem bikos Madang i nogat nem bilong kain ol pasin nogut olsem.

Ol plisman bai sasim dispela saspek sampela taim bihain taim ol i karim aut wok painim bilong ol. Nau yet ol i wok hat tru long painim ol arapela tripela saspek ol i bilip i wokim dispela trabel.

**YOUR KWIKEST ACCESS AROUND THE WORLD
WANT TO PHONE OVERSEAS?**

**TELIKOM'S INTERNATIONAL DIRECT DIAL SERVICE (IDD) IS YOUR
KWIKEST AND MOST CONVENIENT WAY TO CALL.**

Simply dial.

05 + COUNTRY CODE + AREA CODE + LOCAL NUMBER

**PS: SAVE 80t... ON CALLS TO SOUTH PACIFIC (BAND 1) COUNTRIES.
SIMPLY CALL BETWEEN 10PM-6AM AND ANYTIME ON SUNDAYS.**



TELIKOM PNG
Now we're really talking!

Invesmen Kopresen Fan i laik helpim tu ol pipel bilong ples

ARI GUH DANDEE i raitim

OL wokman bilong Invesmen Kopresen Fan nao i stap pinis insait long Morobe provins na i wokim wok bilong ol long toktok wantaim ol bisnis manmeri ol kampani, ol papagraun na ol wanwan manmeri long ol wok bilong Invesmen Kopresen Fan.

Long las wik Fraide ol i bin kamap long Wau long bungim ol manmeri long hap na givim toktok long ol wok bilong ol we i gat samting olsem 100 manmeri i bin kamap long stap insait long bung bilong ol.

Man husat i bin i go pas long dispela group wok-about Mista Alu Tongia i tok dispela wokabout bilong ol i bilong i go stap klostu wantaim ol man na meri bilong ples na tokaut klia long ol wok bilong Invesmen Kopresen Fan, na wanem ol rot bilong bihainim long baim sia long ol.

Em i tok Invesmen Kopresen Fan em wampela kain fan we i save helpim ol manmeri bilong Papua Niugini long baim sia i go long ol na ol i ken putim i go long ol bisnis insait long kantri bilong helpim wanem man o meri i baim sia long bihain taim

Em i tok taim yu baim sia i go long Invesmen Korporesen Fan mani bilong yu no i stap wantaim ol, nogat ol bai i helpim yu na putim moni o sia bilong yu i go long kirapim bisnis na ol dispela taim mani bilong yu bai i stat long kamap o groa. Na taim bisnis i wok long ron na kamapim ol win mani, yu bai kisim liklik hap win mani bilong yu taim bisnis i kamapim ol win moni o profit long bisnis.

Long lukluk bilong Invesmen Korporesen Fan, fan i bin stat long 1973 long lukluk long helpim ol pipel bilong Papua Niugini na i gat sia bilong ol pipel wantaim planti ol bikpela bisnis na bikpela ol maining kampani insait long kantri tude.

Maketing opisa, Mista Ken R. Zilong i tok, i tru Invesmen Kopresen Fun i gat klostu 25 yia long ol wok bilong en, tasol planti ol liklik manmeri bilong kantri insait long ol bus ples i no klia tumas long wok bilong diseal fan, olsem na bihain long dispela 25 yia ol wokman i wok long i go long ol ples na tokaut klia long ol pipel long wok bilong fan wei bai i helpim long bihain.

Na tu wok bilong ol i sut long taim bilong rifom we ol manmeri bilong ples i mas save long ol senis we bai i helpim ol bihain na wok bilong ol sut tu i bihainim mak bilong rifom.

Mista Zilong i tok nao yet em ol pipel bilong ples tu mas save long ol kainkain senis na Invesmen Kopresen Fan i wok long mekim wok bilong en long tokaut long ol pipel bilong kantri long rot bilong baim sia bai sia bilong ol i ken helpim ol long bihain taim.

Em i tok sapos, planti ol liklik manmeri bilong pels i klia long ispela fan na ol wok em i mekim bai luk olsem Papua Niugini kantri bai i no gat ol lo na oda problem wei gavman i mas lukluk gut tu long diseal fan.

Wau i gat nau bisnis skul

I GAT nau wampela nupela bisnis trening skul i stap pinis long Wau bilong helpim long givim skul long manmeri long rot bilong ronim ol bisnis bilong ol.

Dispela bisnis trening skul nau ol i kolim long Wazono Bisnis Grup na trening konsaltansi. Mista Roland Agembo i go pas long en.

Mista Agembo i tok em i amams tru long wok bung wantaim Wazono Bisnis Grup long kamapim dispela bisnis trening skul long Wau, bikos em i lukim ol planti ol bisnis man nidim moa save long rot bilong ronim bisnis.

Long las wik Fraide dispela Wazono Bisnis Grup na trening konsaltansi i bin soim klia nem bilong em taim em i bin greduetim ol 6-pela sumatin bilong em husat i bin stap insait long tupela wik kos long Reteil Menesma long rot bilong ronim tred stua. Dispela em namba wan ol lair husat i bin greduat na kisim setifiket long Reteil Menesmen taim dispela trening skul i bin laik wok long stat insait long Wau. Insait long dispela tupela, wik bilong kos Wazono Bisnis Grup na trening Konsaltansi i bin kamap na i redi long ronim narapela kos tu.

Roland Agembo husat i bin wampela Bisnis Developmen Opisa long bipo na tu olsem wampela tisa bilong ol sumatin long Laloki olsem long bipo na olsem man i save gut tru long ronim ol bisnis i tok, em i amamas tru long lukim olsem dispela 6-pela sumatin bin kisim setifiket nau long ronim tred stua bilong ol.

SBDC helpim yu wantaim liklik bisnis



15.NAMBA WAN YIA BILONG YU

i kam long las wik

Daunbilo em sampela gutpela poin we inap helpim yu long namba wan yia bilong yu long ranim bisnis.

a) Tingting long rot na ol plen we yu bai salim ol samting:

- Long wanem rot bai yu promotim gut bisnis bilong yu.

- Long wanem rot em i ken narakain long ol arapela lain i resis wantaim yu.

b) Tingting long setimap ol gol na mekim ol wokman i wok i go

long ol.

c) Lukim olsem yu gat kontrol long wok bisnis bilong yu. Long dispela yu mas

bihainim sistem o oda long ranim bisnis bikos ol sistem i stap long helpim yu. Na i no long bagarapim bisnis.

d) Lukim olsem yu gat gutpela wok manmeri. Lukim olsem ol i wok gutlong salim ol prodak na i karim gut kaikai.

e) Lukim olsem yu kontrolim ol mani bisnis i pulim wantaim dispela we yu tromoim na tu long olgeta wok kamap long wok ples na bisnis wantaim.



• Nupela trefik lait ol kontrakta i putim long namel bilong rot i go long Morata, Tokarara na Gerehu. Dispela em bikpela trefik lait stret.



• Ol praivet kontrak lain i stretim sait bilong rot long Mosbi.

WOL NIUS

Kot givim Carlos "the Jackal" laip sentens

WANPELA biknem taroris long wol o man nogut husat i kamapim dal, pen na bagarap long Yurop, Midel Is, Amerika na Saut Amerika Carlos "the Jackal" em ol i givim em laip sen tens o kalabus inap long em i dal.

Nem tru bilong Jackal em Illich Ramirez Sanchez na mama i karim em long kantri Venezuela insait long saut Amerika. Em i gat 48 krimas. Kot i saelm em na painim em i rong long sutim dal tupela pila sikret egen bilong Frans na wanpela infomen long Parte long 1975.

Man ya i gat biknem long wol long 1970s na 1980s na ol i sutim tok long en long dai bilong 80 pipel insait long ol kantri long Amerika na Yurop. Ol i sutim tok long Carlos olsem lida bilong man nogut grup bilong em we long ol i save haljekim balus, karimaut ol bom atek long ol man we ol i mekim ol long kilim dal. Wanpela samting we em i tok i pait long en em long Palestain i kamap olsem wanpela tri na independen kantri long Israel. Olsem na em i save biruaim tru Israel.

Dokta bai stap insait long tes bilong HIV, AIDS marasin


SIK NOGUT HIV na AIDS i nogat marasin yet bilong em long stapim. Ol dokta na saientis long wol i traim yet long painim marasin bilong em na ol i go hetim ol wok painimaut long dispela samting.

Tasol wanpela dokta bilong kantri Ingran Mike Youle i laik bai ol i traim marasin sut we ol (dokta) i wok long en long traim daunim sik HIV na AIDS long en. Marasin sut ya em ol dokta long Kalifornia Amerika i laik traim.


Dokta Youle i wanpela long ol dokta husat i8 go pas long mekim ol wok painim long painim marasin long daunim sik nogut ya. Em i tok sapos long laip yu wari tasol long wanem kikkbek bai yu kisim

bai yu no nap long painim wanpela gutpela samting. Em i tok wan wan man i skelim ol samting we i wari long en na dispela em samting we em yet i laik mekim. Patna bilong em tu i sapatim em long tingting bilong em.

Dokta ya i nogat pikinini. Ripot i tok em bai i kisim tes sut marasin (vaksin) long sampela taim dispela yia.



• Dokta Mike Youle.



• Ol meri bilong kantri Algeria i sori krai long dai bilong ol hauslan bilong ol we ol i kilim ol long pait namel long ol gavman soldia na ol paitman bilong lotu Islam. Las wik, 200 i bin dai na insait long 6-pela yia we hevi na pait i go het, samting olsem 75,000 i dai pinis.



• (lephan) Dispela liklik Kurdish pikinini i lukluk long banis bilong refuji kem long San Foca, saut Itali.

Inap long las wik, moa long 1,200 refuji long ol Kurdish pipel i ronawe long ples bilong ol bikos i gat hevi na pait i kamap na go long kantri Itali. Ol Kurdish pipel i bilong Iraq long Midel Is tasol long planti yia nau ol arapela pipel long kantri i no save lukluk gut long ol bikos em ol i narakain long ol wantaim narapela tokples na pasin kastom bilong ol yet. Olsem na gavman long hap tu i save givim oda long kilim dai planti bilong ol. Mekim na ol Kurdish pipel i save ronawe painim ol arapela ples long stap long en.

Taim Itali i opim dua bilong em long ol refuji ya, Germani na ol arapela Yuropien Yunien kantri i no wanbel.

WANSOLWARA NIUS

Samoa:

BIKPELA win ol i kolim long Saiklon Tui i stap nau long hap bilong Samoa.

Long dispela wik Tunde ol bikman long hap i wok long skelim kos bilong bagarap we strongpela win ya i kamapim. Long biktaun bilong kantri, Apia nogat bagarap i kamap tasol long ol arapela hap, win i bin daunim planti diwai samting na wari i bagarapim planti hap bilong taun. Ol taun lain i mekim bikpela wok long klinim ples. Ailan bilong Savaii i bin kisim taim tru taim bikpela win i bagarapim ol gaden kaikai, rot na tu pawa i bin aut. Tasol nogat man i dai bihainim Saiklon Tui. Ripot long Pacnius i tok win i lusim Samoa na go olsem long hap bilong Niue.

Suva, Fiji:

Nesenel elain bilong Fiji, Air Pasifik i mas tok klia i go long ol atoriti long imejensi askim em i mekim i go long sivil aviesen bihain long wanpela balus bilong em i bungim trabel long enjin bihain long wanpela ovasis ron. Ol i putim repela mak long Nadi ples balus long las Fraide moning taim balus i bin askim long helpim sapos dispela Boeing 767 balus em i pondaun long Nadi.

Apia, Samoa:

Gavman bilong Samoa i kirap nau long mekim samting bilong rausim ol birua Afrikaen snel we i wok long bagarapim ol gaden kaikai. Minista bilong Agrikalsa Molio'o Teofili i bin tokim palamen olsem dipatmen bilong em bai i baim kemikol marasin long posinim ol birua snel.

Teifiuli i tok ol bai i karimaut progrem long spreim ol snel tupela taim long wanpela yia. Yunaitet Nesen Fud na Agrikalsa Ogenaisesen i sgivim mani bilong karimaut dispela progrem.

Honiara, Solomon Ailans:

Siaman bilong Bogenvil pis toktok long Nu Silan em Praim Minista Bart Ulufa'alu bilong Solomon Ailan i bilip strong olsem olgeta grup long Bogenvil na PNG bai bihainim ol agrimen ol i kamap wantaim na tok oraitim insait long bung long Lincoln Yunivesiti long Nu Silan. Bihain tasol em i go bek long kantri bilong em, Mista Ulufa'alu i tok Lincoln agrimen em i kamap bikos olgeta grup i tok orait long en tasol sapos sampela lain i laik bagarapim, ol pipel bai i rabisim ol. Ulufa'alu i tok ol man i noken bisi long presiden bilong Bogenvil Interim Gavman Francis Ona i no stap insait long dispela bung. Em i tok tupela bikman em Joseph Kabui na Sam Kauona i bin stap na dispela i soim long ples klia olsem ol i sapatim ol toktok.

Praim minista bilong Solomon Ailans i tok agrimen we ol i wokim long Lincoln Yunivesiti em i olsem modol i go long intenesenel komyuniti we ol i ken lainim gutpela samting long en. Em i tok pasin we ol Melanisen

kantri i bihainim long bung wantaim long helpim wanpela arapela na putim ol tingting wantaim long traim pisim dispela hevi long Bogenvil i olsem wanpela gutpela piksa we yumi soim i go long ol arapela kantri long helpim ol wanlain, wan-skin na wanpela pipel.

Pago Pago, American Samoa:

Wanpela sip bilong painim pis bilong America ol i kolim long Adriatic Sea i go daun long solwara 90 mail longwe long American Samoa. Dispela em long ailan bilong Tutuila. Bot ya i bin lusim Pago pago na i laik go gen long biksolwara taim em i painim birua, tasol nogat man i lus. Olgeta 22 kru memba long sip i seif bihain narapela fising sip, Penia i kisim ol. Ol boskru i kam long Amerika, Puerto Rico, Panama, Filipin, Samoa na wanpela bilong Solomon Ailan.

Suva, Fiji:

Ol helt atoriti long Fiji laik putim stet ov imejensilong kontrolim sik dengi fiva o strongpela hetpen we i bagarapim planti man long kantri. Wanpela spesel komiti i bung pinis long glasim na skruim ol toktok long rot bilong pinisim ol moskito we i save kamapim dispela sik olsem malaria.

Nukualofa, Tonga:

Plis long Hawaii i holim pasim tupela man Tonga bihain ol i painim ol olsem ol i stap insait long wanpela grup we ol i save mekim bisnis long salim ol drag o ol strongpela marasin nogut namel long Amerika, Tonga, Australia, Nu Silan na Guam.

Tupela yangpela man i gat 30 krimas. Plis i bin holim pasim ol wantaim strongpela drag ol i kolim long kokein long Janmueri 16.

Ol plis long Hawaii i ripotim olsem tupela wantaim ol arapela poroman bilong ol i karim moa long 1,000 paun hevi kokein i go pinis long Hawaii. Ripot long Pacnius i tok dispela grup i wok long yusim ol man na meri wantaim long hait karim dispela strongpela tambu drag namel long ol kantri.

Apia, Westen Samoa:

Ol i sasim pikinini bilong Leba Minista long Samoa, Asalemo Schmidt long paitim nogut wanpela niusman long Apia. Nius ripota ya, Moseli Taumaoe i save wok wantaim Samoa Post long Nu Silan. Ol i bin kisim em i go long haus sik long kisim marasin long ol bagarap em i kiism long han bilong Schmidt.

Pacnius i ripot Taumaoe i bilip olsem i mas pilai politik i stap long tingting bilong man ya i paitim em. Presiden bilong asosiesen bilong ol niuslain long Samoa Lance Polu i bin tok egensim tru dispela pasin bilong bagarapim niusman.

Ol ripot i kam long Pacnius

LAI PSTAIL

KANAGE

"Em nau, narapela wik bilong mi ken"



■ Kanage i go long lotu na spes i pulap olsem na em sindaun long las fom. Em sindaun i go na pasto i wok long autim gutnius. Pasto tu em wanpela eksen pasto olsem na taim em autim tok, bai em tromoi han na wokim eksen tu wantaim.

Olgeta taim pasto i tok, noken stil, o noken mangal o noken kilim man, bai em i poinim han long ol manmeri long haus lotu. Taim Kanage i lukim dispela em wok long tingim olsem, pasto i no ken poinim han long em. Olsem na taim pasto i poinim han i kam, Kanage bai surik igo long sait. Taim pasto i poinim han gen, Kanage surik i go long sait. Mekim na pasto lukim na kisim tingting pinis. Nau taim pasto i laik mekim eksen nau em, toktok bikpela olsem, "yu no ken paulim meri bilong narapela man". na em sutim tupela han wantaim i kam fowet. Kanage i laik surik long sait tasol nogat, tupela han bilong pasto i blokim na hensapim Kanage long namel. Kanage kirap na tok, "yu laki long blokim mi wantaim tupela han ya, sapos wanpela han tasol, bai yu lus ya".

(Namba tu wina)
Luke Suluc
Rabaul

■ Kanage bilong Bukex na wanpela Sarere em sanap arere long Wewak maket i stap na tromoi ai long lukim ol yangpela meri i raun i go kam. Em sanap i go na lukim wanpela yangpela meri bilong Waginara wes kos i kamaut long hos reis haus. Kanage pulim gut win pinis na redi long tromoi tok pisin bilong em. Taim meri ya i kamap klostu, Kanage opim maus na tok, "hei susa, mi laik peimuk ya". Taim meri ya harim em tanim na tok, "barata, traipela san na yu no les. Yu wet, mi go tokim man bilong mi pastaim". Taim Kanage harim olsem, em rausim slipa long lek na siksti long dispela hap na lus olgeta.

Robin Masa
Wewak

■ Wanpela wiken na Kanage kisim tupela tambu bilong em long Goroka na ol i go wetim pmv long go daun long Lae. Ol i sanap i stap na wanpela waitman i ronim ka i kam. Kanage tromoi han na waitman ya i go na stapim ka. Em nau waitman i askim ol, "where are you guys going?". Olgetai paul long tok inglis na sanap lukluk i stap. Em nau waitman i askim gen, "are you going this way?". Kanage i no save long tok inglis tasol em bekim na tok yesa. Em nau waitman opim dua na ol i kalap. Kanage i go opim dua long fran na sindaun opsait long waitman ya. Na tupela tambu i sindaun long beksait bilong ka. Planti das long rot olsem na waitman i askim Kanage apim glas i go antap. Em i tok long inglis olsem na Kanage i no klia. Tasol Kanage tanim na tokim tupela tambu long beksait, "tambu, masta tok holim strong ain bilong ka bikos em bai putim long siksti". Tupela tambu i holim tait stret ain bilong ka. Taim waitman i lukim olsem, em bel kaskas stret na stopim ka long Kainantu na rausim ol i go daun.

David Thomas
Wewak

Moa tokpilai long pes 13



Niu yia selebresen... • Selebresen long Januari 1, 1998 i bin lukim planti bikhet mangi long Genoka setelmen long Goroka, Inten hailans i senisim ol olupela pasin nogut bilong ol na i tok promis long kamapim gutpela laip na sindaun insait long komyuniti. Insait long dispela piksa i soim tupela spak brus (mariwana) diwai em ol mangi ya i kamautim long kukim long paia na tok "nogat long drag na yes long pasin bilong gutpela sindaun. Foto: Sape Metta.

Amamas bilong skul i sotpela tasol

JERRY NAIWA
MOUTI i raitim

Mi laik stori liklik olsem wanpela toksave i go long yangpela man meri i stap long Hai skul husait i no luksave o ting dispela hamamams i bilong oltaim oltaim.

Mi wanpela manki husait i bin skul gut na mi kisim wanpela spes long hai skul. Taim mi go long haiskul i gat kain kain ol manki man na meri tu i bilong narapela hap tu i kam skul. Mipela olgeta i stap olsem wanpela bikpela komyuniti long skul. I no long taim mi gat wanpela pren meri wan klas bilong mi.

Taim mi gat gelpren ya na mi bin hamamas tru. Mi ting dispela pren bai stap long laip bilong mi. Mi turpela i bin pren gut tru. taim miturpela save rait i

go i kam, em save tokim mi em lovim mi tru, na mi tu save tokim em olsem. Pren bilong mitupela em long serim samtung rait i go i kam, na tu mi save go long dom bilong em long nait. Prensip i bin stap strong tru inap 3-pela yia olgeta.

Wanpela taim long 3 kilok moring taim olgeta manki i slip yet mi lusim dom bilong man na mi go long dom bilong ol meri. Nait tu i bin kol, win tu i bloa isi isi tasol nogat nois tru, olsem wanpela sailent nait. Taim mi go kamap, mi bulim wanpela string em taitim long winglas. Taim mi pulim wan tu em kirap kamaut, tasol em i no save i gat wanpela meri i lukim em pinis. Mipela i stap inap 5 kilok mi lusim em go bek long dom.

Moning taim mitupela i bin bung long mes long kaikai na ting olgeta samtung i orait. Bihain long kaikai belo bilong Assembly

i ring na mipela i go long lain. Toksave hetmastar i singautim mitupela long opis. Mi tokim yupela insait long lewa bilong mi i pamp na bel bilong mi krai. Nogat tru liklik spet long maus bilong mi. Hamamas bilong aste nait i pinis.

Taim mitupela i go long opis hetmastar i tok tomora moning bai yutupela go long ples. Yutupela pinis long skul. Mi tokim yupela ol manki mi krai nogut tru wankain long gelpren bilong mi. Hamamas bilong haiskul i pinis long dispela taim em tok go long ples. Mi tingting bai mi tokim papa mama olsem wanem bikos ol i hamamas tru bikos em 3 wiks tasol lep long final eks bilong mi, bikos olgeta hatwok bilong ol i pinis nau na em long bekim. Tasol nogat mi pinis long skul.

Long dispela nait gelpren bilong mi tu i ronowe wankain long mi. Las taim

mi lukim pes bilong em, em long opis bilong heatmasta long taim mitupela go insait. Turangu mi no save hau em go long ples bilong em. Mi no moa lukim pes bilong em inap nau klostu yia 2000 nau. Mitupela i ting hamamas bilong hai skul bai stap olsem yet tasol nogat. Nau mi save lukim ol wanklas bilong mi holim ol bikpela wok na mi save wari gen long laip bilong mi.

Hamamas bilong skul em liklik taim tasol. Na hatwok bilong papa mama bilong yu em bikpela samtung tru. Baibfel tu save toktok long dispela. Yu no ken tingim hamamas bilong nau tasol, tingim bilong bihain.

Sapos yu wanpela skul man o meri ritim plis, lukaut gut long dispela na kain hevi. Bihain bai yu wari long laip bilong yu olsem nau mi save wari stap.



• Ol bol bilong Bad-mix Souls ben i soim stail bilong ol taim ol i rekot long CHM studio.



93FM **YUMI** Redio

Stesen bilong yumi yet

Harim olgeta gutpela

program long

93FM **YUMI**

- * Olgeta lokol sing sing, na ol musik bilong bipo yet
- * PNG Motors prais bilong kes krop
- * Yamaha Provinsel weda ripot
- * BSP liklik bisnisan ripot
- * Pepsi lunch hour rikwest
- * City Pharmacy Lukaut bilong bebi
- * Post (PNG) Ron bilong ol Sip
- * Ela Motors kantri kaundaun
- * American God
- * Sande Gospol so

Em rait redio stesen ikamap
pinis harim long tok ples bilong
yumi yet, 93FM **YUMI**

Salim rekwest i kam long: **YUMI** request
Locked Bag 93
Port Moresby, NCD.
Fax: 320 1995

Bad-mix Souls soim stret bikpela laik long musik

JAMES KILA i raitim

DISPELA pasin bilong bringim demo-kaset i go long ol rekoting studio na bihain yu painim-aut olsem kaset i lus em i wanpela samting bilong het i pen na kros tu ya. Planti taim ol yangpela husat i save gat laik long rekot i save bungim dispela hevi.

Wanpela bilong ol dispela lain em ol mangi bilong bilong Badmix Souls. Turangu ol dispela mangi i bin givim demo-kaset 5-pela taim olgeta. Tasol ol i save kisim wankain stori olsem "kaset i lus".

Long dispela yia tasol, bihain long 5-pela traim na bikpela hatwok, ol dispela bagaros i kisim tok-orait long go insait pinis long Chin H Meen Studio long Mosbi long rekotim namba wan kaset bilong ol. Taitol bilong dispela kaset ol i kolim "Born To Suffer". Long Inglis dispela i min olsem yumi kamap long bungim hevi na planti ol narapela ol samting nogut bilong dispela wol. Dispela taitol tu i gat mining na stori long wokabaut bilong ol mangi Bad-Mix Souls. Yu yet harim, skelim na pilim strong bilong dispela song.

Ol memba bilong dispela grup i kam long Morobe na Popondetta na ol i save stap long 8-Mail na ATS kompaun long Mosbi. Ol i bin stori olsem long namba-wan taim tru taim ol i bin givim demo-kaset bilong ol, ol i bin yusim dispela nem "Sponze" Tasol bihain taim ol i sekap, sampela lain i tokim ol olsem kaset i lus, olsem na nau ol i senisim nem i go long Bad-mix Souls.

Dispela grup i bin stat long 1994 na i bin pilai raun nabaut long ol konsert insait long NCD. Ol i bin pilai long 1996 Mosbi So na tu long wanpela konsert long Yunivesiti ov PNG na long Yut konsert ong Gerehu stes-5.

Ol dispela 4-pela mangi em ol memba bilong Badmix Souls em Peter M, Awa Lesman, Leima W na Slim Buda. Ol dispela mangi i miks Morobe na Popondetta.

Insait long dispela nupela kaset album ol i rekotim ol i tok i gat planti ol song long Tok Pisin, wanpela long Inglis na sampela long miks Morobe na Popondetta.

Sampela ol song ol mangi ya i bilip olsem bai i gat kik em Nemba Bekosat, Nogat Freedom na Yagamula.

Ol i dediketim dispela kaset album i go long olgeta mangi long 8-Mail long Mosbi na long ATS, Sogeri, ol 2095 manmeri husat i stap nabaut na ol mangi long Kol-peles Mendi.

Ol i tok olsem ol i singim planti ol song bilong ol long Tok Pisin we bai planti ol manmeri i ken harim na skelim gutpela mining na tu amamas long musik bilong ol.

Ol dispela yangpela mangi i gat gutpela stail bilong ol long musik na i gat bikpela bilip olsem planti ol fens o manmeri husat i save laikim stail bilong ol.

Kaset ya bai kamap sampela taim bihain long dispela yia aninit long dispela nem Bad-Mix Souls "Born To Suffer". Redi tasol long baim na sapotim ol lokal PNG atis bilong yumi na musik bilong Papua Niugini stret.

PNMFM



NAUFM

YUMI

PNG FM PTY. LTD.
Trading as
NAU FM and YUMI FM
P.O. Box 774,
Port Moresby,
Papua New Guinea
Ph: (675) 320 1996
Fax: (675) 320 1995

KANAGE

"Em nau, narapela wik bilong mi ken"



■ Kanage em wanpela skul tisa. Long moning, em i wok long ol pepa long ol studen i ken droim ol piksa long en. Taim olgeta studen i kisim pepa bilong ol, ol i tok, tenkyu tisa. Olgeta studen i tok tenkyu gut. Tasol wanpela studen insait long klas em tit i bruk liklik na tang bilong em hevi. Olsem na taim Kanage givim pepa long em, em i tok, tentyu sista. Taim Kanage harim olsem bel bilong em hot na em tokim studen bilong em ya olsem, "I'm not your sister, thank you". go back to your sister and say thank you to her.

(namba tri wina)
Petrus Minja
Wewak

■ Kanage na meri bilong em i stap long Mosbi longpela taim tru na nogat pikinini. Wanpela taim bel bilong Misis Kanage i solap na Kanage kisim em na tekov long haus sik long sekim. Long haus sik, dokta i tok, yes Misis Kanage i gat bel. Klostu long taim bilong karim, na Kanage i go lusim meri bilong em long haus sik na go bek long haus long Gerehu. Long nait, Kanage apim telefon na ringim haus sik. "Helo, is this pepi pon dipatmen?". Na nes i tok, yes. Kanage askim gen, "I want to fail aut, is my wife pon yet?". Na nes i tok, oredi. Kanage harim na amamas tru na askim gen, "my wife pon a boises o gelses?". Na nes tok, "nice looking girl." Taim Kanage harim olsem, em tok, "tell my wife, thats her problem". Kanage tok olsem pinis na hangamapim telefon. Em i no amamas long harim olsem misis i karim bebi meri.

Kanage Fan
Vanimo

■ Olgeta taim Kanage i save paitim misis bilong em nating nating. Em kros liklik bai misis i kisim bikipela pen. Wanpela taim Misis Kanage i no bin kukim kaikai na redim. Olsem na taim Kanage i kam long haus long apinun, em hangre na nogat kaikai. Em tanim tasol, tromoi han na lek long Misis. Taim em i laik kikim Misis long lek, isi tasol Misis Kanage i saitim na holim stret tupela wil bilong Kanage. Kanage i laik tromoi han gen tasol nogat rot bikos meri i holim em pinis long strong bilong em. Misis Kanage i giaman bekim strong liklik ya, man, bikmaus bilong Kanage i antap tru. Taim olgeta manmeri i harim na ron i kam, Kanage giaman ai raun na pundaun ankonses long graun i stap. Ol manmeri i kam na givim wara na kol win long Kanage na Kanage kirap. Ol manmeri i laik lap tasol ol i holim strong bikos turangu Kanage i bungim pinis mak bilong dai tasol em kam bek long laip gen. Em nau Kanage tokim Misis bilong em, "harim a, yu bikhet long kisim mi long lowa kat ya. Sapos yu kam long apa kat, bai yu lukim matmat ya." Olgeta manmeri i no isi long lap na go wanwan long haus bilong ol.

Linus Ma
Vanimo.

■ Kanage wantaim tripela pikinini na meri bilong em ol i ron long sip long Madang i go long Wewak. Taim ol i ron namel long Karkar na Manam ailan, bikipela win i ron na solwara i kirap na sakim sip. Em nau Kanage i pret olsem na em i stat beten, "o bikipela papa, sapos strong bilong solwara i win na kapsaitim sip, mi wanbel tasol long yu ken kisim bek ol tripela pikinini bilong mi. Tasol plis no ken kisim Misis bilong mi". Taim ol pikinini i harim olsem ol kros nau. Tasol papa Kanage i tokim ol, "noken wari, yupela i ken go stap long gut na wetim mi na mama. Mitupela bai go kamap long Wewak na bihain kisim balus i kam bungim yupela." Ol pikinini i ting tru na ol i amamas na ol i ron long sip i go inap long Wewak.

Kanage bro
Madang

Haus sik fi i noken bagarapim ol turangu lain

Ripot i kam long buk bilong Wol Helt Ogenaisesen (WHO) long ol hevi bilong helt kea long wol.

Planti liklik kantri long bipo i no save sasim ol sikmanmeri long baim haus sik taim ol i sik na i go. Tasol sampela 10-pela o moa krismas bihain, gavman i no save givim inap helpim na sapot long wok bilong ol haus sik na helt, olsem na ol i save sot long mani bilong baim ol marasin na sot long mani tu long mekim ol wok bilong em. Olsem na em i stat long kisim mani long ol sikmanmeri long ronim wok bilong em.

I gat sampela rot i wok long kamap long kisim mani bilong ronim wok bilong helt tsaol ol i no save traim long stapim pasin bilong sasim ol sikmanmeri long baim haus sik taim ol i go long kisim marasin. Olsem na long dispela kain pasin, wanem rot helt sevis i traim long helpim ol manmeri husat i no wokmanmeri na i save sot long mani?. Na wanem kain rot i stap bilong helpim ol manmeri husat i no save kisim bikipela pe, ol i save painim hat long kisim mani na ol kain hevi olsem?.

Helpim ol turangu

Long planti kantri, rot i kamap na ol lain husat i nogat mani i save kisim fri marasin long haus sik. I gat kain kain rot bilong mekim dispela pasin i kamap.

I gat tupela kain rot bilong mekim dispela. Wanpela em Dairek na narapela em Karakteristik. Dairekt tagetim em olsem givim fri marasin na haus sik sevis o sasim ol liklik prais tasol long ol manmri husat i kisim liklik pe tasol long potnait. Ol i save mekim gut wok painimaut long sekim na luksave gut long amaspela manmeri i gat dispela kain hevi.

Long rot bilong Karakteristik em long makim narapela prais bilong ol liklik pikinini yet, ol bikipela manmeri yet na ol disebel o turangu manmeri yet. Dispela rot i no save skelim man, maski em i save kisim gutpela potnait pe o em i no wokman. Maski em i liklik pikinini o em i bikipela manmeri. Dispela kain rot tu i ken mekim kamap wanpela gutpela rot we i ken sevim gut ol manmeri.

Rot bilong givim fri marasin i wok o nogat?

Dispela rot bilong givim fri marasin long ol turangu manmeri i no save wok gut. Wok painimaut long sampela kantri i soim olsem ol turangu lain husat inap long kisim fri marasin na helt sevis i wok long baim haus sik sevis. Long sampela haus sik, ol pablik haus sik sevis em fri tasol i nogat saplai bilong ol marasin. Olsem na ol turangu manmeri i mas baim ol dispela marasin long ol praiwet haus sik o klinik.

Planti arapela haus sik i no save gat inap mani bilong lukautim na senisim o sevisim ol masin na ol samting bilong haus sik long stretim ol sikmanmeri. Ol menesa na woka bilong haus sik ino save klia gut sapos ol i kamapim sampela



• Ol pikinini sindaun amamas.



• Nes i raun long haus long sekim ol sik manmeri.

gutpela rekot long wok bilong ol o nogat. Olsem na i mas gat gutpela na klia na trupela gaid-lain i mas kamap pastaim long ol haus sik bod o helt dipatmen i kamapim ol polisi bilong sasim ol manmeri long baim haus sik na tu polisi bilong traim helpim ol turangu manmeri husat i no save kisim gutpela pe long potnait.

Ol helt progrem i mas kamap gut long pulim mani bilong lukautim ol wok bilong em na tu mekim isi long ol manmeri husat i no wokmanmeri long kisim gut marasin. Tasol ol haus sik na helt senta menesa i save painim hat taim long kamap wantaim gutpela rot bilong mekim ol dispela kain haus sik progrem na polisi.

Rekot i soim tu olsem rot na pasin bilong skulim o toksave klia long olgeta manmeri long ol progrem o polisi bilong haus sik na ol kos bilong sasim ol sikmanmeri i no save go aut tumas long olgeta manmeri. I no gat irlap kempen bilong mekim olgeta manmeri i klia gut long ol kain senis bilong

haus sik na polisi bilong ol. Ol haus sik i mas tok klia gut tru long kempen bilong ol long ol pablik manmeri wanem as na ol i save kisim haus sik fi long ol. Na wanem as ol i save daunim fi long ol sampela manmeri o givim fri sevis o ol kain samting olsem. Narapela tu em long tok klia long ol manmeri long wanem kain samting olsem masin bilong mekim wok long haus sik long sekim sik bilong ol manmeri i nupela o olupela. Na ol i gat inap mani long baim nupela masin o nogat. Ol dispela kain kempen i ken mekim ol manmeri i klia gut long sampela lo o polisi bilong ol haus sik long kantri.

Dispela ripot i kam long buk bilong Wol Helt Ogenaisesen. Na i sut long ol dveloping kantri olsem Midel Is olsem Afrika, Esia, Saut Amerika na Sentrel Amerika na sampela hap bilong Pasifik rijon tu.

Gutpela rot

Sampela gutpela rot i bin kamap pinis long ol pablik na praiwet haus sik. Ol helt menesa i ken stapim haus sik pemen

long sampela sikmanmeri o stapim sampela sevis o sasim aninit long kos fi. Long sampela rot, ol i save sasim liklik fi stret long autpesen sevis, o fri long autpesen. Em i hat moa long kisim fri marasin o sevis insait long haus sik we i save kos bikipela mani long baim ol i kam long haus sik.

Ol arapela rot tu em long go long haus bilong ol sikmanmeri, fri konsaltesen o nogat sas bilong toktok wantaim ol dokta, daunim haus sik fi long ol lain i kam long hap we ol i no save wok mani, na daunim haus sik fi long praimer kea eria.

Astingting bilong mekim kamap dispela em bilong painim mani bilong helpim na ronim helt sistem long bungim nesenel helt plen. Kisim mani long ol sikmanmeri em wanpela rot bilong helpim haus sik long baim ol marasin na arapela kos em i gat na i save baim oltaim. Arapela rot tu em long Helt opisel i ken givim moa pablik risoses na yusim ol risoses i stap pinis long gutpela rot bilong lukautim na sevim i stap gut longpela taim. Stapim sampela sevis i ken kamap long sampela taim na dispela i ken mekim na planti bagarap i no inap kamap. Helt insurens progrem i mas kamap long pulim mani na skelim hevi bilong mani wantaim. Kamapim praiwet sekta risoses na yusim gut long ol wok stret bilong em.

Baim haus sik fi em wanpela rot bilong painim mani bilong strongim ol wok bilong haus sik o helt kea. Tasol ol sevis bilong haus sik long givim marasin samting i mas bihainim sik na bagarap ol manmeri i save kisim. Na i no ken bihainim strong na levul bilong ol manmeri long ol i ken baim haus sik sevis o nogat.

Sapos ol dispela kain rot i kamap, bai ol savelain bilong mekim ol lo na polisi bilong haus sik i ken painim sampela gutpela na stretpela rot bilong kisim gutpela sevis na helpim bilong ol helt sevis.

MANI INSAIT LONG TIN

OX & PALM

**PLANTI
MANI LONG
WINIM**



Taim yu opim feveret OX & PALM 340g tin, lukluk aninit long ai bilong tin na painim sapos yu win.

Yu ken winim ol prais otsem K50, K100, K250, K500 o K1000 kes mani.

**LONG KISIM
PRAIS BILONG
YU:**

Salim dispela ai bilong tin wantaim nem na adres bilong yu i go long:

Hugo Canning,
P.O. Box 635,
BOROKO, N.C.D.

Kastom marit I save gat amamas



• Fred man bilong Freida long beksait wantaim tupela brata bilong em. Na Frieda Yakin na man husat i wakabaut wantaim em, Eddie (Jnr) Saunders. Eddie olsem brata i redi long givim Freida i go long man bilong em.



• Freida kamap long haus bilong man bilong em. Man i soim olsem em i redi long kisim em.

EDDIE SAUNDERS i raitim

TAIM pikinini meri i marit i go long narapela hap. I save brukim lewa bilong mama na papa. Na ol brata, susa, anti, ankol na wanpisin i save wari. Em pasin bilong yumi PNG na Melanesia pipel.

Tasol marit i go long namba wan pikinini meri i save narakain olgeta. Na save bagarapim tingting na bel bilong mamapapa. Bai tekim sampela yia inap ol i lus tingting. Bikpela tingting i save mekim ol wari em, bai pikinini i go stap orait long narapela o nogat? Na man bilong em bai lukautim em gut o nogat? Na bai mipela i lukim em gen o nogat? Ol laikim em mas stap long pes bilong ol olgeta taim. Olsem em I stap na groa ap long hand na pes bilong ol. Tasol nogat. Pikinini i bikpela pinis em i mas bihainim laik bilong en na marit i go. Na husait save warim tumas, em mama. Laik bilong mama save pas tru long pikinini.

Na nau wantaim taim i senis, laip i hat. Stori bilong planti ol yangpela i no marit gut. Na paul nambaut. Ol mama papa i wari tru. Bikpela ting-

ing em long gutpela bilong ol pikinini meri.

Tasol laik bilong ol yangpela tu tanim tanim wantaim senis bilogn win. Na wok long hat long kontrolim ol pikinini.

Planti ol lain skul na wok i pulim ol na kamaut stap long taun na siti. Ol i kamapim pikinini. Na laik na marit bilong ol dispela pikinini, ol mama papa i no save. Na ol pikinini yet i no save bai ol marit i go we.

Taim ol i go bikpela nau na laik i pulim ol. Na ol marit i go go. Tingting bilong mama papa em, ol laikim pikinini mas marit gut olsem ol i bin marit.

Wantaim dispela het tok. Wanpela mama bilong Is Sepik i stap long Taurama Ami Bareks i-sait long Mosbi Siti i lukim wari na uriman bilong em long lukim nambawan pikinini meir bilong em long marit long stail em i binf marit i go long man bilong em i karim kaikai.

Dispela meri em Jenny Fox Yankin, meri bilong Sagen Michael Fox Yankin. Ol bilong ples Indingai insait long Sambri Leks long wara Sepik, Is Sepik provins. Jenny i bin marit i kam long Fox Yankin olsem kwin. Yes, pikinini meri bilong em Frieda Linda Yankin i marit long

stail. Em i go olsem kwin long haus bilong man bilong em. Taurama Barracks i lukim pes taim long histori wanpela tumbuna stail marit. Marit i kamapim tumbuna pasin na kastam bilong tupela ples na provins insait long kantri. Sambri long Is Sepik provins na Oro Kaiva long Oro provins. Frieda i marit i go long Popondetta, Oro provins. Jenny yet mama bilong Frieda em namba wan pikinini meri. Marit bilong em i bin kukim Sambri Lek long 1972. Na ol Popondetta i wetim ol Sepik long stail tu. Na ol wankeim stail marit bilong yangpela namel long Tony Yipruka na Theresia Sino, na las namel long William Yakam na Rosaria Wek. Dispela marit i bin spesel. Na Jenny i tok marit em spesel samting long laip. Na mi laikim pikinini meri bilong mi long marit gut long stail na pasin mi bin marit. M amamas long lukim Frieda i marit gut. Tasol laik lukim em mas sindaun amamas wantaim man bilong em oltaim.

Na las mun long amamasim dai bilong yia 1997 na welkamim nupela yia 1998. Ol Sepik i bilasim pikinini meri bilong ol Frieda long olgeta tumbuna bilas bilong Sepik stret. Na karim em i go long haus bilong man bilong em. Fred. Na ol Popondetta i bilasim man bilong Frieda long stail bilas bilong Oro yet na wetim ol Sepik na pikinini meri bilong ol. Tupela grup wantaim i amamas. Marit i wanpela gutpela samting i save bungim tupela man na meri, ol famili, ol wanpisin, ol provins na ol kantri tu.




• Albert Maru, bikpela bilong Freida. Albert i givim Fred wanpela basket kaikai na kavin huk bilong Sambri kastom. Bai meri bilong em Freida i ken paitim kaikai bilong em, long basket, hangamapim long huk kavin.



• Freida i kamap pinis long haus bilong man bilong em. Na kastom bilong ol Oro (Popondetta) tupela nupela marit i sanap antap long wanpela han diwai long traim strong bilong tupela olsem tupela marit. Bai tupela i ken ranim laip bilong marit bilong ol yet.



• Freida wantaim wasman i redi long wokabaut i go long haus bilong man em wantaim kako.



PNG HIT PARADE

1997

No. SONG ARTIST POS. WKS. MTH.

HOOR 1

| | | | | | |
|----|----------------|--------------|---|---|-----|
| 40 | S/ SOMETHING | APPRENTICE | 5 | 3 | NOV |
| 39 | YAMBUNAWI | MANDAWALI | 5 | 3 | FEB |
| 38 | STAP SORE | URALOM KANIA | 4 | 1 | DEC |
| 37 | MATANGI SASAWA | SAUGAS | 4 | 1 | DEC |
| 36 | TAMOATA | QUAKES | 4 | 1 | AUG |
| 35 | LAMBADA REGGAE | DAVID ANDREW | 4 | 1 | MAY |
| 34 | COME HOME NOW | XB2 | 4 | 1 | APR |
| 33 | NOQUI-TAU | KABANI | 4 | 1 | JUL |
| 32 | MANGI BAINING | BARIKE | 4 | 1 | JAN |
| 31 | MAI TAURI AU | KABANI | 4 | 4 | JUN |

HOOR 2

| | | | | | |
|----|----------------|---------------|---|---|-----|
| 30 | MANAM MOTU | QUAKES | 3 | 1 | DEC |
| 29 | UNITY | COVER VERSION | 3 | 1 | NOV |
| 28 | IA LYNETTE | LEONARD KANIA | 3 | 1 | JUN |
| 27 | FROOKS LONG MI | AZZIMBAH | 3 | 3 | NOV |
| 26 | AI DAUE | WALI HITS | 3 | 3 | JUL |
| 25 | PILISI | HITSY GOLOU | 3 | 3 | FEB |
| 24 | CRAZY | TARIKANA | 3 | 4 | JAN |
| 23 | KUTI MANGI | ROBERT OEKA | 2 | 1 | DEC |
| 22 | JUSTINA | LEO WALLING | 2 | 1 | NOV |
| 21 | FAREWELL | BASIL GREG | 2 | 1 | FEB |

PNG FM PTY. LTD.

Trading as
NAU FM
and
YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995

Patnasip bisnis long Is Sepik i save pundaun kwiktaim

ADDY LAVAKZ I raitim

LONG Is Sepik provins ol bisnis we i sanap strong na i wok long strong bilong ol yet i no bin kamap patna wantaim wanpela o arapela bisnis manmeri bilong provins.

Long dispela as na moni we bisnis ya i wokim na profit i kamap em bilong em wanpela tasol na em bai i no lnap long brukim wantaim wanpela o arapela nogat tru.

Planti bilong ol dispela bisnis o wok projek we wanpela man o meri tasol i papa long en i wok long ron gut tru insait long provins long tude yet.

Tasol Patnasip bisnis long Is Sepik provins i no save stap longpela taim nogat tru ol bisnis wok ya i save bagarap kwiktaim stret.

Wantok i bin wokim wanpela wok painimaut long ol bisnis konsalten haus insait long provins na i painimaut olsem ol patnasip bisnis wok na wok projek bilong provins i no gat gutpela rekot.

Na tu i no gat gutpela mama lo (konstitusen) bilong ol husat bisnis manmeri i wokim patnasip bisnis i banisim ol long dispela as na taim wanpela o arapela i laik yusim moni long wokim sampela wok long laik bilong en na wok i no kamap. Moni i paul o bagarap i no gat lo bilong bringim em i go sanap long ai bilong kot. Olgeta samting bai dai nating olsem bikos i no gat konstitusen long banisim patnasip bisnis olsem Is Sepik provins.

I gat bikpela luksave olsem i stap olsem taim ol i kirapim na ronim ol patnasip bisnis wok o projek ol i no save pinisim gut wok bilong ol.

Planti taim ol wok kamap i save ron gut long sotpela taim tasol na bihain pundaun o pinis nating long hap rot.

Na nogat wanpela gutpela kaikai i save

kamap long ol dispela wok. Long nau yet long Is Sepik provins sapos mipela i lukluk i no bek long las 10-pela krismas, i no gat wanpela bisnis wok, o projek i kirap long provins na sanap strong nogat tru.

Ol liklik wok bisnis na projek i kamap tasol bihain long sampela taim i pundaun.

Bikos i no gat gutpela pasin bilong wokbung givim helpim, sapat na luksave i kam long ol pipel. Tude ekonomik wok, soesol wok politikel wok na tu spot i pundaun olgeta na i no save ron gut long provins.

Long wanem i nogat gutpela wok bung, helpim na sapat i kam long gavman yet praivet sekta na ol pipol bilong Is Sepik provins.

Pasin bilong sanap long strong bilong wanwan i moa bikpela long Is Sepik provins.

Wanpela arapela samting i olsem taim wanpela patnasip bisnis wok projek i kirap na ron gut na stat long pulim bikpela moni, ol man husat i save ronim dispela wok i save kisim mani na putim i go insait long poket bilong ol.

Taim dispela i kamap strong bilong dispela bisnis wok o projek i surik i go daun. Na i no longtaim na wok i pundaun. Taim wanpela bisnis i ron gut ol boeman bilong dispela bisnis i no save tingting long helpim na sapatim ol liklik projek, spot grup, yut grup, ol meri na tu ol arapela lain.

Ol i kisim tingting olsem bisnis bilong ol i stap long strong bilong olgeta manmeri.

Bikpela luksave i stap nau long Is Sepik provins olsem wan wan manmeri tasol i tingting long kirapim na ronim ol wok bisnis.

Planti manmeri tru i stap long bagarapim na rabisim ol wok bisnis i kamap long provins.

Long wanpela ripot i kamaut long wanpela bisnis konsalten opis long Wewak olsem taim ol bisnis wok ya i

bagarap i pundaun ol bai wantu krai long benk long kisim helpim long dinau moni.

Tasol long wanpela wok painimaut Wantok i wokim long ol Komasesel benk bilong mipela long Wewak Wespac/PNGBC na Rurel Developmen Benk olsem planti ol bisnis haus na praivet bisnis manmeri long Is Sepik provins i gat ol bikpela dinau wantaim ol dispela benk na ol i wetim ol dispela ol bisnis man na bisnis haus long stretim ol dinau bilong ol.

Ol bisnis lain bilong provins yet i no gat gutpela tingting o plen bilong setim ol bisnis wok bilong ol na tu i no gat mama lo i banisim ol long bihainim stret na wokim ol wok bilong ol.

Long dispela as na planti wok bisnis i pundaun long Is Sepik bikos ol lain i ronim ol bisnis ya ol yet i bagarapim ol moni bilong holim strong bisnis wok long amamas bilong ol yet.

Kain ol liklik bisnis na wok projek olsem gol, wokabaut somil na turis i kamap stret long ai bilong mipela i wok long kamap.

Tasol wanpela astingting tasol em i no gat gutpela set ap bilong ol dispela bisnis o wok projek insait long provins.

Gutpela set ap bilong bisnis o wok projek em yu husat i laik save long dispela i ken kisim long opis bilong Smoll Bisnis Developmen Koporesen Isnait long provins.

Ol dispela save na gutpela tingting bai pulimapim tru bisnis tingting bilong ol lain husat i laik kirapim bisnis wok.

Na ol i mas strongim na kamapim tru ol dispela tingting na save bilong wokim bisnis wok long kainkain rot.

Nau yet planti ol bisnis wok o projek i no gat gutpela set ap i bagarapim na pundaun pinis bikos ol man i go pas long bisnis yet i bagarapim moni bilong wok bisnis.



NEM: Rosa Moga
KRISMAS: 19 (meri)
ADRES: Embesh Youth Group, PO Box 3905, Lae, Morobe province.
LAIKIM: Kaikai buai, pilai basketbal, lukim TV, harim redio musik, pilai soka volibal, go lotu, singim ol gospel song na raitim pas long ol pren.

NEM: Irene Dasu
KRISMAS: 19 (meri)
ADRES: C/ Baro Holy Trinity School, PO Box 126, Vanimo, Sandaun provins.
LAIKIM: Harim musik, tok pilai wantaim ol meri, raitim pas, ritim niuspepa na pilai spot.

NEM: Magdalyn Vivi
KRISMAS: 19 (meri)
ADRES: C/ Baro Holy Trinity School, PO Box 125, Vanimo Sandaun province.
LAIKIM: Harim musik, raitim pas long ol pren, tok pilai, ritim buk na pilai spot.

NEM: Peter Yapi
KRISMAS: 22 (man)
ADRES: Pou Local Church, PO Box 175, Mt Hagen, WHP.
LAIKIM: Pilai gita, raitim pas, harim singsing lotu na go lotu.

NEM: Marcus Kara
KRISMAS: 20 (man)
ADRES: Securimax Security Group, PO Box 131, Mt Hagen, WHP.
LAIKIM: stori, go lotu, pilai spot na tok pilai.

NEM: Jacob Sapsi,
KRISMAS: 20 (man)
ADRES: Securimax Security Group, PO Box 131, Mt Hagen, WHP.
LAIKIM: Harim gospel musik na go lotu.

NEM: Ketty Kewa
KRISMAS: 16 (meri)
ADRES: Mt Kamund CRC, PO Box 1757, Mt Hagen, WHP.
LAIKIM: Danis, singsing, painim boi pren na karim lek.

NEM: Ranu Ketpa
KRISMAS: 16 (meri)
ADRES: Mt Kamund, CRC, PO Box 1757, Mt Hagen, WHP.
LAIKIM: Prenim man, pilai basketbal, pilai soka na danis.

NEM: John Ett
KRISMAS: 22 (man)
ADRES: Mt Kamund, CRC, PO Box 1757, Mt Hagen, WHP.
LAIKIM: raun long taun, wok gaden, pilai spot na mi laikim ol meri tasol i raitim pas long mi.

NEM: Joseph Wokobuso
KRISMAS: 18 (man)
ADRES: PO Box 4309, Lae, Morobe province.
LAIKIM: Pilai soka, harim lokol musik, pilai basketbal, go lotu, wok gaden, raitim pas na painim gutpela pren meri long maritim bihain.

NEM: Joe Max
KRISMAS: 18 (man)
ADRES: Vidaro Village, Banara Catholic Mission, PO Box 142, Bogia, Madang.
LAIKIM: Harim olgeta kain kain musik, ritim ol stori buk, stori wantaim ol pren na tok pilai, raitim pas long ol meri long narapela provins.



Bik Bro

REBO

HAUSSIK LONG HAP I TRAIPELA TRU...

MAN! TRAIPELA HAUS-SIK TRU YA!

PRINCE ALEXANDRA

OL DOKTA KARIM AUDA IGO STRET LONG OPERESEN TEBOL...

EMEBE OPERI

EMEJENSI OPERESEN RUM

... EM STAP INSAHT LONG 4-PELA AUA OLGETA...

REBO TARANGLI SINDAUN NA WET AUTSAIT I STAP...

SON, GO BEK LONG HOTEL NA MALOLO.. AUDA I STAP LONG HAN BILONG MIPELA!

OH, DOKTA.. MI WARI TRU LONG EM... TINGTINGI BILONG MI INO STRET!

PLIS, DOKTA.. TOKIM MI STRET... EM BAI ORAIT O NOGAT?

MIPELA NO SAVE YET... OPERESAN I PINIS.. YU MI STAP NA WET TASOL!

Igo moa Neks Wik!!



SIPAK MAIK

TASOL MAIK.. EM BAI MI RAITIM SABMISSIN LETA IGO LONGI MINISTA NA KIM OKE BILONG EM!

AIDON KEA, JEST, DO IT!

ER.. BHAHIN YU KAM LUKIM MI LONG OPIS LONG SIKS-MAIL, OKE?

BLARY BRAIBERI!!

NAU OL INVESTIGESAN TIM BILONG IMIGRESEN OPIS GO PAI NIM TUPELA WATTMAN.

217

NOK! NOK! NOK!

217

YU HUSAT?


OPIM DUA!

MI LAIK SAVE, YU HUSAT?

OPERESAN RAUSIM KWIK!!

Igo moa Neks Wik!!

Liklik boi trikim tewel na ol ples man kilim em



LONG bipo bipo tru, i gat wanpela ples i stap. Na long dispela ples, wanpela bikman wantaim meri pikinini bilong em tu i save stap amamas wantaim olgeta de. Bikman ya i save go long bus na painim planti abus na ol meri pikinini bilong em i save amamas long kaikaim planti abus olgeta taim.

Wanpela de, papa i laik go long bus. Na liklik pikinini boi bilong em i tok long bihainim em. Olsem na tupela i go wantaim long bus. Tupela i kisim tupela dok bilong ol na ol i go wantaim.

Tupela wokabaut i go i go na kamap long wanpela hap bus we ol man i save go slip na kisim win long em na kukim kaikai nabaut na kaikai. Em nau papa i tokim pikinini long em i mas stap na kukim sampela kaikai bilong tupela long hap. Na em yet bai i go long sekim ol trep.

Olsem na em i go na sekim trep i go na larim yangpela boi ya i stap. Taim boi ya i mekim paia na kukim kaikai i stap, em harim wanpela bikpela pairap long beksait bilong em. Na em tanim long lukim. Oloman, bikpela diwai long sait i bruk i go namel na wanpela traipela tewel man i kam ausait long dispela diwai. Tewel man ya i kam tasol na sindaun klostu long boi ya na askim boi ya, yu kam olsem wanem. Na yangpela boi ya i tok em wantaim papa bilong em i kam na papa i go raun sekim trep long



painim abus. Na em i stap long kukim kaikai bilong tupela.

Olsem na tewel man ya i tokim boi ya olsem, sapos papa bilong em i kam, tupela i mas stap na wetim em. Bikos em i gat sampela toktok long tokim tupela. Em i tok olsem pinis na go bek insait long dispela bikpela diwai na diwai ya i pas wantu tasol.

Long apinun, taim papa bilong boi ya i kam, em i tokim em olsem wanpela man i laik toktok long tupela. Olsem na tupela i mas wetim em. Taim tupela i wok long redim ol kaikai na stori i stap, dispela diwai i op gen na dispela tewel man ya i wokabaut i kam.

Taim tewel man ya i kam, em i lukim tupela na amamas nogut tru. Em i laik go sindaun klostu long liklik boi ya, tasol boi ya tok, go sindaun wantaim papa bilong mi. Na papa i tok, nogat, go sindaun wantaim boi bilong mi. Papa na pikinini i wok long senisim toktok i go i kam olsem na tewelman ya i les na go sindaun wantaim papa bilong boi ya.

Em nau taim ol tripela i sindaun pinis, orait tewel man ya i askim papa bilong boi ya long

winim paia na mekim lait long haus bai ol tripela i ken sindaun long lait na stori. Taim papa bilong boi ya i go fowet long winim paia, tewel i kirap tasol autim tupela yau bilong bikman ya na kaikai. Em tokim bikman ya long winim paia gen. Orait taim bikman ya i winim paia gen, em rausim tupela ai bilong bikman ya na kaikai. Em mekim olsem i go na stat long kaikai lek bilong bikman ya i kam antap. Em i kaikai bikman ya i go inap em pinis olgeta.

Em nau em i laik tanim gen liklik boi ya. Olsem na em tokim liklik boi ya long go ausait na kisim paia wut. Taim boi ya i go ausait long kisim paia wut, em pasim wanpela dok wantaim long haus na em kirap ronawe wantaim narapela dok i go long ples.

Narapela dok we boi ya i pasim i wok long pulim em yet na mekim nois. Na tewel man ya i ting boi ya i stap yet olsem na mekim nois i stap.

Taim boi ya i kamap long ples em go tokim olgeta bikman na ol i kisim spia, bunara na ol samting bilong pait na olgeta i go bek. Ol i go kamap long dispela hap ples, na olge-

ta bikman ya i go hait long sait bilong bus nabaut. Orait boi ya i go antap long het bilong haus na em singaut long tewel ya, yu kaikai papa bilong mi pinis na nau yu kam kisim mi na kaikai tu.

Taim tewel i kam ausait, em i lukim olsem boi ya i stap antap long het bilong haus. Olsem na em i painim ples long go antap. Tasol nogat lata o hap rot i stap. Orait boi ya i tokim tewel ya olsem em i mas go insait long haus na bihainim pos i kam antap. Olsem na taim tewel ya i go insait long haus, olgeta bikman bilong ples i hait arere long bus i kam aut tasol na pinisim tewel ya wantaim olgeta sap samting ol i kisim i kam. Ol i kilim dispela tewel man ya katim em i go liklik na kukim em long paia. Dispela ples ol i kilim tewel ya em mipela i save kolim Gugam. Tasol nau ol i senisim nem na kolim Keiweng. Em long hap bilong Teptep insait long Kabwum distrik long boda bilong Madang na Morobe provins.

Sayaba Otte
Madang

KANAGE



Kanage wantaim tripela pikinini na meri bilong em ol i ron long sip long Madang i go long Wewak. Taim ol i ron namel long Karkar na Manam ailan, bikpela win i ron na solwara i kirap na sakim sip. Em nau Kanage i pret olsem na em i stat beten, "o bikpela papa, sapos strong bilong solwara i win na kapsaitim sip, mi wanbel tasol long yu ken kisim bek ol tripela pikinini bilong mi. Tasol plis no ken kisim Misis bilong mi". Taim ol pikinini i harim olsem ol kros nau. Tasol papa Kanage i tokim ol, "noken wari, yupela i ken go stap long gut na wetim mi na mama. Mitupela bai go kamap long Wewak na bihain kisim balus i kam bungim yupela." Ol pikinini i ting tru na ol i amamas na ol i ron long sip i go inap long Wewak.

Kanage bro Madang

Kanage bilong Nipa long hailans. Em i go wok wantaim ol misin long Kimbe. Tasol yu save, wok misin em yu no inap kisim bikpela pe. Olsem na Kanage i save komplem olgeta taim long pe bilong em.

Long wanpela potnait pe, Kanage i kam sindaun na wetim bos long givim mani bilong em. Em wet i stap na meri bilong bos i kam na lukim Kanage na tokim em, "halo pren, yu orait o?". Na Kanage bel hat nogut tru long harim dispela na bikmaus long meri bilong bos na tok, "no you toking mi, no you toking mi. I wet my pay." Em tok olsem pinis kirap tasol tromoi wanpela han na meri bilong bos i pundaun hap indai long graun. Em go tasol kisim stokman bilong bos na sampela kaikai bilong dok na ronawe i go long Bialla.

Kep Nipa Kimbe.

Kanage i sanap long sait bilong stua long Vanimo na wanpela meri Lumi i kamap. Nau Kanage kirap na tromoi toktok long em na tok, "meri o paradais." Taim meri ya harim olsem em tanim na tokim Kanage, yu bus faul o wanem, traim na go haitim pes long haus." Taim Kanage harim olsem, em tekov i go long haus na hait. Tasol long nait em driman long dispela meri gen. Olsem na long neks de, em i go long maket ples na wetim meri ya. Taim meri ya i lukim Kanage kwiktaim meri ya i kirap na tok, "Gawi o stail manki". Taim Kanage harim olsem em kisim bikpela amamas tru na em bekim toktok long meri ya gen, "meri o kakaruk". Taim meri ya harim olsem, em sem nogut tru na ronawe igo long haus. Bikos Kanage i no min long tok, Kakaruk, em i laik mekim wanpela naispela tok-tok long amamasim meri ya, tasol maus i karangi na em bagarapim sans bilong em yet.

Carol Umba na

Agnes Gamando, Lumi, Sandaun provins.

Kanage bilong Pops, Oro kantri na em i wok polisman long Daru. Em i wanpela feveret polisman bilong planti meri long Daru na ol meri i save aut long em. Ol i save kolim Kanage em Elvis manki bilong Daru. I gat wanpela meri Daru Kanage i save aigris tru long em. Bikos meri ya em kwim bilong Daru stret. Na meri ya oltaim bai tok pilai wantaim Kanage na pulim buai bilong Kanage oltaim.

Wanpela taim Kanage i go daun long maket wantaim polis ka na polis yunifom long skin. Em sanap i stap na kaikai buai na dispela meri Daru i kam. Meri ya i kam long beksait na paitim beksait bilong Kanage na tok, "hei, manki Pops, sampela buai i kam". Na Kanage tanim na tok, "mi laitim smuk ya, yu yet putim han i go long poket na kisim". Taim meri Daru putim han i go long poket long kisim buai, man trausis bilong gavman ya i gat hul olsem na han bilong meri Daru i go daun stret na holim het kota bilong Kanage na em bikmaus nogut tru. Kanage pilim tasol na tok, "Olsem wanem, buai bilong Pops nogut o?". Olgeta marimeri long maket harim na lukluk strong na isi tasol Kanage tekov wantaim polis ka bilong em.

James Kambot Mosbi

Mitupela papamama i wari long bebi bilong mipela husat i no laikim ol arapela kaikai tasol i laik dringim susu bilong mama tasol nau



Dia Laiplain,

Taim bebi bilong mipela i gat tupela krismas tasol, mipela i bin lainim em long kaikai. Mipela i givim em ol botol kaikai na aiskrim. Taim em i foapela mun tasol em i kaikim ol malumalu kaikai olsem kaukau, banana na kokonas na em i go fat.

Nau taim em i gat sevenpela mun na em i helti, em i laik dringim susu long mama tasol. Mipela i wari nogut em i kisim sik bun nating.

Anxious Parents

Dia Pren,

Yu wokim gutpela samting long givim susu bilong mama long pikinini. Susu bilong mama i gutpela na i winim ol arapela milk bikos em i gat ol gutpela kaikai long en long pikinini i groap gut. I gutpela moa sapos mama i susuim bebi inap em i gat tupela krismas.


I gutpela yu bin givim ol malumalu kaikai olsem kaukau, banana na kokonas taim bebi i gat foapela krismas. Dokta bilong ol pikinini i tok antap long dringim susu bilong mama, i gutpela long givim kaikai i go long pikinini taim em inapim foapela mun. I gutpela moa long stat givim em ol malumalu kaikai wantaim susu bilong mama. Ol dokta i edvaisim tu long noken givim bebi long bottl kaikai na aiskrim taim em i gat tupela krismas. Ol bottol na tin kaikai i no gutpela tumas long ol liklik bebi. Moabeta yu givim kaikai we yu yet i kukim bikos ol i fres. I gutpela long givim bottol kaikai taim i gat bikpela nid long en o taim yu nogat inap taim long redim kaikai yu yet. Antap long yu i tromoi bikpela mani long ol, ol bottol kaikai i swit tumas o i gat planti sol long en. Na tu ol i nogat planti ol gutpela samting we inap strongim bebi long gro olsem ol gaden na fres kaikai yet. Ol doktai i tok ol kain prut olsem mau banana, mango, na ol gaden kaikai na kumu olsem kaukau, pamkin,

taro na kumu em ol gutpela moa long givim long bebi. Yu inap tu long mekmekim pinat putim liklik hap masarin, oil na kokonas milk na givim long bebi bilong strongim bebi. Yu wari long pikinini bilong yu nogut em i kisim sik bun nating taim em i no laikim ol arapela kaikai. Na em i laikim susu bilong mama tasol. Ansa long dispela wari em tru sapos bebi i no kisim ol arapela kaikai na i hangamap tasol long susu bilong mama em bai i kisim dispela sik (bun nating).

Sapos dispela em i nambawan pikinini bilong yutupela noken wari planti. Ol pikinini i save senisim we long kaikai na gat taim bilong ol yet we ol i save kaikai na sampela taim ol bai i no laik long kaikai. Ol kain taim i no save stap long longpela taim. Long planti taim ol nupela papamama i save wari planti.

Taim bebi i les long kaikai ol strongpela kaikai givim em ol liklik kaikai long ol dispela we em i laikim bipo long mama i susuim em. Sapos em i les long kaikai yu wet, noken fosim em nogut narapela kain hevi i kamap. Sapos mama i save go long klinik bilong mama na pikinini, ol woklain bai i helpim yu long skelim na sekim bebi bilong yu. Tingim, ol bebi em ol wanwan man ol yet na ol bai i kaikai taim bodi bilong ol i singaut (long kaikai).

Laiplain



• Fiona Cassidy, Pablik Rilesens Opisa bilong Trus Monitoring Grup (TMG) i poto i wok long toktok wantaim ol meri grup long Bogenvil long harim na kisim ol toktok, wari na tingitng bilong ol meri bikos long planti taim ol (meri) i sem long autim wari bilong ol long ol man. Ol trus lain i luksave long dispela na taim ol i holim bung insait long ol ples na komyuniti, ol i save bungim ol meri tu ol yet bihain long bikpela miting.



• Kas yet bilong tupela manki Siwai ya. Olsem planti pikinini long Siwai i wokim nau, ol i kisim ol bebi pisin na lukautim long ples. L-R: Gilbert na Jeremy tupela kasen bilong liklik ples Monoitu i givim popo long tupela bebi pisin bilong ol. Tupela pisin ol i givim nem olsem Rambo na Lightning i no save yet long plai. Gilbert, wantaim repela siot i no manki nating, em i olsem Tarzan bikos em i save kalapim ol bikpela diwai long kisim ol bebi pisin long nes o hul bilong ol bikpela diwai long bus. Na Jeremy ya em i manki bilong lukautim ol pisin. Olgeta moning em i kirap, em mas go long liklik haus we ol pisin i stap long en, singsing na givim kaikai long ol. Tupela i gat wanpela bebi koki tu ol i lukautim.



• Ol yangpela meri ya i sindaun long Mamagota nambis long Siwai, long tok gutbai long ol lain bilong ol husat i wetim motobot long kisim ol i go long sip MV Sankamap na go long Buka.



LR:• Sylvesta, Roger, Clarence na Hudson i amamas long gat fridom long raun long ples. Foapela yangpela i bilong liklik ples Monoitu. Nau trus i kamap na ol trus lain i stap, ol pipel i pilim fri na amamas long raun wantaim nogat pret. Long ol taim bipo, ol man nating lapun na yangpela, ol meri na pikinini i save pret long raun bikos ol i pret long ol BRA, resistens na sekyuriti fos lain husat i holim gan na ol samting bilong pait. Tasol nau ol pipel i save raun long laik i go long gaden, raun long lukim ol hauslain, famili na prens bilong ol long ol longwe ples tu olsem Nagovis na Buin.



• ANTAP: L-R: Komanda bilong ol truslain long Siwai, Leftenen James Thomson na namba tu bilong em John Wilmot i sanap long fran bilong wanpela lendrova long beis bilong ol long Konga... Ol poto: Veronica Hatutasi i kisim

• RAITHAN: Tupela mama bilong ples Monoitu em Eileen wantaim mama bilong em Maria i sindaun long waisan bilong Mamagota nambis we ol i bringim ol kasen bilong ol long kisim sip i go long Buka.



Noken kisim mariwana o arapela drag

Dia Edita

Mi ritim long Wantok niuspepa bilong las wik olsem pasin bilong kisim spak brus, mariwana o arapela drag i save paulim tingting bilong ol mangi long mekim ol raskol pasin. Dispela tok em i tru. Ol raskol i save kisim ol drag bilong paulim tingting bilong ol pastaim long ol i go mekim ol bikhet pasin.

Tasol mi no ting drag em i as bilong bikhet pasin. Drag em i wanpela rot ol mangi i save yusim bilong givim ol strong bai ol i ken go het na mekim pasin nogut. Sapos i nogat drag, mi ting ol bai yusim ol arapela samting olsem alkohol, na ol samting bilong ples olsem marila o puripur long go het na mekim pasin nogut.

Long bilip bilong mi pasin nogut i kamap bikos long ol kainkain sosel hevi. Sampela bilong ol dispela sosel hevi em i olsem ol yangpela i go pinisim skul tasol i no inap painim wok. Taim ol i nogat wok, ol i nogat mani. Na olsem ol i no inap baim kaikai, klos, na slip long gupela haus. Dispela i

mekim ol i kros tru taim ol i lukim ol arapela manmeri i sindaun gut, na amamas. Long dispela as ol i save go aut na kisim drag o yusim ol samting bilong daunim pret bai ol i ken go het na mekim ol bikhet pasin bilong kisim wanem samting ol i nogat. Sampela taim ol i mekim ol dispela bikhet pasin bilong mekim ol arapela i karim pen olsem ol yet.

Hevi em i bikpela tru na Gavman ol non-gavman ogenaesen, ol Sios, ol famili ol bisnis haus na yumi wanwan i mas opim ai na lukim. Yumi olgeta i mas wok bung wantaim long helpim ol dispela ol yangpela bilong yumi. Na maski sutim tok long drag o ol arapela ausait samting we i bagarapim sindaun bilong ol yut.

Tenkyu long ritim pas bilong mi. Mi bai wet na lukluk i stap long bekim bilong dispela pas long Wantok niuspepa.

**James Tomskol
MOSBI**

Gavman mas glasim gut lo bilong amnesti

Dia Edita

INSAIT long toktok bilong bel isi long Bogenvil long KraisiSios long Niu Silan las wik, planti gupela tingting i bin kamap namel long Papua Niugini gavman na mausman bilong Bogenvil Trengisenel Gavman, Bogenvil Interim Gavman, na Bogenvil Revelusineri Ami.

Ol lain i no stap insait long dispela kibung em ol mausman bilong ol papa graun bilong Panguna main. Tasol ol i mekim wanpela askim tasol i go long gavman bilong baim kompensesen long ol mak bilong samting olsem K500, milion.

Wanpela bikpela toktok Gavman bilong Skate i mekim em long givim amnesti long husat ol

lain i tek pat long pait insait long hevi bilong Bogenvil. Mi save planti bilong mipela ol grasrut i no klia tumas long mining bilong tok amnesti. Long liklik save bilong mi tok amnesti i min olsem gavman i tingting long pogivim ol lain i pait agensim gavman.

Dispela toktok bilong Gavman em i namba wan rot bilong pasin tumbuna bilong yumi long Melnesia. Long pasin Kristen tu i gat lo bilong pogiv. Olsem na tok tok bilong amnesti em i gupela long yumi mas biahainim.

Tasol, mi laik save i gat sampela strongpela lo i banisim ol arapela lain husat i tingting long pait wantaim gavman long biahain taim tu o nogat. Sapos yumi givim amnesti long ol lain bilong Bogenvil long

dispela taim, na sapos kain pait olsem i kamap namel long gavman na ol pipol bilong Sauten Hailens, Enga o Lihir o Misima bai gavman i givim ol amnesti tu o nogat?

Em tasol askim bilong mi na inap wanpela saveman bilong lo insait long gavman i bekim dispela pas bilong mi na tokaut klia long mi long lo bilong amnesti. Mi save planti bilong mipela ol grasrut lain i no klia long mining bilong amnesti. Em tasol na mi laik bekim bilong pas bilong mi. Plis rait i go long Wantok bai mi ken ritim na kisim save.

**Robin Boamera
MADANG**

Mekim planti hul wara long ol ples i nogat wara

Dia Edita

SINGAUT bilong mi i go long ol Gavana bilong wan wan provins long sekim gut ol ples insait long provins bilong ol na putim hul wara projek.

Mi tok olsem bikos long sampela provins olsem long Westen provins, we tais i pulap, i nogat gupela wara. Olsem na ol i save painim hat tru long kisim gupela wara bilong kuk na dring. Planti yia i go pinis planti ol pikinini na lapun i save pekpek wara na dai bikos ol i nogat gupela wara bilong dring.

Tasol tude ol i amamas bikos wanpela voluntia i go long Westen provins na Is Awin setelmen na i mekim sampela gupela hul wara projek bilong ol pipol long ples na tu long Montfort Katolik

Misin.

Dispela saveman i no yusim bikpela mani bilong mekim ol dispela hul wara. Nogat. Em i yusim liklik mani we opis bilong Yunaited Hai Komisina bilong Refuji insait long Dipatmen bilong Provinsel na Lokol Gavman Afes bilong Papua Niugini wantaim sapot bilong Ovasis Sevis Buriu bilong Ostrelia.

Mi laikim ol Gavana na Edministreta i mas opim ai na lukim ol kain wok developmen i kamap long kantri bilong yumi. Maski sindaun long opis na kamapim ol kainkain bikpela plen bilong mekim ol bikpela wok wantaim bikpela mani. Sapos ol voluntia inap bringim gupela sevis wantaim viles teknoloji ating yumi long gavman i mas opim ai na yusim

ol dispela save long kamapim gupela sindaun long provins bilong yumi.

**Robin Gesua
WESTEN PROVINS**

Salim pas i kam long:
WANTOK NIUSPEPA
PO BOX 1982
BOROKO. NCD

Tenkyu Skate long skul subsidi

Dia Edita

PLANTI tok kros i kamap long tok bilong Praim Minista Skate olsem Gavman bilong em bai putim mani bilong skul subsidi long dispela yia. Ol pipol i no bilip long dispela toktok.

Na planti ol het masta i askim ol papa mama long go het na baim skul subsidi mani. Tasol taim PM Skate i putim namba wan hap bilong K30 milion olsem K19 milion skul subsidi i go long ol wan wan provins long baim skul subsidi, nogat wanpela man i opim maus long kros.

Mi lukim olsem sampela taim yumi ol pipol i no inap wet na lukim samting. Planti taim maus bilong yumi i save pairap kwik long kisim kwik ansa. Dispela em i gupela pasin. Long wankain rot, yumi mas opim maus kwik tu na givim tenkyu i go long husat ol lain i helpim yumi. Long dispela as mi laik makim maus bilong ol lain bilong mipela ol pipol long hailens na givim bikpela tok tenkyu i go long PM Skate. PM Skate yu namba wan praime minista bilong PNG long mekim tru wok promis yu save mekim. God i ken blesim yu na lukautim yu oltaim long gupela wok bilong yu.

**Katherine Sebastian
SIMBUN**

Wanpela de PNG bai nogat gupela bus na graun

Dia Edita

Mi LUKIM bikpela bus long Naru na Gogol, i pinis. Mi harim olsem ol Jant kampani i kisim diwai long ol dispela hap. Dispela i kamap tu long Wes Niu Briten, Sandaun na sampela hap bilong hailens. Arapela bikpela samting i bagarapim ol bus, graun, wara, sol wara na ol wail abus na binatang bilong yumi long Papua Niugini em ol bikpela maining kampani.

Na antap long ol maining na timba kampani em ol neserel disasta olsem biksan, ais i pundaun, graun i guria, maunten i pairap solwara i solap na i kam insait long ples, strongpela win, bikpela ren na tait na planti ol arapela kain samting olsem.

I tru long PNG yumi i no inap kontrolim ol neserel disasta. Tasol yumi winim planti ol arapela kantri long wol long sait bilong graun. Long PNG yumi ol lain long ples i papa bilong samting olsem 97% graun. Gavam i gat 3% graun tasol. Olsem na yumi ol lain long ples i gat moa pawa long gavman long bosim graun bilong yumi. Sapos yumi ol papa graun i stapim ol wok bilong maining na timba kampani ating PNG bai i gat namba wan bus, graun, wara, solwara na ol wel abus.

Em nau noken sutim tok i go bek long gavman. Asua i stap long yumi ol papa graun. Bel bilong yumi i kirap long isi na kwik mani na olsem yumi salim graun bilong yumi i go long gavman na ol bikpela kampani bilong kisim kwik mani.

Mi lukim na harim olsem long planti hap we ol lain i save kisim royalti o win mani, kompensesen mani bilong bus na graun bilong ol i yusim planti bilong dispela mani long baim bia na spak. Kain longlong pasin bilong yumi long PNG i save mekim ol ol ausait lain i save kam yusim yumi olsem ol welman. Ol i yusim longlong bilong yumi long baim graun na katim diwai, kisim gol, wel, petrol na ol arapela gupela samting i gat moa mani long ol na lusim rabis graun bilong yumi wantaim olgeta samting i bagarap pinis.

Mi mekim dispela singaut i go long yumi olgeta pipol bilong PNG husat i gat graun long stapim pasin bilong salim graun i go long ol bikpela kampani na gavman.

Sapos yu husat i laik sapotim mi plis rait i go long Wantok bai yumi ken lukautim gupela kantri bilong yumi nau bipo long em i bagarap olgeta.

**Timon Angmai
MADANG**

Tenkyu Edukesen Dipatmen

Dia Edita

Mi HARIM sampela lain i tokim mi olsem stat long 1999 na i go, Edukesen Dipatmen bai kisim ol gred 12 sumatin long go long ol Tisa Koles long skulim ol tisa bilong tis long ol komyuniti skul.

Dispela em i namba wan plen tru. Taim yumi toktok long hapim level bilong Edukesen tasol yumi no mekim wanpela samting long soim ples klia olsem ol lain i mekim wok bilong hapim edukesen sistem em yumi maus wara tasol.

Planti gupela tenis i wok long kamap long Gavman bilong Skate Nali. Wanpela bilong ol dispela gupela tenis em mi tok pinis, long hapim level bilong ol gred 10 i

go long gred 12 husat i laik go long Komyuniti Tisa Koles.

Edukesen i save stat long ol papamama, i go long komyuniti na biahain i go long skul. Sapos ol papamama i no skulim gut pikinini bilong ol, ol pikinini bai kamap ol gupela pikinini. Wankain tu em ol tisa. Sapos ol tisa i nogat gupela save ol i no inap givim gupela skul long ol pikinini. Long dispela as mi givim bikpela tok tenkyu i go long gavman long mekim gupela disisen bilong kisim ol gred 12 sumatin i go long komyuniti skul tisa koles.

**Gabriel Kaimb
HAGEN**

Ol ailan pipol mas painim graun long bikples

Dia Edita

INAP gavman i baim aut sampela graun long bikples na salim i go long ol pipol bilong ol ailan olsem Biem, Kadavar, Ruprup, Boisa, Tarawai, Walis, Kairiru, ol ailan long Manus, Madang, Niu Ailan, Is Niu Briten na wanem ol provins we i gat ol liklik ailan.

Mi tok olsem bikos mi pret, wanpela taim, solwara bai i surik i go antap na planti ol ailan i stap daunbilu tumas, solwara bai karamapim ol. Dispela hevi i wok long kamap bikpela long planti ol Saut Pasifik ailan kantri long dispela taim. Olsem na yumi noken stap longlong. Gavman i mas glasim ol dispela hevi na kamap wantaim sampela rot bilong stretim dispela hevi long dispela taim bipo long dispela hevi i go bikpela.

Mi tok olsem bikos long histori solwara i daunim pinis planti hap bilong graun na bai kamap ken. Olsem na i gupela yumi mas redi long dispela birua long dispela taim bai yumi ken stap hepi long bungim dispela birua long biahain taim. Tenkyu na God i blesim husat mani ritim dispela toktok bilong mi na mekim samting bilong helpim ol lain long ol gupela ailan bilong yumi.

**Wesley Molok
WEWAK**

Mekim planti pis na kindam fam long PNG

Dia Edita

INAP ol wokman bilong didiman i go long ples na skulim mipela ol lain long ples long rot bilong mekim pis na kindam, fam?

Mi bilip olsem i gat planti hap long kantri we yumi inap long groim gut ol pis na kindam insait long fam. Dispela driman bilong mi i karim

kaikai pinis long sampela provins. Long sampela provins olsem long hailens, mi lukim ol fama i traim long groim pis fam. Tasol mi lukim olsem i nogat planti didiman i go raun na skulim moa pipel long mekim dispela projek. Mi tu wanpela man, husat i gat kainkain tingting tasol mi no klia tumas long wanem hap bai mi go salim ol pis na

kindam bilong mi. Na mi no klia tu long ronim bisnis. Olsem na mi askim, inap ol wokman billong didiman i go long ples na skulim mipela ol lain long ples long ronim dispela projek. Em tasol wari bilong mi.

**Camilus Tasi
GOROKA**

Land Taitels Komisen mas salim gut graun

Dia Edita

WANPELA bikpela ansa bilong ol lain i save go sindaun long setelmen insait long taun em i bikos Lands Taitels Komisen i nogat ol gupela polisi we i ken mekim isi long ol pipel long baim graun insait long taun na sindaun.

Planti taim mi harim ol pipel i komplek olsem ol i painim hat tru long baim wanpela hap blok graun long taun na mekim haus bilong ol. Long dispela as, mi ting planti ol pipel i save go long ol setelmen blok na mekim ol haus bilong ol.

Inap Land Taitels Komisen i kamapim sampela gupela rot we i mekim isi long ol lain i laik baim graun long taun i ken painim isi long baim graun. Mi bilip dispela em i wanpela gupela rot bilong ol pipol i baim ol graun long taun na sindaun na i no go pulap long ol setelmen na kamapim ol kainkain hevi.

**James Huaiu
MORobe**

Putim planti plis stesin long Hailens haiwe

Dia Edita

HEVI bilong rot blok long hailens i kamap bikpela tru long dispela taim. Mipela i no moa pilim sev long draiv long hailens haiwe. Planti ol man long ples i putim rot blok na stapim ol ka. Dispela i kamapim moa birua antap long birua bilong raskol i stap pinis. Olsem wanem bai ol lain bilong arapela provins na moa yet ol turis bilong arapela kantri i kam go long hailens na lukim planti ol gupela pipel na samting long ailans.

Inap plis dipatmen kamapim planti plis stesin long hailens haiwe? Ating sapos i gat planti plis stesin bai hevi bilong ol lain i putim planti rot blok bai i go daun o pinis olgeta. Em tasol wari bilong mi na sapos yu husat i gat tingting long sapotim mi o agensim mi, plis rait i go long Wantok bai mi ken lukim.

**Paulus Tali
MENDI**

Noken tok pilai long lotu long Kanage stori

Dia Edita
MI WANPELA mangi bilong Simbu nau mi stap long Kimbe Wes Niu Briten Provins. Mi bin lukim stori bilong Kanage na mi no amamas tumas long sampela stori. I moa gutpela sapos yumi raitim sampela fani stori nating long winim prais.

Na sampela long lotu sait i go insait long stori bilong Kanage em i no gutpela tumas. God i no pilai pilai bilong yumi. Plis ol brata na susa yumi yusim

tingting gut na raitim Kanage stori. Sapos taim bilong Bikpela i kamap, bai yumi i no inap abrusim olsem na yumi ken lukluk i go insait long Revelesen 20 ves 15. Em tasol na God i ken blesim yumi. Husat brata o sista i laik sapotim o agensim mi plis rait i go long Wantok niuspepa bai mi ken ritim.

**Moses Kumul Kera
KIMBE WBNP**

Sapos
yu laik
salim
pen pren
i go ovasis
raitim leta
long inglis

Hapim pe bilong ol leba wokman

Dia Edita
INAP gavman sori long mipela ol grasrut leba woka tu na kamapim wanpela lo we i tokim ol praivet kampani, long hapim pe bilong mipela ol leba woka o nogat?

Klostu bai mi dai nau na nogat wanpela tenis i kamap long pe bilong mi. Mi ting em i no stret. Sapos gavman inap hapim pe bilong ol wokman bilong en, watpo na gavman i no inap hapim pe bilong mipela ol grasrut leba woka.

Mi save ol lain i wok long ol plentesin, ol ti boi, ol gras lain, ol lain i save digim baret, ol lain i rausim pekpek long toilen, sampela sekyuriti wokman na planti bilong mipela i mekim ol kain deti wok i no save kisim bikpela pe.

Tasol wankain olsem yu wok long opis, mipela tu man na i gat famili bilong lukautim. I tru save bilong mipela i no kisim mipela i go long


bikpela ol skul inap long mekim kain wok insait long opis, tasol ating i gutpela taim gavman i toktok long hapim pe, em i noken lusim tingting long mipela tu.

Yumi olgeta i olsem hap hap bilong wanpela bodi. Na yumi olgeta i mekim wok long developim kantri bilong yumi. Olsem na taim yumi glasim dispela ating em i gutpela gavman i mas helpim yumi olgeta long liklik we. Na wanpela rot we gavman inap mekim mipela ol leba woka i hepi em long kamapim wanpela lo bai ol kampani i hapim pe bilong mipela i go antap long K100 na antap na lusim K80 na i go daun.

Em tasol wari bilong mi, na God i blesim yu husat i sapotim mi.

**Jackson Laviong
KAVIENG**

Senisim K2 plastik mani



Dia Edita
MI I NO save amamas tumas long ol K2 plastik mani. Ol K2 pepa mani bilong 1975 na i kam inap long 1991 i gutpela tru bikos ol i no save bruk hari-

Opim strit maket long Ambunti

Dia Edita,
MI LAIK komplek i go long Ambunti taun kausel long rausim Ambunti maket. Dispela maket i save helpim ol mama long putim liklik kumu long namel long tupela stoa, Kapamei na Wamun.

Mi no wanbe long dispela pasin Ambunti Kausel i wokim. Na ol mama bai painim liklik toea long wanem hap. Kausel bai givim liklik toea long baim sop na sol na karasin na yupela stopim strit maket. Na yupela giamanim ol mama olsem nupela rifom bilong gavman i senisim olgeta olpela lo bilong maket long strit.

Trangu mipela lain long ples bai kisim mani long wanem rot long baim skul fi bilong pikinini long skul. Long dispela rot tasol mipela kisim toea long helpim sindaun bilong mipela trangu pipel. Yupela kamap olsem top sot stret hia na troimoi ston long ol pipel i stap. Sapos mipela nogat, bai i nogat gavman.

Ol kausel i save kisim mani bilong baim maket olsem na planti mama i no save go long maket. Ating long dispela as na ol i laik stapim ol strit maket bai ol mama i mas go long maket. Traim na givim sans long ol pipel bilong ples.

**Benny Hygam
AMBUNTI, IS SEPIK**

ap. Na ol i no save kam aut long poket bilong trau-sis o siot na pundaun.

Tasol ol plastik K2 mani bilong nau i no gutpela tumas. Ol i save bruk hariap maski liklik bruk long kona. Taim yu putim long poket, em bai bruk olgeta na taim yu kisim i go long benk long senisim, benk bai givim yu K1 tasol. Na tu gutpela kala bilong en na ol tumbuna piksa na piksa bilong kumul tu i save go aut hariap tumas na i save luk olsem wanpela hap plastik nating.

Tasol ol K2 bilong 1975 i kam inap long 1991 i gutpela pepa mani tru. Tru i ken wet, tasol stil em bai drai hariap. Na tu i no inap bruk hariap o ol piksa bilong kumul na disain i no inap kamaut, maski em i doti nogut tru. Olsem na senisim olgeta plastik K2. Yu husat man o meri i laik sapotim dispela tingting, yu welkam tasol.

**William . K. Mozong
VANIMO**

Rausim ol i nogat wok long siti i go long ples

Dia Edita
MI WANPELA yangpela man insait long Kiunga taun not flai asples Gasuke. Mi laik toktok long raskol pasin, simok spakbrus, rep, na stil pasin insait long siti na provins. Askim bilong mi i go long Gavman inap givim pawa i go long ol plisman long sekim ol yangpela husat i raun nabaut long siti na taun na i nogat wok na salim ol i bek long asples bilong ol.

Mi wanpela mangi husat i save les long harim long redio, ritim long niuspepa olsem i gat planti stil pasin, simok spakbrus, rep na ol arapela pasin nogut long siti. Em tasol wari bilong mi na tenkyu long ritim pas bilong mi.

**Asan Mathew Warre
SARE KONA, KIUNGA**

Putim strit lait kwik long fri we

Dia Edita
WANEM taim bai Curtains Brothers i pinisim wok bilong ol long putim olgeta strit lait long fri we na Yunivesiti i go long Reinbow?

Ating bai ol i wet inap gavman i opim fri we na nupela intanesenel ples balus na bai ol i mekim dispela o ating ol i wetim gavman long baim ol moa mani o olsem wanem?

Mekim hap wok na lusim i stap i no luk gutpela long siti. Inap Gavana bilong Nesenel Kapitol Distrik, Philip Taku i subim dispela kampani long mekim gut wok bilong ol na putim kwik ol strit lait.

Planti rot eksiden inap kamap long dispela ol fri we bikos rot i no hop tumas long ol ka i bagarap inap go pak long sait na givim we long arapela ka i spit i kam long abrusim ol. Na tu hevi bilong nogat strit lait bai mekim dispela hevi i go moa bikpela. Olsem na inap Curtains Brothers o Mista Taku i go het na mekim sampela samting?

Tenkyu long ritim pas bilong mi, na mekim sampela senis.

**Sam Kovingre
MOSBI**

Rausim asples Tari plisman

Dia Edita
MI SAVE hamamas tumas long ritim Wantok niuspepa. Olsem na tude mi rait i kam long tokaut long wok na pasin bilong ol plisman long Sauten Hailens.

Mi lukim wok bilong ol sampela plisman long sampela hap insait long hailens i gutpela. Tasol mi lukim olsem i gat tupela kain ol plisman i wok insait long Tari distrik long Sauten Hailens provins.

Wanpela grup ol i biahinim lo na wok namel long olgeta manmeri na sevim ol gut. Tasol ol plisman bilong asples Tari yet ol i save biahinim wantok sistem na helpim ol wantok bilong ol.

Olsem na mi laik askim bos bilong ol PPC long het opis long Mendi na rausim olgeta as ples plisman long Tari na larim ol arapela PNG plisman i wok long Tari plis stesin na mem bilong Tari plisman bai i kamap gutpela. Em tasol wari bilong mi. Sapos sampela i laik agensim mi o helpim mi em i gutpela.

**Apu Tege
TARI**

Gavman wokman pilai pokis long wok taim

Dia Edita
MI laik autim wari bilong mi i go long ol gavman wokman husat i save yusim gavman taim long pilai pokis. Long lukluk bilong mi, mi save lukim ol wokmanmeri bilong Sandaun provins i no save wok gut. Planti ol pablik seven long Sandaun i save giaman raun raun long gavman ka tasol i go sindaun ai kamaut poromanim poka masin i stap.

Taim yu i go sekim ol long opis

em i not stap. Na sapos yu askim ol arapela opisa, ol bai tok, em i no stap, em i go aut pinis. Ating gavman baim yupela olo wokman bilong gavman long raun raun nating na kisim nai o bilong wok na helpim ol pipel bilong ples.

Ol pablik seven bilong Sandaun ol i ting olsem Sandaun em i holide ples bilong ol long kam na malolo na i go long Jaya Pura.

Planti taim mi save lukim yupela i wokim dispela pasin. Yupela ol

pablik seven tasol wokim olsem na Sandaun i no develop liklik. Em bai stap olsem tasol ol tumbuna bai kamap lukim Sandaun i stap wankain tasol nogat senis liklik.

Sapos yu husat i laik agensim o sapotim mi bai mi hamamas long lukim pas bilong yu long Wantok niuspepa.

**Bee Kay
VANIMO SANDAUN**

PNG boksa mas pait long olimpik yia 2000 long Sidni

Dia Edita
MI WANPELA sapota bilong PNG boxing iig na mi laik autim sampela wari bilong mi long Wantok niuspepa.

Wari bilong mi i go olsem. Long lukluk bilong mi, long PNG Boxing lig, i gat planti gutpela boksa i stap. Long planti sempionsip olsem PNG

Nesenel Taitels, Ostrelia Nesenel Taitels, na Pasifik Taitels i bin kamap ol PNG lig Boxa man i wok long go pas long kisim ol Gol medal.

insait long PNG Nesenel Taitels bilong go pait long wol olimpiks gem long Sidni, Ostrelia.

Mi bilip yumi bai i gat sans long winim gol insait long boksing long wol olimpiks long Sidni. Em tasol wari bilong mi na husat i laik agensim o sapotim mi, em i orait tasol, bekim na mi ken lukim.

**Joel Kemish
LAE**

Tok save i go long ol man i save salim pas long Wantok. Sapos yu no putim nem tru bilong yu long pas mipela i no inap prinim leta bilong yu.



TOKSAVE


Kopi Industri Eksen i Kam long Dick Hagon

SIAMAN BILONG COFFEE PLANTATIONS & PROCESSORS ASSOCIATION INC.


Olsem siaman bilong Coffee Plantations and Processors Association Inc na bod memba bilong Coffee Industry Corporation, em i wok bilong mi long tokaut long ol pret na tingting bilong ol nesenel kampani na wanwan memba bilong asosiesen na arapela kopi groas long ol sampela bikpela toktok we i bungim ol nau.

1. a) Gat luksave olsem Wally Purdaker, Panga Coffee fektori na ol arapela Highlands Coffee Exports i stap, bihain long moa long 10-pela krismas i gat bikpela influens insait long kopi industri na ol praiwetais Coffee Industry Corporation. ol i laik kisim K25 - K75 milien antap long bikpela sas na K11 milien we Panga i no baim yet. Dispela hevi i karim CIC i go longwe tru long ol hevi bilong em long kisim mani tru bilong mekim wok bilong CIC long karimaut ol wok bilong em olgeta de. Klostu CIC i sot tru long mani.
- b) Sampela wik i go pinis, ol sampela paul politikel aidia na ol olpela CIC bod husat i raus pinis i muv wantaim sapot bilong Panga long rausim ol trupela bod membas.
- c) no gutpela tru long harim olsem ol bikpela kampani i wok long baim kopi long Panga we em (Panga) i wok long bagarapim na kilim ol asples kopi industri na tu Panga i mas yusim ekspot laisens bilong em yet.
- d) Dispela bisnis namel long Panga na ol bikpela ekspot kampani i wok long go het wantaim aninit long ekspens bilong arapela kampani na industri bilong hia yet.
- e) Ol ausait influens i wok long kamapim belhat we i sut long ol na dispela hevi i wok long go het yet na pusim indstri i go insait long bikpela bagarap we em i no inap stretim gut bihain.
2. a) Dispela em bikpela tingting bilong olgeta kopi groa long Panga na CIC i mas stretim dispela olgeta dinau bai mani i ken kam na stretim gut ol wok bilong CIC long olgeta de, ol woka, eksekutiv na bod na industri olgeta i ken rausim olgeta hevi i go bihain long ol.
- b) Ol National Coffee Industry mausman long arapela senta i amamas tu long ol i lusim kontrol long ol lokol praisng, baim, prosesng, ekspoting na makim wanem hap ol ilaik salim kopi i go long en. Ol i kros olsem ol i bungim hevi bilong kopi insait long asples bilong ol yet. Wanpela nesenel kopi baia i laik statim kopi fektori bilong em i no amamas tru long dispela. Narapela kampani menesa i tok tu olsem dispela i stilim na bagarapim kopi industri na ol sampela i no save. Industri prodaksen bilong smol groa, blokholda na plentesen em olgeta i stap long hia na i mas gat prosesng na ekspot laisensing long nau i go.
3. a) National Growers Coffee Buyers na Processors i kros tru na i pret tru long wanem as na dispela kain ogenaisesen i laik go pas long industri bilong kopi.
- b) Wanpela CIC memba i tok taim olgeta rot i op gut tru long stat bilong planim kopi i go long masin, drain na salim na i go salim long fektori na masin i stretim i go long ovasis maket i save kamapim traim long transferim ol prais insait long hait na tait rot we bikpela hevi olsem mani i sot i save kamap na dispela i ken kamapim sans bilong sampela lain tasol i ken go pas long kisim ekspot levi na arapela isi rot bilong mekim bisnis o wok.
- c) Kopi bilong mipela i gutpela long ovasis na i gat rot long ol ovasis kampani i ken kam na statim kopi kampani bilong ol long baim kopi na salim i go long ovasis maket. Dispela i ken kirapim bisnis na wok bilong kopi i go bikpela. Tasol i ken gat hevi na kros bihainim pasin nau i kamap na ol lokol industri i ken bagarapim ol gutpela bisnis i laik kamap bihain.
- d) Wanpela miting i kamap pinis namel long ol 70 lokol gavman kaunsela, kopi groa na edministretiv opisa i singautim ol lokol gavman kaunsel na provinsel risolusen long pasim na stopim muvmen bilong ol kopi we masin i no stretim yet long haiwe.
- e) I luk olsem ol PNG menesa bilong ol ovasis kopi kampani long hia i wok long givim krangki toktok na tingting i go bek long ol ovasis mama kampani bilong ol.
- f) Ol ovasis impota i mas save olsem setim ap kampani hia yusim "fran men" sea long tras, lokol sea holda na menesmen agrimen long soim ol i gat nem bai i no inap orait long kisim luksave olsem foren kontrol.
- g) I gutpela long tokaut ples klia i go long ol ovasis baia bilong mipela long wanem kain hevi bilong wok mipela i ken bungim bihain na tu long pastaim, taim kampani i putim bikpela strong na fainens i go long wok bilong en na ol kain hevi i kamap.
- h) Ol ofso kopi baia kampani i no ken ting tokorait bai ol i kisim long nupela laisens, senis long onasip o menesmen we inap stretim kampani bilong ol long kontrol o lukautim saplai bilong kopi.
- i) Toktok olsem ol nupela CIC bod ov dairektas, senis long ol staf level na menesmen pesenel na tu raitim gen ol Kopret Plen bai i gat stat senis long ol long taitim na mekim kamap ol sas long planti ruls.
- j) I gat luksave olsem planti rul insait long buk i bin bruk pinis tasol i nogat luksave long sasim wanpela man long brukim ol dispela rul namel long ol ovasis kopi baia bilong mipela husat i bin stap wantaim industri longpela taim i kam. Mipela i mas fogivim ol lokol kampani long askim long bihainim olgeta step bilong lukautim na sevim inkam long industri bilong ol na wok bilong ol, wankain olsem arapela industri long kantri i save mekim.
- k) Dispela K360 milien long olgeta yia i bikpela samting tru long ol liklik milien kopi groa i save bikos dispela em i bun bilong hat wok bilong ol tru.
- l) Mipela i no ken banisim olgeta rot bilong saplai long wanpela komsuma aria long dispela taim bilong bikpela senis long wok na ol gutpela samting i kamap long aria na arapela gutpela samting bilong tred.
- m) Inap gutpela onasip na arapela kontrol i kamap na Coffee Industry Corporation i klia gut, ol groa i ken kisim toksave olsem industri bilong mipela i stap gut na mipela i wok long kisim gutpela samting i kam long kopi bilong mipela.
- n) Mipela i bin luksave olsem Arabika kopi bilong mipela i gat namel maket long wanpela eria bilong ovasis maket na i putim mipela long mak bilong kisim moa helpim na sapot yet long dispela maket. Tasol inap mipela i ken salim kopi bilong mipela yet stret, bai mipela i no inap kisim ol kain sapot na helpim moa, na sapos i tru, brukim dispela rot na opim bikpela maket na mipela yet i ken go pas long olgeta wok bilong salim kopi i go ovasis.
- o) Lokol benk i mas hariap stretim rul bilong helpim dispela industri wantaim mani long rot bilong ekspot o salim olgeta kopi bin i go long ovasis maket.
- p) Mipela i mas kamap fri na i noken wari long ol ovasis bisnis husat i go pas long industri bai mipela i ken opim ol kopi bisnis bilong mipela i go moa na salim ol kopi igo long ovasis maket long pulim mani i kam na helpim kopi bisnis bilong mi na kamapim moa wok long ol pipel bilong mipela.
4. a) Dispela hevi bilong bikpela san na ais i kamapim bikpela hevi long ol pipel bilong mipela we ol i sik, hangre na sampela i dai. Dispela hevi i no inap pinis gut inap moa ren i pundaun na ol kaikai long gaden i kamap gut gen na bai ol kopi tu i gat sans long groa gut gen. Na dispela bai i stap planti mun yet na ol manmeri i mas kisim yet rais, flaua na oil long stap laip.
5. Olsem na bikpela samting nau em gavman i mas rausim kopi ekspot takis.
6. We i stap marimari long putim takis antap long dispela rot tasol bilong kisim mani long helpim dispela lain bilong planim kopi na kisim mani na bihain helpim ol wantaim ol kaikai na arapela sapot?.
7. CIC i mas go het yet wantaim dispela hatwok we i stap pinis na i mas daunim sais bilong em na soim long ol groa na gavman. Long longpela taim i kam dispela em gutpela rot, isi na gutpela na long olgeta taim inap sevim interes bilong ol kopi groa na i no ol dairektas na wokmanmeri olsem long pastaim we i save wetim planti mani. Taim dispela i kamap, bai ol groa i ken givim moa sapot long CIC we i bilong ol stret.

Sapos dispela i no kamap long sotpela taim CIC i ken kisim toktok long daunim sais bilong em na praiwetaisim operesen bilong em.



NATIONAL CAPITAL DISTRICT COMMISSION



POSITIONS VACANT

1. DIRECTOR ASSEMBLY SERVICES (GRADE 17 - K29,560)

The Position of Director Assembly Services is primarily responsible for conducting of all Commission meetings including the Committees and the four (4) Local Level Governments, ensures that these meetings are called, administered and recorded and that the decisions are promptly disseminated to the Management and the public, ensures that the Assembly standing orders are well complied with the smooth and efficient flow of the meetings and advises on rules, regulations and constitutional limits to the Commissioners and Councillors.

This position reports to the City Administrator and is part of the Executive Management.

We are seeking applications from well qualified, experienced and capable Managers who possess sound background in Parliamentary procedures.

Qualifications and Experiences

Must possess a degree in law, Public Administration or Politics from a recognised University and other relevant qualifications acceptable to the Commission. Proven leadership qualities. Have more than five (5) years Management experience in a Government Organisation, Parliamentary or similar environment. sound understanding of Parliamentary procedures and Local Level Government legislation is essential.

2. HUMAN RESOURCES MANAGER (GRADE 16 - K26,369)

We are seeking a highly motivated, suitably qualified and experienced professional for the position of Human Resources Manager.

This position reports directly to the Deputy City Administrator (Finance and Administration) and contributes to the Commission's profitability and effective Management through the design, development and implementation of appropriate Human Resources Policies and the managerial direction of Recruitment, Salary Administration, Employee Records, Training and Staff Development, Occupational Health and Safety and Industrial Relations in close consultation with the Management. The role in a interesting mix of consultancy, advice and service.

This is a Senior Management position and the incumbent must be able to demonstrate adequate knowledge and experience on the position.

Qualifications and Experiences

Must possess a Degree or Diploma in Human Resources Management or Social Science from a recognised University and possess any other relevant qualifications acceptable to the profession. Be a member of the PNG Human Resources Institute or other relevant professional bodies. Wide experience in all aspects of Human Resources functions in a large Commercial or similar Organisation. Ability to inspire confidence in others by establishment of positive relationships both internally and externally through adoptive approaches to challenges and issues.

Both positions are subjected to three (3) years performance based contract and acquire competitive salary, allowances and benefits to attract the right persons.

Written applications with curriculum vitae, copies of certificates and the names and contacts of three recent referees to be addressed to:-

National Capital District Commission
P O Box 7270
BOROKO
NCD

Attention: Recruitment Officer

Further details may be obtained by contacting the Recruitment Officer on telephone 324 0727 or 324 0722. Applications close at 4:06 pm on 13th February, 1998.

The National Capital District commission is committed to equal opportunity in employment. Selection will be on the basis of merit.

2 x SALES TAX INSPECTORS (GRADE 8 - K9,149 PER ANNUM)

We are urgently seeking applications from suitably qualified and experienced persons for two (2) Sales Tax Inspector positions that exist in the Finance Division.

The successful appointees will be responsible for undertaking periodic visits to all business houses to determine levels of Sales and/or Service tax payments owing to the National Capital District Commission, provide advice and assistance to the Legal Services Branch in processing prosecutions for defaulters, prepare periodic financial and associated reports for Management information and use and recommendations on improvement to method of collecting of Sales and Services Tax.

The persons we seek must be able to demonstrate adequate knowledge and experience, commitment to work and high level of interpersonal skills.

Qualifications and Experiences

The applicants must possess a Diploma in Accounting or Commerce from a recognised institution and possess such other qualifications that maybe acceptable to the Commission. Proven five (5) years of work experience in Accounting or Auditing. Sound understanding of National Capital District Commission Tax Law is preferred.

Written applications with curriculum vitae, copies of certificates, telephone contact and the names and contacts of three recent referees to be addressed to:

National Capital District Commission
PO Box 7270
BOROKO
NCD

Attention: Recruitment Officer

Further information may be obtained by contacting the Recruitment Officer on telephone 324 0272 or 324 0722. Applications close 4:06 pm on 13th February, 1998.

NCDC Publik Afeas Divisun i Autim dispela tok



• Pilaia bilong Post PNG iredi long rausim bal bikos straika bilong Defence i kamap klostu pinis. Foto: Ivan Bayagau.



• Oi susa bilong SP Holdings tu i save mekim nois long Mosbi praivet netball resis bilong ol meri.



• Oi meri Dalkins tu i no save givim sans. Oi i nogut long kamapim sampela mari long netbal resis bilong ol meri long Mosbi.




• Kas bilong Post PNG i kisim poro bilong Defence long NCD publik sevans soka resis long las wiken.



• Netbal tim bilong ol meri long Patterson Lawyers insait long Mosbi praivet netbal resis.



• Oi niuspepa meri bilong Word Publishing i save kilim skin tu long dispela netball resis. Lukaut long ol.



• Tasim em! Han bilong bikman ya i kamap pinis long tasim pilaia wantaim.



• ANTAP: Pilaia ya i laik saitim tasol narapela kas nogut i kamap pinis na tasim em.




• Pasim bal! Bikipela ya i rausim bal hariap tru bikos nogut bai birua i kisim em.

GORDENS RAGBI TAS RESIS

• RAITHAN: Bikipela salens bilong Gordens tas resis namel long Bulldogs na Roosters long las wiken.

• ANINIT: Tekov! Tasol nogat bek-ap. Gutpela pilai bilong bikman ya long tas resis long las wiken.



• Kas nogut i saitim wantaim bal long las wiken gem long Gordens tas resis.



Morobe Soka Federesen i sensim tonamen rul

BUSTIN ANZU i raitim

MOROBE Soka Federesen (MSF) i tingting long senisim sistem bilong tonamen neks yia.

Presiden bilong MSF John Peka em i laik kamapim dispela senis long larim 18-pela tim tasol long stap long dispela resis. Tripela yia i go pinis, taim MSF i stat, planti tim i save givim nem long kik.

Stat long neks yia, 18 tim tasol bai kik. Dispela tim ya bai kam long 9-pela ol distrik insait long Morobe provins.

Taim MSF i stap, i nogat lo i lukautim namba bilong ol tim long stap insait long dispela soka tonamen.

Peka i tok sapos ol tim i laik resis, ol i mas stap insait long distrik soka tonamen. Sapos wanem tupela tim i kamap namba wan na namba tu bai makim dispela bilong

ol long stap insait long Morobe Soka Federesen sempionsip.

Dispela kain ol helpim i kamap bikos aninit long nupela rifom gavman sistem, dispela bai helpim tru spot long rurel eria.

Peka i tokaut olsem namba 4 MSF Kap kik resis bai kamap long lsta wiken long Lae. Samting olsem 20 tim i givim nem pinis long stap long dispela resis. Sapos husat tim i laik joinim resis ol i mas baim K300 afiliisen fi long Benk ov Hawaii brens long Lae. Akaun namba em 34532-203-70, Lae.

Sapos wanem ol asosiesen i salim mani ol i mas kisim pepa na givim i go long sekretari bilong MSF James Kabi.

Gavaman bilong Morobe Luther Wenge and memba bilong Lae Bart Philemon bai opim dispela tonamen. Tonamen bai ran inap 4-pela de olgeta



□ Kas bilong Post PNG i kisim bal na redi long trikim poro bilong Difens long NCD Pablik Sevans soka kompetisen long las wik.

NCD Public Servants Soccer mid-week draws

Tuesday 3/02/98

SJS MP1

4.20pm Transport vs NCDC W2

Tuesday 3/02/98

SJS MP2

4.20pm Finance vs IPA W2

Thursday 05/02/98

SJS MP 1

4.20pm Commerce/Industry vs Bank of PNG M2

Thursday 5/02/98

SJS-MP2

4.20pm Attorney General vs Finance W2

Gordons Touch Association Preliminary finals results

Lapwing Tigers 6 b Masalai Warriors 0
Steelers 2 b Blue Heelers 0

Draws for this weekend

Wednesday: Tigers vs Sharks

Thursday: Steelers Warriors

Presiden bilong junia tas long Gordon, William Yogomin i askim olgeta papamama na ol sapota long kamap long fil long lukim ol bikpela painol bilong ol pikinini.

Em i askim tu olsem em i laik ol sapota na pilaia long noken makim trabel long taim ol yangpela i pilai.

Em i askim ken olsem sapos man i bikhet tim na klap bilong em bai kisim taim na bai i no inap long pilai long neks yia.

Senta bilong Manly i joinim ragbi yunion

BIKNEM pilaia bilong Manly ragbi lig klap long Australia, Craig Innes i joinim bek ragbi yunion bihain long 6-pela yia long ragbi lig.

Innes em wanpela biknem pilaia bilong Nu Silan tasol em i pilai ragbi lig.

Namba wan taim em i pilaia ragbi lig em taim em i joinim Leeds klap long Ingran. Tasol bihain, Manly i bin kisim em long pilai wantaim ol long tupela yia.

I no longtaim i go pinis, sif eksekutive bilong Manly Frank Stanton i tokaut olsem Innes bai lusim Manly na pilaia ragbi yunion.

Long bigin bilong dispela wik, ol ripot i tokaut olsem em i kalap pinis na joinim Nu Silan All Blacks tim.

Nu Silan All Blacks tim em nesenel tim bilong Nu Silan long pilaia ragbi yunion.

Ol Nu Silan i gat nem long winim wol kap bilong ragbi yunion.

Innes i tokim ol niusman long dispela wik olsem em i no laik ol ragbi yunion i mas wansait long en. Sapos ol i ting em i ken pilaia orait em i joinim nesenel tim.

Innes i guria nogut tru taim ol selekta bilong Nu Silan All Blacks tim i makim long trening skwat.

Igat 4-pela ten ol pilaia i stap long trening skwat bilong Nu Silan All Blacks.

Innes yet i no bilip olsem em bai kamap wanpela top senta insait long wol.

Em i tok ragbi lig i no wankain olsem ragbi yunion na em bai pilai tasol.

Em i tok i gat planti ol arapela gutpela pilaia i stap, na em yet bai i no inap tok olsem em i top senta (pilaia) long wol.

Innes i tok ragbi yunion i senis olgeta. Ragbi yunion i no olsem bipo na dispela em i as tingting long noken apim nem bilong em yet.

Bikpela samting long laip bilong em long ragbi yunion em taim Nu Silan i winim Wales Anda 19 54-9.

Planti ol pilaia i stap long dispela taim i kam yet long Anda 17 na ol i go pilai na winim ol boi long Wales.

Ol arapela wan pilai bilong mi em John Timu na Va'aiga Tuigamala. Mipela olgeta i senisim tingting na pilai ragbi lig.

John Timu em wanpela namba wan sent bilong ol

Canterbury Bulldog long Sydney.

Innes i tok em i bilip pani stret taim em i save olsem Timu na Va'aiga i joinim lig. Em i ting ol dispela pilaia bai stap yet long ragbi yunion.

John Timu bai joinim London Broncos long neks yia. Em wantaim bikpela fowat bilong Manly Mark Carrol.

Innes i tok em bai pilai long Auckland Blues 12 tasol i no gat wanpela promis olsem em bai pilai long All Blacks.

Tasol em i guria stret taim ol i makim nem bilong em long pilaia ya.

Nau yet em bai strong long winim wanpela posisen long nesenel tim bilong Nu Silan. Tupela arapela biknem pilaia olsem Eroni Clarke na Lee Stennes i holim tupela senta posisen bilong tim.



□ Tupela tim bilong Gordons Touch i traim strong bilong tupela. Long ya, yu ken lukim pilaia bilong Bulldogs i traim soim stail bilong em egens long ol boi Faiv Mail Roosters. Ol lain kakaruk ya i no laki tumas na ol Dog bilong Gordons i win 14-12.



WANTOK

Wantok niuspepa i gat posisen bilong wanpela

RIPOTA

long joinim nius tim bilong em.

Sapos yu laik wok wantaim namba wan niuspepa bilong yumi ol Papua Niugini, raitim aplikesen, na salim wantaim ol skul setifiket na wanpela stori long tok pisin i kam nau.

Salim aplikesen bilong yu i kam long:

The Acting General Manager
Wantok Niuspepa
P.O. Box 1982,
BOROKO - NCD

Aninit long dispela adres antap long fran bilong envelop, yu mas raitim:

Subject: Wantok Ripota

PUBLIC SERVANTS SOCCER DRAWS

Saturday 3/10/98

| | | |
|------------|--------------------------|----|
| Bisini One | | |
| 7.50 | Bank of PNG vs CMB | M2 |
| 9.50 | Bank of PNG vs Education | W1 |
| 10.30 | Transport vs IPA | M2 |
| 11.50 | IRC vs POSF | W1 |
| 13.10 | PMGH vs Elcom | M2 |
| 14.30 | Fisheries vs NPF | W1 |
| 15.50 | Diwai vs DAL | M2 |
| Bisini Two | | |
| 7.50 | IRC vs POSF | M1 |
| 9.10 | Transport vs IPA | W2 |
| 10.30 | ICPNG vs Education | M1 |
| 11.50 | PMGH vs Elcom | W2 |
| 13.10 | Fisheries vs NPF | M1 |
| 14.30 | Diwai vs DAL | W2 |
| 15.50 | DCA vs Defence | M1 |

Sunday 1/02/98

| | | |
|------------|-----------------------------------|----|
| Bisini One | | |
| 7.50 | POSF vs Defence | M1 |
| 9.10 | Bank of PNG vs Post PNG | M2 |
| 10.30 | UPNG vs NBC | W1 |
| 11.50 | Attorney General vs Teachers | M2 |
| 13.10 | Works vs Air Niugini | W1 |
| 14.30 | PNGBC vs Defence | W1 |
| 15.50 | NSO vs CMB | M2 |
| Bisini Two | | |
| 7.50 | Fisheries vs DCA | M1 |
| 9.10 | NBC vs UPNG | M1 |
| 10.30 | DCA vs Finance | W2 |
| 11.50 | Works vs Air Niugini | M1 |
| 13.10 | Attorney General vs NCDC | W2 |
| 14.30 | PNG Harbours Board vs Telkom | W1 |
| 15.50 | PNGBC vs Telikom | M1 |
| Bye: | | |
| M1 - | NCDC | |
| W1 - | Teachers | |
| M2 - | Commerce/Industry and PNG H/Board | |
| W2 - | NSO; ICPNG and Commerce/Industry | |

MID-WEEK GAMES Monday 02/02/98

| | | |
|--------------------|-----------------------------|---------------|
| Bisini One | | |
| 4.20pm | Commerce/Industry vs DAL | M2 |
| Tuesday 3/02/98 | | |
| 4.20pm | NPF vs PNGBC | M1 |
| Wednesday 4/02/98 | | |
| 4.20pm | POSF vs Defence | W1 |
| Thursday 5/02/98 | | |
| 4.20pm | Commerce/Industry vs DAL | W2 |
| Bisini Two | | |
| Monday 2/02/98 | | |
| 4.20pm | Attorney General vs Elcom | W2 |
| Tuesday 3/02/98 | | |
| 4.20pm | NPF vs PNG H/Board | W1 |
| Wednesday 04/02/98 | | |
| 4.20pm | PMGH vs DCA | W2 |
| Thursday 5/02/98 | | |
| 4.20pm | Fisheries vs PNGBC | W1 |
| Inservice College | | |
| Monday 02/02/98 | | |
| 4.20pm | Diwai vs NSO | W2 |
| Tuesday 3/02/98 | | |
| 4.20pm | Education vs Air Niugini | W1 |
| Wednesday 04/02/98 | | |
| 4.20pm | Diwai vs NSO | M2 |
| Thursday 5/02/98 | | |
| 4.20pm | Education vs Air Niugini | M1 |
| SJS Oval One | | |
| Monday 02/02/98 | | |
| 4.20pm | Transport vs Teachers | M2 |
| Tuesday 1/02/98 | | |
| 4.20pm | Fisheries vs IRC | W1 |
| Wednesday 04/02/98 | | |
| 4.20pm | Teachers vs Bank of PNG | W1 |
| Thursday 5/02/98 | | |
| 4.20pm | Fisheries vs IRC | M1 |
| Tuesday 3/02/98 | | |
| 4.20pm | Transport vs NCDC | W2 SJS - MP 1 |
| Tuesday 3/02/98 | | |
| 4.20pm | Finance vs IPA | W2 SJS - MP 2 |
| Thursday 05/02/98 | | |
| 4.20pm | Commerce/Industry vs PNGBC | M2 SJS - MP 1 |
| Thursday 5/02/98 | | |
| 4.20pm | Attorney General vs Finance | W2 SJS - MP 2 |

PRIVATE NETBALL POINTS LADDER

AS GAME PLAYED 25/01/98
GAME 4 ROUND TWO

| | | |
|--------------|----|--|
| Division One | | |
| Post Courier | 33 | |
| Fairdeal | 21 | |
| Courts | 21 | |
| SP Holdings | 15 | |
| Travelodge | 15 | |
| Steamships | 15 | |
| Coke | 9 | |
| Shell | 3 | |

| | | |
|----------------|----|--|
| Division Two | | |
| Ela Motors | 21 | |
| Travelodge | 21 | |
| Steamships | 20 | |
| Daltron | 18 | |
| Theodist | 17 | |
| SP Holdings | 15 | |
| Delloite | 14 | |
| PNG Stationery | 6 | |

| | | |
|-----------------|-----|--|
| Division Three | | |
| Daikin | 30 | |
| EFM/Consort | 23 | |
| MBA 1 | 21 | |
| Word Publishing | 21 | |
| Rothmas | 12 | |
| Mobil | 5 | |
| Courts 2 | Nil | |

| | | |
|---------------|----|--|
| Division Four | | |
| Brian Bell 1 | 30 | |
| City Pharmacy | 27 | |
| Fairdeal 2 | 24 | |
| Raywhite | 15 | |
| MBA 2 | 12 | |
| Yellow Pages | 9 | |
| Boroko Motors | 6 | |
| Courts 3 | 3 | |

| | | |
|-----------------|----|--|
| Division Five | | |
| Post Courier 2 | 32 | |
| Pacom | 32 | |
| Atlas 1 | 24 | |
| National | 21 | |
| Pryde | 18 | |
| Brian Bell | 17 | |
| STC | 7 | |
| City Pharmacy 2 | 6 | |
| Courts 3 | 3 | |

| | | |
|-------------------|-----|--|
| Division Six | | |
| National 2 | 32 | |
| Pom Transport | 31 | |
| Patterson Lawyers | 29 | |
| Arnotts | 18 | |
| Trukai | 18 | |
| Fletcher Morobe | 17 | |
| Tradewinds | 15 | |
| Steamships | 12 | |
| Coopers | 3 | |
| Atlas 2 | Nil | |

NCDPSSA MID-WEEK DRAWS

Tuesday 3/02/98

| | |
|---------|----------------------|
| SJS MP1 | |
| 4.20pm | Transport vs NCDC W2 |

Tuesday 3/02/98

| | |
|---------|-------------------|
| SJS MP2 | |
| 4.20pm | Finance vs IPA W2 |

Thursday 05/02/98

| | |
|----------|-------------------------------------|
| SJS MP 1 | |
| 4.20pm | Commerce/Industry vs Bank of PNG M2 |

Thursday 5/02/98

| | |
|---------|--------------------------------|
| SJS-MP2 | |
| 4.20pm | Attorney General vs Finance W2 |

PRIVATE NETBALL DRAWS

Sunday, February 1, 1998.

| | | |
|----------------|-------------------------------------|--|
| Division One | | |
| 1.00 | Travelodge (1) vs Fairdeal (1) | |
| 1.45 | Post Courier (1) vs SP Holdings (1) | |
| 2.25 | Coke vs STC (1) | |
| 3.10 | Courts vs Shell (1) | |
| Division Two | | |
| 1.00 | Theodist vs Deloite | |
| 1.45 | Travelodge (2) vs PNG Stationery | |
| 2.25 | SP Holdings (2) vs STC (2) | |
| 3.10 | Ela Motors vs Daltron | |
| Division Three | | |
| 1.00 | Mobil vs Rothmans | |
| 1.45 | Word Publishing vs EFM/Consort | |
| 2.25 | MBA (1) vs Daikin | |
| Division Four | | |
| 1.00 | Boroko Motors vs MBA (2) | |
| 1.45 | City Pharmacy (1) vs Yellow Pages | |
| 2.25 | Ray White vs Fairdeal Liquors | |
| 3.10 | Courts (2) vs Brian Bell (1) | |
| Division Five | | |
| 1.00 | Courts vs Pacom | |
| 1.45 | National vs Post Courier | |
| 2.25 | Brian Bell (2) vs Atlas (1) | |
| 3.10 | City Pharmacy vs Pryde Furniture | |
| Division Six | | |
| 1.00 | Steamships (3) vs Arnotts Biscuits | |
| 1.00 | Fletcher Morobe vs Atlas (2) | |
| 1.45 | Paterson Lawyers vs Trukai | |
| 2.25 | Port Moresby Transport vs Coopers | |
| 3.10 | Trade Winds vs National (2) | |
| Bye: | Coopers | |

GORDON TOUCH RESULTS AND DRAWS

The results for A grade fixtures is as follows:

Wards Bulldogs 14 beat 5Mile Roosters 12
Henao Knights 5 beat Sandpiper Sharks 2
Bala Raiders 18 beat Masalai Warriors 3
Corner Panthers 12 Beat Blue Heelers 6
Konaba Eels 28 beat BHP Bears 0
French Bake Haus Sea Eagles 4 beat Peulik Dodgers 0

UNDER 13 PRELIMINARY FINALS RESULTS

Lapwing Tigers 6 def Masalai Warriors 0
Try scorer/Goal - D.J.Barry

Steelers 2 def B/Heelers 0
Penalty score - W. Joesph

DRAWS

Wednesday 28.01.98

Tigers VS Sharks 5.00 PM



Thursday 29. 01 .98

Steelers VS Warriors 5.00 PM



Divisen 1 tim bilong Courts bepo long gem bilong ol wantaim Post Courier insait long Praivet Kampani Netbol resis. Post Courier i winim dispela gem. Foto: Joe Ivaharia.

WANTOK SPOT



Mas 7 i de bilong PSSA gren fainel

OL eksekutiv bilong NDC Pablik Sevans Soka kik resis i makim Mas 7 olsem de bilong gren fainol.

Insait long wanpela miting las wik Tunde, presiden bilong Pablik Sevans Soka, Lawrence Bapai na namba tu bilong em, Simon Koima wanaim ol arapela opisel bilong ol pasim tok long dispela de.

Ol arapela toktok tu i kamap long dispela miting em, presentesen nait bai kamap long de 14 bilong mun Mas. Dispela presentesen bai kamap long Islander Travelodge.

Insait long miting tu, ol eksekutiv i tokaut pinis olsem PSSA bai salim tupela tim long nesenel soka sempionsip. Sempionsip ya bai kamap long Mosbi.

Arapela bikpela toktok tu em ID kat. Ol eksekutiv i strong yet long ol pilaia i mas yusim ID kat long taim bilong pilai. Planti ol pilai husat i no pablik sevan tasol ol i wok long pilai aninit long ol hait nem bilong ol.

Insait long miting tu, presiden Bapai i tokaut long nupela ol eksekutiv. John Silikara husat i bin holim wok sekretari

aninit long olupela presiden Francis Kasau i kamap nupela tresera. Silikara i kisim ples bilong Jason Terime. Bill Tomokita i kamap sekretari, na em i senisim Walter Komek.

Presiden Bapai i tok tenkyu long Terime na Komek long gutpela wok ol i bin wokim taim ol i stap olsem opisal bilong PSSA.

Fainel bilong Praivet netbal kompetisen i klostu nau

RESIS bilong Praivet Kampani Netbal kompetisen long Mosbi bai pinis nau.

Insait long resis bilong divisen tri, Daltron i wok long go pas long poin lata wantaim 30 poin.

Ol meri Daltron i gat biknem pilaia olsem Violet David husat i save trenim na skulim ol yangpela susa na mama bilong Daltron. Arapela tim husat i wok long traim soim pes long painol em Wod Publishing. Ol meri Wod Publishing i no laki tumas las yia tasol nau ol i gat sans sapos ol i win long dispela wiken. Las wik ol meri long Independent na Wantok niuspepa i nekim stret ol kas long Rothmans 30-18. Rothmans i gat nem bikos las yia ol i pilai long gren fainol bilong divisen tri.

Emma Maki, wanpela sinia pilaia bilong Telstars tim long Pot Mosbi netbal i go pas long ol meri Wod Publishing. Ol arapela meri husat i sapatim Emma em Barbara Tomi, Priscilla Raepom, Margaret Vulum, Julie Apau, Miva Morabang, Nikoma Taureka, Karren Bayagau, Leila Gilchrist, Aiwa Tamati na Miva Morabang.

Ol dispela lain meri i bin kamap gutpela gem egens long Rothmans na ol i win. Sapos ol i gat laik yet long stap long fainol, ol i mas autim tiket bilong wanem tim ol bai salensim ol long dispela wiken.

Insait long arapela divisen, Post Courier i wok long strong yet long divisen wan. Ol i autim tiket bilong namba wan birua bilong ol, Courts 24-13 las wik.

Poin lata bilong olgeta divisen i sanap olsem:

Divisen wan: Post Courier 33, Fairdeal 21, Courts 21, SP Holdings 15, Travelodge 15, Steamships 15, Coke 9, Shell 3

Divisen tu: Ela Motors 21, Travelodge 21, Steamships



Ol meri Rothmans i no wari long lus, ol i amamas long soim pes long niuspepa ya.

20, Daltron 18, Theodist 17, SP Holdings 15, Deloitte 14, PNG Stationary 6,

Divisen tri: Daikin 30, EFM/Consort 23, MBA 1 21, Word Publishing 21, Rothmans 12, Mobil 5, Courts 2 0

Diviseri Foa: Brian Bell 1 30, City Pharmacy 27, Fairdeal 2 24, Ray White 15, MBA 2 12, Yellow Pages 9, Boroko Motors 6, Courts 3 3

Divisen faiv: Post Courier 2 32, Pacom 32, Atlas 1 24, National 21, Pryde 18, Brian

Bell 17, STC 7, City Pharmacy 2 6, Courts 3 3

Divisen siks: National 2 32, POM Transport 31, Patterson Lawyers 29, Arnotts 18, Trukai 18, Fletcher Morobe 17, Tradewinds 15, Steamships 12, Coopers 3, Atlas 2 0

PEPSI -

PUBLIC SERVANTS SOCCER DRAWS

Saturday 3/10/98

Bisini One

| | | |
|-------|--------------------------|----|
| 7.50 | Bank of PNG vs CMB | M2 |
| 9.50 | Bank of PNG vs Education | W1 |
| 10.30 | Transport vs IPA | M2 |
| 11.50 | IRC vs POSF | W1 |
| 13.10 | PMGH vs Elcom | M2 |
| 14.30 | Fisheries vs NPF | W1 |
| 15.50 | Diwai vs DAL | M2 |

Bisini Two

| | | |
|-------|--------------------|----|
| 7.50 | IRC vs POSF | M1 |
| 9.10 | Transport vs IPA | W2 |
| 10.30 | ICPNG vs Education | M1 |
| 11.50 | PMGH vs Elcom | W2 |
| 13.10 | Fisheries vs NPF | M1 |
| 14.30 | Diwai vs DAL | W2 |
| 15.50 | DCA vs Defence | M1 |

Sunday 1/02/98

Bisini One

| | | |
|-------|------------------------------|----|
| 7.50 | POSF vs Defence | M1 |
| 9.10 | Bank of PNG vs Post PNG | M2 |
| 10.30 | UPNG vs NBC | W1 |
| 11.50 | Attorney General vs Teachers | M2 |
| 13.10 | Works vs Air Niugini | W1 |
| 14.30 | PNGBC vs Defence | W1 |
| 15.50 | NSO vs CMB | M2 |

Bisini Two

| | | |
|-------|---------------------------|----|
| 7.50 | Fisheries vs DCA | M1 |
| 9.10 | NBC vs UPNG | M1 |
| 10.30 | DCA vs Finance | W2 |
| 11.50 | Works vs Air Niugini | M1 |
| 13.10 | Attorney General vs NCDC | W2 |
| 14.30 | Harbours Board vs Telikom | W1 |
| 15.50 | PNGBC vs Telikom | M1 |

Bye:

M1 - NCDC W1 - Teachers

M2 - Commerce/Industry and PNG H/Board

W2 - NSO; ICPNG and Commerce/Industry

Mid-Week Games

Bisini One

Monday 02/02/98

| | | |
|--------|--------------------------|----|
| 4.20pm | Commerce/Industry vs DAL | M2 |
|--------|--------------------------|----|

Tuesday 3/02/98

| | | |
|--------|--------------|----|
| 4.20pm | NPF vs PNGBC | M1 |
|--------|--------------|----|

Wednesday 4/02/98

| | | |
|--------|-----------------|----|
| 4.20pm | POSF vs Defence | W1 |
|--------|-----------------|----|

Thursday 5/02/98

| | | |
|--------|--------------------------|----|
| 4.20pm | Commerce/Industry vs DAL | W2 |
|--------|--------------------------|----|

Bisini Two

Monday 2/02/98

| | | |
|--------|---------------------------|----|
| 4.20pm | Attorney General vs Elcom | W2 |
|--------|---------------------------|----|

Tuesday 3/02/98

| | | |
|--------|--------------------|----|
| 4.20pm | NPF vs PNG H/Board | W1 |
|--------|--------------------|----|

Wednesday 04/02/98

| | | |
|--------|-------------|----|
| 4.20pm | PMGH vs DCA | W2 |
|--------|-------------|----|

Thursday 5/02/98

| | | |
|--------|--------------------|----|
| 4.20pm | Fisheries vs PNGBC | W1 |
|--------|--------------------|----|

Inservice College

Monday 02/02/98

| | | |
|--------|--------------|----|
| 4.20pm | Diwai vs NSO | W2 |
|--------|--------------|----|

Tuesday 3/02/98

| | | |
|--------|--------------------------|----|
| 4.20pm | Education vs Air Niugini | W1 |
|--------|--------------------------|----|

Wednesday 04/02/98

| | | |
|--------|--------------|----|
| 4.20pm | Diwai vs NSO | M2 |
|--------|--------------|----|

Thursday 5/02/98

| | | |
|--------|--------------------------|----|
| 4.20pm | Education vs Air Niugini | M1 |
|--------|--------------------------|----|

SJS Oval One

Monday 02/02/98

| | | |
|--------|-----------------------|----|
| 4.20pm | Transport vs Teachers | M2 |
|--------|-----------------------|----|

Tuesday 1/02/98

| | | |
|--------|------------------|----|
| 4.20pm | Fisheries vs IRC | W1 |
|--------|------------------|----|

Wednesday 04/02/98

| | | |
|--------|-------------------------|----|
| 4.20pm | Teachers vs Bank of PNG | W1 |
|--------|-------------------------|----|

Thursday 5/02/98

| | | |
|--------|------------------|----|
| 4.20pm | Fisheries vs IRC | M1 |
|--------|------------------|----|

Mid-Weeks Games

SJS

Tuesday 3/02/98

| | | |
|--------|-------------------|----|
| 4.20pm | Transport vs NCDC | W2 |
|--------|-------------------|----|

MP 1

Tuesday 3/02/98

| | | |
|--------|----------------|----|
| 4.20pm | Finance vs IPA | W2 |
|--------|----------------|----|

MP 2

Thursday 05/02/98

| | | |
|--------|---------------------|----|
| 4.20pm | C/Industry vs PNGBC | M2 |
|--------|---------------------|----|

MP 1

Thursday 5/02/98

| | | |
|--------|----------------------|----|
| 4.20pm | A/General vs Finance | W2 |
|--------|----------------------|----|

MP 2

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.